



“

“Timor-Leste ratifika ona konvensaun internasionál lubuk ida, inklui kona-ba direitu sivil no polítiku, direitu labarik sira-nian, direitu traballadór migrante sira-nian, no eliminasaun diskriminasaun hasoru fetu no ema ho defisiénsia sira. Maibé, ratifikasaun de’it la to’o—Timor-Leste ténke hakat liu ida ne’e, la’os de’it sai ratifikadór maibé mós ténke hatudu kompromisu jenuínu ba implementasaun no ezelesaun.”

Virgílio da Silva Guterres ‘Lamukan’
Provedor de Direitos Humanos e Justiça

PREFÁSIU



Ho agrade-se no sentidu responsabilidade, ha'u apresenta Relatório Atividade Provedoria Direitos Humanos no Justisa (PDHJ) ba tinan 2025.

Relatório ida-ne'e dokumenta esforsu no rezultadu sira ne'ebé instituisaun ne'e alkansa iha implementasaun mandatu judisiál iha ámbitu promove, proteje no fortalese direitos umanus, promove governasaun di'ak ba Timor-Leste ida ne'ebé proteje no respeita direitos umanus, ho servisu públiku mak justu no efetivu.

Tinan 2025 marka período importante ida ba konsolidasaun institusionál PDHJ. Iha tinan ida-ne'e, ami kontinua implementa Planu Estratéjiku PDHJ 2024–2028 ho prioridade ba área servisu lima, mak protesau, prevensaun, promosaun, supervizaun polítika públika no dezvoltamentu institusionál.

Liu-hosi abordajem ida-ne'e, PDHJ aumenta kapasidade atu hatán ba sidadaun sira nia preokupasaun no kontribui ba harii *estado de direito democrático* ne'ebé respeita dignidade umana no garante justisa ba ema hotu.

Tinan 2025, PDHJ prosesa keixa sira, investiga alegasaun violasaun direitos umanus no má-administrasaun, monitoriza sela detensaun, prizaun, ospital no instituisaun solidariedade sosial, no hala'o programa formasaun no sensibilizasaun ba comunidade, estudante, funsionáriu públiku, PNTL no F-FDTL. Ami mós realiza estudu (*survey*) no fiskalizasaun konstitusionál hodi asegura katak polítika públika no lejislasaun sira aliña ho Konstituisaun RDTL no prinsípiu direitos umanus.

Iha aspeitu institusionál, PDHJ fortalese sistema planeamentu, jestaun rekursu umanu, auditoria interna, jestaun finanseira, nomos parseria no kooperasaun estratéjika. Prosesu selesaun méritu ba kargu dresaun no xefia, nomos rekrutamentu pontu vogál iha jerál sira, reflete kompromisu instituisaun atu promove profesionalizmu, transparénsia no igualdade iha servisu públiku.

Relatório ida-ne'e mós rekoñese katak implementasaun mandatu PDHJ seidak livre husi dezafiu. Limitasaun iha rekursu umanu, finanseira, infraestrutura no teknolojia informasaun afeta ba velocidade no abranjénsia servisu sira. Maibé, liu-hosi esforsu no dedikasaun lideransa no funsionáriu sira, PDHJ kontinua buka solusaun inovadora hodi garante katak servisu ba públiku la para.

Ha'u hato'o apresiasaun boot ba Parlamentu Nasionál, Governu, parseiru dezvoltamentu sira hotu inklui ONU direitos umanus iha Timor-Leste

(UADU), Programa Nasoens Unidas ba Dezenvolvimentu (UNDP sigla Inglés), organizasaun sosiedade sivil, média no sidadaun sira hotu ne'ebé kontinua fó konfiansa no apoiu ba PDHJ.

Ha'u nia agradesimentu ba Provedóra Adjunta, Provedór Adjuntu, Sekretáriu Ezekutivu, lideransa no funsionáriu tomak ba sira nia dedikasaun no servisu maka'as durante tinan ida-ne'e.

Ho laran luak, ha'u espera, relatóriu ida-ne'e bele sai nu'udar dokumentu referénsia ne'ebé útil ba ema hotu ne'ebé hakarak komprende progresu, dezafiu no prioridade PDHJ nian iha esforsu hamutuk atu harii Timor-Leste ne'ebé justu, inkluzivu no respeita direitus umanus, no ema hotu nia liberdade fundamentál.



Virgílio da Silva Guterres "Lamukan"
Provedór Direitus Humanus no Justisa

FIXA TÉCNIKA

TÍTULO: Relatório Atividade PDHJ 2025

RESPONSÁVEL JERÁL:

Virgílio da Silva Guterres 'Lamukan'

Provedor de Direitos Humanos e Justiça

Maria Marília X.C. de Oliveira da Costa

Provedora Adjunta Direitos humanos

Rigoberto Monteiro

Provedor Adjunto Boa governança

RESPONSÁVEL PRINCIPAL:

Ambrosio Graciano Soares

Sekretariu Ezekutivu PDHJ

ELABORADOR:

Martinho Moniz

Tekniku Espesializadu Programa no Dezenvolvimentu Institusionál

FOTO: Mídia PDHJ nomos fontes relevantes

FONTE INFORMASUN:

- Gabinete Sekretariu Ezekutivu
- Gabinete Inspesun
- Gabinete Relasun Publika no Koordenasun Institusionál
- Diresun Asisténsia Publika
- Diresun Investigasun
- Diresun Fiskalizasun no Rekomendasun
- Diresun Promosun
- Unidade Asisténsia Jurídika, Adminsitrativa no Peskiza
- Diresun Jestaun Rekursu Humanu
- Diresun Adminsitrasun Finansas
- Delegasun Territoriál Baucau
- Delegasun Territoriál Maliana
- Delegasun Territoriál Same
- Delegasun Territoriál RAEOA

TINAN PRODUSAUN: Maiu 2026

IMPRESAUN NO AKABAMENTU: Sylvia Printing

KUANTIDADE PRODUSAUN: 150 exemplár

ABREVIASAUN

Órgaun Estadu, Governu no Administrasaun Publika

AAP	– Ajente Administrasaun Pública
ADN	– Autoridade Nacional para o Desenvolvimento
CAC	– Comissão Anti-Corrupção
CFP	– Comissão da Função Pública
CNC.IP	– Centro Nacional Chega! Instituto Público
DT	– Delegasaun Territoriál
DFR	– Diresaun Fiskalizasaun no Rekomendasaun
IGE	– Inspeção Geral do Estado
IGE.IP	– Institutu Públiku Jestaun Ekipamentu
EDTL	– Eletridade Timor-Leste
F-FDTL	– FALINTIL Forsa Defeza Timor-Leste
GI	– Gabinete Inspesaun
INFPM	– Institutu Nasionál Farmásia no Produto Medikamentu
KAFI	– Konsellu Administrasaun Fundo Infraestrutura
MAE	– Ministério da Administração Estatal
ME	– Ministério da Educação
MI	– Ministério do Interior
MKAE	– Ministério Coordenador dos Assuntos Económicos
MNEK	– Ministério dos Negócios Estrangeiros e Cooperação
MP	– Ministério Público
MPIE	– Ministério do Plano e Investimento Estratégico
MS	– Ministério da Saúde
MSSI	– Ministério da Solidariedade Social e Inclusão
MTA	– Ministério do Turismo e Ambiente
MCI	– Ministériu Komersiu no Industria
OJE	– Orsamentu Geral Estado
PN	– Parlamento Nasionál
PM	– Primeiro Ministro
PNTL	– Polícia Nacional de Timor-Leste
SNI	– Servisu Nasionál Intelijensia

RAEOA	– Região Administrativa Especial de Oe-Cusse Ambeno
RDTL	– República Democrática de Timor-Leste
UAJAP	– Unidade Asisténsia Juridika, Administrativa no Peskiza

Direitus Umanus, Justisa, no Instituisaun Independente

CAVR	– Comissão de Acolhimento, Verdade e Reconciliação
CVA	– Comissão da Verdade e Amizade
CHRP	– Commission on Human Rights of the Philippines
GANHRI	– Global Alliance of National Human Rights Institutions
DUDH	– Deklarasaun Universal Direitus Humanus
ISS	– Instituisaun Solidariedade Sosiál
INDDICA	– Instituto para Defesa dos Direitos da Criança
IOI	– International Ombudsman Institute
KOMNAS HAM	– Komisi Nasionál Hak Asasi Manusia Indonesia
MNHRC	– Myanmar Human Rights Commission
NHRCT	– National Human Rights Commission of Thailand
NHRI	– National Human Rights Institution
PA-BG	– Provedór Adjunto ba Boa Governação
PA-DH	– Provedóra Adjunta ba Assuntos Direitos Humanos
PDHJ	– Provedoria Direitus Humanos no Justisa ¹
SCA	– Sub-Committee on Accreditation
SEANF	– South East Asia National Human Rights Institutions Forum
SEAOF	– South East Asian Ombudsman Forum
SUHAKAM	– Malaysia Human Rights Commission
UNHRC	– United Nations Human Rights Council
VPU	– Vulnerable Persons Unit

Organizasaun Internasionál no Koperasaun

ASEAN	– Association of Southeast Asian Nations
CPLP	– Comunidade dos Países de Língua Portuguesa
PALOP-TL	– Países Africanos de Língua Oficial Portuguesa e Timor-Leste
UADU	– Unidade Asesoria Direitus Umanus

¹ Provedór de Direitos Humanos e Justiça ne'e indika ba instituisaun, enkuantu Provedoria dos Direitos Humano e Justiça ne'e indika ba sekretariadu provedór ne'ebé hala'o funsaun operacional Provedór nian

UNDP	– United Nations Development Programme ²
USAID	– United States Agency for International Development

Organizasaun Sossiedade Sivil / Asosiasaun / Grupu Traballu

AJTL	– Associação da Jornalistas de Timor-Leste
UPJTL	– União Profissional dos Jornalistas de Timor-Leste
APFTL	– Alumni Parlamento Foinsa'e Timor-Leste
GT-PRT	– Grupu Traballu Processo Rekonsiliaaun Timor-Oan
AHFNT	– Asosiasaun Hari Futuru Nabilan ba Timor
DIT	– Dili Institute of Technology
IPDC	– Instituto profesionál de Canossa
KBH	– Knua Buka Hatene,
GFDTL	– Grace for Development Timor Leste
CCYC	– Comoro Child & Youth Center
UNTL	– Universidade nasional Timor Lorosa'e.

Konseitu, Sistema no Instrumentu Tékniku / Programa

AI / IA	– Artificial Intelligence / Intelijéncia Artífisiál
BG	– Boa Governasaun
CCTV	– Closed-Circuit Television
COEA	– Child Online Exploitation and Abuse
DH	– Direitos Humanos
E - CMS	– Electronic Case Management System
EhD	– Ema ho Defisiensia
EVAC	– End Violence Against Children
ICT	– Information and Communication Technology
LGBTIQ+	– Lesbian, Gay, Bisexual, Transgender, Intersex, and Queer
PAA	– Planu Asaun Anuál
PAN - EhD	– Planu Asaun Nasionál ba Ema ho Defisiensia
RSAP	– Rede Apoiou Servisu Prizionál
SOP	– Standard Operating Procedure
SCWG	– Strategic Communication Working Group

² Iha parte balu deskreve ho naran - Programa Nasoens Unidas ba Dezenvolvimentu (PNUD)

IN MEMORIAM



PAULO RIBEIRO

Oé-Cusse, 8 Abril 1983 – Dili, 27 Marsu 2025

Paulo Ribeiro ne'ebé moris iha Oé-Cusse, loron 08 fulan Abril tinan 1983, ema ida ne'ebé matan moris neon nain, metin iha komprimisiu no prinsípiu.

Sasidik lubuk hakur liu iha moris, Paulo prepara niaan sai oan ne'ebé útil ba família no sociedade.

Loron to'o ba tinan, iha 2008 Paulo Ribeiro hahu nia vida professional nu'udar ofisiál promosaun iha Provedoria Direitus Humanus no Justisa (PDHJ), instituisaun nasional ida ne'ebé proteje direitus umanus nomos promove governasaun di'ak.

Hosi dolat ba dolat Timor-Leste nian, Paulo hala'o funsaun nu'udar estafeta direitus umanus no justisa, kumpri ho responsábilidade, haklaken kona-ba governasaun ida ne'ebé di'ak, direitus umanus, rona reklamasaun hosi comunidade, hatutan povu nia lian ba parte relevante no competente sira hodi promove justisa no reparasaun ba injustisa sira.

Iha loron 01 fulan marsu tinan 2016, Paulo Ribeiro simu konfiansa hodi lidera Delegasaun Territoriál Oé-Cusse. Nu'udar lider, Paulo Ribeiro dedikadu hodi hala'o nia knar sira ho prudente, tuir kompeténsia ho onestu, integru nomos responsábilidade.

Paulo Ribeiro la'os deit diretór, maibé mau-alin ne'ebé prontu rona no ezejuta. Lider ne'ebé la haluha ema ki'ik, no aman ida ne'ebé hadomi no lituk "tau-matan" ba oan no fen.

Ba oan no fen sira, Paulo nu'udar ai-hun ne'ebé fó mahon no moris, ba belun sira iha PDHJ Paulo hanesan fatin ba sadere, no ba comunidade nia nu'udar lian ne'ebé hamrik iha justisa.

Hosi Oe-Cusse to'o Dili, ho esperansa atu hetan saúde di'ak, família no belun sira hein ho orasaun ne'ebé la nakotu. Maibé loron 27 fulan marsu tinan 2025, Maromak deside seluk. La'os moris naruk ba Paul, maibé bolu ba Nia kadunan santo. Situasaun ne'ebé hamout família no kolega sira iha espasu triste nia laran.

Paulo Ribeiro mate ho idade sei produtivu, nia-iis kotu iha Hospital Nacionál Guido Valadares, nia isin mate ona, maibé nia espiritu la mate, nia memoria sei nafatin eziste ba nafatin.

Nia hamnasa midar nafatin moris iha hanoin sira iha aredores PDHJ, nune'e mós nia dedikasaun permanese iha sosiedade ne'ebé justa. Paulo nia espiritu ne'e nafatin moris maske isin fila ona ba rai.

Paulo Ribeiro husik hela lisaun ida, moris ne'ebé dedikadu ba ema seluk, ne'e sai fini ne'ebé permanese no sustentável.

Bodik ba Paul nia parseira, oan no família tomak, PDHJ hato'o orasaun atu Na'I Maromak fó kbiit, no dame. Bodik servidór públiku sira ne'ebé sei kontinua jornada, mai ita hatutan Paulo nia mehi, mehi ba Timor-Leste ida ne'ebé respeita direitos umanus, no tane aas justisa.

Paulo Ribeiro fila ona ba Na'in nia kadunan santu, nafatin sai roman hodi saki "tuduk" dalan ba ita. Hosi keixa, reklamasaun no/ka lamentasaun sira ne'ebé ita simu, hosi injustisa ne'ebé ita buka halo reparasaun, nomos sidadaun sira ne'ebé hetan justisa, Paulo nafatin moris.

Deskansa iha Dame, Maluk

TABELA KONTEÚDU

PREFÁSIU	ii
FIXA TÉKNIKA.....	iv
ABREVIASAUN	v
IN MEMORIAM.....	viii
INTRODUSAUN	1
FUNSIONAMENTU NO DEZENVOLVIMENTU INSTITUSIONÁL	2
1. Planeamentu, Monitorizasaun no Avaliasaun	2
2. Planeamentu, Dezenvolvimentu Estratéjiku no Orientasaun Polítika ..	4
3. Servisu Inspesaun no Auditoria Interna	7
4. Apoiou Juridiku.....	10
5. Apoiou Adminsitrativa.....	10
6. Apresentasaun Relatóriu 2024 ba Parlamentu Nasionál.....	10
7. Planu no Orsamentu ba 2026	13
8. Jestaun Rekursus Umanus.....	15
8.1. Selesaun Méritu ba Kargu Diresaun no Xefia PDHJ	15
8.2. Rekrutamentu ba Pontu Vogál PDHJ	18
8.3. Perfil Forsa Traballu PDHJ	20
8.4. Servisu Peskiza no Estájiu	23
9. Formasaun no Kapasitasaun Rekursu Umanu	24
10. Jestaun Finanseira, Adminitrasaun no Lojístika	26
10.1. Prioridade Sira hosi Alokasaun Orsamentu	27
10.2. Flutuasaun no Realokasaun Orsamental	29
10.3. Ezekusaun Orsamentu PDHJ 2025.....	32
10.4. Jestaun Patrimoniu no Lojístika	42
11. Jestaun kontratu no Aprovizionamentu	44
12. Sistema Informátika no Teknolojia	47
13. Kooperasaun no Parseria	49
SERVISU PROTESAUN	53
1. Servisu Jestaun Keixa.....	53
2. Servisu Mediasaun no Konsiliasaun	55
3. Servisu Investigasaun	56
4. Servisu Haree Tuir Rekomendasaun	59

SERVISU PREVENSAUN	64
1. Fiskalizasaun Urjente	64
2. Fiskalizasaun Regular	67
2.1. Monitorizasaun ba Sela Defensaun Polisiál iha Timor-Leste	67
2.2. Monitorizasaun ba Prizaun iha Timor-Leste.....	70
2.3. Monitorizasaun Hospital, Sentru Saúde no Postu Saúde Sira	79
2.4. Monitorizasaun regular ba Instituisaun Solidariedade Sosiál	83
SERVISU PROMOSAUN.....	91
1. Formasaun direitus umanos no governasaun di'ak	91
1.1. Formasaun ba PNTL, F-FDTL no Guarda Prizionál.....	91
1.2. Formasaun ba servidór públiku, autoridade lokál nomos Foinsa'e Sira	92
2. Diseminasan Informasaun ba públiku	95
2.1. Diseminasan Informasaun ba Komunidade	96
2.2. Diseminasan Informasaun ba Estudante sira	96
2.3. Diseminasan Informasaun ba Universitariu Sira	98
2.4. Diseminasan ba Grupu Vulneravel.....	98
2.5. Diseminasan Informasaun ba Grupu Minoritariu Sira	99
2.6. Diseminasan Informasaun kona-ba Benefísiu no Risku sira iha Espasu Dijitál	99
2.7. PDHJ no USAID/AIM Lansa Indusaun Bolseiru Integridade Juventude	103
3. Partisipasaun no realizasaun eventu nasionál no internasionál	104
3.1. Partisipasaun Eventu Internasionál	104
3.2. Partisipasaun Eventu Nasionál	120
3.3. Selebrasaun Eventu Nasionál.....	135
4. Mídia no Publikasaun Informasaun	138
SERVISU SUPERVIZAUN POLÍTICA PÚBLICA	140
1. Revizaun Manuál Formasaun BG no DH.....	140
2. Avaliasaun Impaktu PAN EhD 2021 - 2030	141
3. Peskiza no Estudu Sira	142
3.1. Impaktu Apoiu Finanseira hosi MSSl ba Organizasaun EhD.....	142
3.2. Avalia Implementasaun Prinsípiu Boa - Governasaun.....	143
3.3. Haree Kualidade Atendimentu iha Rejistu Notariadu.....	145

4. Servisu Kontrolu Konstitusionálide	146
4.1. Fiskalizaun Abstrata ba Konstitusionálide	146
4.2. Verifikaun Inkonstitusionálide tanbá Omisaun Medida Lejizlativa	153
RESTRISAUN NO REKOMENDASAUN SIRA	156
MAKTAKAN	159

INTRODUSAUN

Dokumentu ida-ne'e mak Relatóriu Atividade Provedoria Direitos Humanos no Justisa (PDHJ) ba tinan 2025, ne'ebé apresenta kona-ba implementasaun programa no atividade sira, inklui ezekusaun rekursu institusionál durante períodu 1 Janeiro to'o 31 Dezembro 2025.

Relatóriu ida-ne'e nu'udar forma prestasaun kontas no transparénsia institusionál, nomos kumprimentu ba obrigasaun legál tuir Lei NÚ. 7/2004, 26 de Maiu, ne'ebé ejije Provedór Direitos Humanos no Justisa atu apresenta relatóriu atividade no relatóriu financeira ba Parlamentu Nasionál kada tinan.

PDHJ nu'udar Instituisaun Nasionál independente ida ne'ebé iha mandatu atu proteje direitos umanus, no promove governasaun di'ak liu-hosi simu keixa sira relasiona ho injustisa no má-administrasaun, hala'o investigasaun, monitoriza instituisaun públika, no hato'o rekomendasaun ba entidade competente sira. Mandatu ida-ne'e fundamenta iha Konstituisaun da Repúblika Demokrátika Timor-Leste no lejislasaun relevante sira.

Durante tinan 2025, PDHJ implementa programa prinsipál rua, **(1)** Programa Direitos Humanos e Boa Governação, nomos **(2)** Programa Funsionamentu no Dezenvolvimentu Institusionál.

Programa sira-ne'e operacionaliza liu-hosi subprograma no atividade sira ne'ebé orienta atu asegura katak sosiedade no poder públiku sai sensível liu ba direitos umanus no governasaun di'ak, nomos kapasidade institusionál PDHJ sai forte no sustentável.

Entretantu, relatóriu ida-ne'e apresenta ba ita parte prinsipál lima, kompostu hosi: **(1)** parte dahuluk kobre funsionamentu no dezenvolvimentu institusionál, inklui planeamentu, jestaun financeira, rekursu umanu, auditoria interna no kooperasaun; **(2)** parte daruak apresenta servisu protesaun, ne'ebé envolve jestaun keixa, mediasaun, investigasaun no monitorizasaun rekomendasaun; **(3)** parte datoluk trata servisu prevensaun liu-hosi fiskalizasaun regular no urgente; **(4)** parte dahaat aborda servisu promosaun no edukasaun públika; nomos **(5)** parte dalimak foka ba supervizaun polítika públika, peskiza no fiskalizasaun konstitusionál.

Maske hasoru dezafiu no limitasaun oioin, liu-liu iha área rekursu umanu, orsamentu no infraestrutura, PDHJ kontinua demonstra kompromisu atu fornese servisu ho independénsia, integridade no profesionalizmu iha território nasional tomak.

Nune'e, iha parte sira tuirmai, deskreve kona-ba rejultadu sira ne'ebé PDHJ atinji durante tinan 2025, nomos konstrajimentu no/ka limitasaun sira ne'ebé hasoru, inklui sujestaun no rekomendasaun sira oinsa kontinua hadia servisu ba oin. ***

FUNSIONAMENTU NO DEZENVOLVIMENTU INSTITUSIONÁL

Iha kuadru funsionamentu no dezenvolvimentu institusionál, PDHJ orienta nia asaun sira ba fortalese papél estratéjiku hodi konstrui konfiansa públiku, no hadi'a indikadór transparénsia no responsabilizasaun iha funsionamentu administrasaun públika. Esforsu ida-ne'e mós inklui dezenvolvimentu no implementasaun sistema kontrolu interna ne'ebé efisiente no bele funsiona ho di'ak.

Nune'e, jestaun presiza aseguara implementasaun Planu Asaun Anuál (PAA) ho efetivu, liu-hosi ezelesaun programa, atividade no orsamentu tuir planu ne'ebé define ona, hodi atinji objetivu institusionál sira ho rezultadu ne'ebé klaru no mensurável.

Aleinde ne'e, instituisaun mós estabese abordajen sektoriál sira hodi koordena implementasaun planu atividade, inklui aseguara implementasaun nota entendimentu ho efetivu, hodi kontribui ba mudansa pozitivu iha nivel instituisaun no sosiedade, relasiona ho promosaun governasaun di'ak nomos respeitu no protesaun ba direitos umanus. Nune'e, iha parte sira tuirmai, sei deskreve kona-ba planeamentu, monitorizasaun no avaliasaun, jestaun finanseira, orientasaun estratéjiku, jestaun no dezenvolvimentu rekusu umanu, kooperasaun no parseria, apoiu juridiku, nomos inspesaun no auditoria.

1. Planeamentu, Monitorizasaun no Avaliasaun

PDHJ nia planu asaun anuál 2025 iha programa rua, sub programa hitu no atividade 21. Programa 157: Direitos Humanos e Boa Governança hatan ba objetivu jerál (outcome) rua iha planu estratéjiku PDHJ 2024 – 2028 mak:

- 1) Sosiedade sensível ba direitos humanos no governasaun-di'ak, nomos iha kbi'it hodi kontrola poder públiku, nomos
- 2) Poder públiku sensível ba direitu no liberdade fundamental

Sub-programa hat mak hatan ba programa refere, iha atidade 11, nomos asaun 31, ne'ebé kobre:

- 1) **Servisu supervizaun polítika publika** mak elabora petisaun kona-ba verifikasaun inkonstitusionálidez no fiskalizasaun konstitusionálidez ba Tribunál de Recursos, halo estudu no publika relatóriu atendimentu públiku kona-ba servisu rejistu notariadu iha territóriu nasional, no relatóriu survey kona-ba governasaun di'ak, hodi garante polítika no lejislasaun públika sensível ba direitos umanus.
- 2) **Servisu Promosaun**, esforsu sira orienta ba publika informasaun liu hosi plataforma digital PDHJ, realizasaun programa komunikasaun públika hanesan *meet the press* no programa televizivu, nomos realiza atividade formasaun no sensibilizasaun ba grupu alvu oioin, inklui membru PNTL, F-FDTL, guarda prizionál, funsionáriu públiku, autoridade lokál,

komunidade, estudante, universitáriu, grupu vulnerável no minoritáriu, nomos realiza no partisipa iha eventu nasional no internasionál.

- 3) **Servisu Prevensaun**, atividade monitorizasaun kontinua realiza ba sela detensaun, prizaun, sentru protesaun sosiál, ospital no sentru saúde, inklui mós monitorizasaun ba kestaun urjente hodi garante rekomendasaun sira bele konsidera no implementa husi entidade públiku.
- 4) **Servisu Protesaun**, prioridade mak garantia prosesu tratamentu keixa ne'ebé efisiente liu hosi distribuissau karta notifikasaun, rejistu no investigasaun kazu iha períodu determinadu, finalizasaun prosesu mediasaun no konsiliaaun, no monitoriza implementasaun rekomendasaun sira husi entidade respondente, atu garante satisfasaun ba parte envolvida sira.

Entretantu Programa 510: Funcionamento e Desenvolvimento Institucional hatan ba objetivu espesifiku datoluk hosi planu estratéjiku PDHJ 2024 – 2028 mak, **Kapasidade institusiional Provedór Direitus Humanus no Justisa forte.**

Sub-programa 3, atividade 10 no asaun 21 mak hatan ka operacionaliza programa no objetivu institusionál refere, ne'ebé orienta ba garante sistema kontrolu interna PDHJ funsiona ho di'ak no sustenta jestaun institusionál ne'ebé efetivu no responsavel, liu hosi:

- o Produs deliberaaun no minuta husi reuniaun Konsellu Konsultivu, Konsellu Diretivu no reuniaun jerál sira.
- o Garante ezekeusaun orsamentu no implementasaun atividade tuir lei, liu hosi servisu inspesaun no auditoria interna;
- o Elaborasaun pareser juridiku no aleinde ne'e, esforsu sira mós fó énfase ba revizaun manuál no SOP sira;
- o Ezekeusaun orsamentu ho efisiénsia, elaborasaun no aprovasaun planu asaun anuál (PAA), submisaun relatóriu atividade no finanseiru tuir prazu, monitorizasaun no avaliaaun programa sira.
- o Avalia dezenpeñu no jestaun kontratu funsionáriu, realizaun reuniaun jestaun rekursu umanu, estabesimentu pontu vogál iha territóriu nasional, no partisipasaun funsionáriu sira iha formasaun relevante atu hadia prestaun servisu.
- o Garantia bens, fasilidade no espasu servisu adekuadu, sistema teknolojia informaun ne'ebé seguru no konfiavel, forneseimentu bens no servisu tuir padraun tempu no espesifikasaun, nomos dezaenvolvimentu parseria lokal, nasional no internasionál atu reforsa kapasidade institusionál PDHJ.

Asaun sira ne'ebé implementa iha kuadru servisu PDHJ ne'ebé foku ba hatuur sistema supervizaun, promosaun, prevensaun no protesaun direitus umanus no governasaun di'ak ho efetivu.

Rezultadu hosi asaun sira mak deskreve iha leten nu'udar apresenta ona iha parte sira relatóriu ida ne'e nian tuir estratéjia servisu idaidak. Enkuantu,

asaun sira ne'e realiza ho finansimentu hosi Orsamentu Jerál Estadu (OJE) nomos orsamentu hosi doador hanesan *United Nations Development Program* (UNDP).

Hodi fasilita Jestaun PDHJ organiza rekursu sira ba implementa asaun sira mak sita iha planu asaun anuál 2025 nu'udar deskreve iha leten, jestaun PDHJ elabora planu operasionál (kalendariu implementasaun atividade no ezekeusaun orsamentu) nu'udar meius ba monitorizasaun no avaliasaun periodika.

Entretantu, progresu implementasasaun asaun hirak ne'e atualiza iha sistema dalan ba futuru regularmente (trimestralmente).

2. Planeamentu, Dezenvolvimentu Estratéjiku no Orientasaun Polítika



Foto 1: *Dili, 2 abril 2025* – Provedór Direitus Umanus no Justisa, Virgílio da Silva Guterres 'Lamukan', prezide Reuniaun Konsellu Diretiva hodi avalia progresu serbisu PDHJ nian iha trimestre dahuluk tinan 2025 no diskute prioridade institusionál xave sira

Durante tinan 2025, jestaun PDHJ realiza enkontru Konsellu Diretivu hamutuk dala 7, hodi monitoriza progresu servisu diresaun sira tuir Planu Asaun Anuál 2025, identifika lakuna sira no define estratéjia intervensaun hodi melloria implementasaun programa no atividade nune'e bele asegura objetivu institusionál.

Diskusaun sira iha enkontru ne'e kobre área xave sira hanesan, avalia progresu trimestral, diskute prioridade estratéjiku inklui prepara planu atividade no orsamentu ba 2026, revizaun manuál governasaun di'ak, jestaun biblioteca, relatóriu anuál, rekrutamentu no selesaun méritu, no prosedimentu investigasaun.

Liu-hosi enkontru diretiva PDHJ ne'ebé hala'o regularmente, PDHJ reforsa transparénsia, responsabilizasaun, no kapasidade institusionál, hodi garante servisu protesaun direitus umanus no promove governasaun di'ak iha Timor-Leste la'o ho efetivu.

Aleinde enkontru konsellu diretivu, Iha loron 4–5 Agostu 2025, Provedoria Direitus Humanus no Justisa (PDHJ) organiza enkontru orientasaun

estratéjiku ba kargu direisaun no xefia sira iha Salaun Konferénsia Centro Nacional Chega! IP, Balide, Dili.



*Foto 2: Provedoria Direitus Umanus no Justisa (PDHJ) hala'o enkontru orientasaun loron rua iha CNC Balide ba nia Sekretáriu Ezekutivu, Diretór Nasionál no Delegasaun Territoriál no Xefe Departamentu foun sira, **Dili, 4–5 Agostu 2025.***

Atividade ida-ne'e realiza hodi hametin komprensaun komum kona-ba polítika, objetivu institusionál, no mekanizmu servisu PDHJ, tuir planu estratéjiku PDHJ 2024–2028.

Enkontru ne'e realiza mós tanbá PDHJ foin remata prosesu konkursu interna ba kargu direisaun no xefia sira, ne'ebé presiza orientasaun hodi unifika persepsaun no hametin koordinasaun servisu.

Hafoin abertura hosi Provedór Direitus Humanus no Justisa, kontinua ho vizita edukativu ba Muzeu Memorial Chega! hodi hatudu istória violasaun direitus umanus iha Timor-Leste no reforsa importánsia mandatu PDHJ iha protesaun direitus umanus.

Hafoin vizita ne'e, kontinua ho apresentasaun sira kobre papél no kompeténsia provedór no funsaun institusionál PDHJ, komunikasaun no relasaun públika, parseria institusionál, no implementasaun planu estratéjiku 2024–2028.

Materia sira ne'e fó komprensaun klaru kona-ba estrutura legál, responsabilidade institusionál, no importánsia komunikasaun públika atu hasa'e konfiansa sosiedade no transparénsia institusionál.

Iha área parseria no kooperasaun, diskusaun sira enfatiza nesesidade atu hametin relasaun ho parseiru nasionál no internasionál, atu mobiliza rekursu, hasa'e apoiu tékniku, no hametin kapasidade institusionál.

PDHJ kontinua partisipa iha rede rejionál no globál, hodi fahe prátika di'ak no apoia dezvoltamentu polítika direitus umanus iha Timor-Leste. Planu Estratéjiku PDHJ 2024–2028 defini área prioridade lima mak protesaun, fiskalizasaun polítika públika, prevensaun, promosaun, no dezvoltamentu

institusionál, hodi garante protesaun direitu fundamentál no hadi'a governasaun di'ak iha nasaun.

Durante enkontru ne'e, partisipante sira diskute mós prioridade operasionál ba tempu badak, inklui revizaun manuál jestaun keixa no kazu, modernizasaun sistema dijitál, fortalese servisu fiskalizasaun no monitorizasaun, uniformiza materia promosaun direitus umanus, no halo diagnostika ba rekursu institusionál.

Iha área promosaun, rekomenda atu halo mapamentu situasaun sosiál no integra materia direitus umanus iha formasaun instituisaun seguransa hanesan PNTL. Iha parte dezvoltamentu institusionál, diskute nesesidade atu hadi'a jestaun rekursu umanu, sistema monitorizasaun, no utilizasaun teknolójia hodi aumenta efisiénsia servisu.

Iha loron 17 – 19 dezembru 2025, jestaun PDHJ realiza avaliasaun no retiru anuál hodi hatene progresu sira mak konkista ona, dezafiu no obstaklu sira mak enfrenta durante 2025 hodi define estratéjia nune'e kontinua melloria prestasaun PDHJ tuir mandatu legál no konstitusionál.



Foto 3: Provedoria Direitus Umanus no Justisa (PDHJ) organiza retiru loron tolu no avaliasaun anuál iha Railako, Ermera, husi loron 17 to'o 19 dezembru 2025. Atividade ne'e halibur lideransa no pesoál PDHJ hodi halo reflesaun kona-ba dezempeñu institusionál no hametin koordinasaun interna.

Perante **Avaliasaun no Retiru Anuál (ARA) 2025**, komfirma katak, maske PDHJ hetan ona progresu iha implementasaun servisu sira, jestaun institusionál sei infrenta dezafiu prinsipál sira relasiona ho rekursu umanu, alokasaun orsamentu, facilidade operasionál, no sistema jestaun interna, ne'ebé sai nu'udar limitasaun ba implementasaun servisu ho efetivu no sustentável.

Servisu promosaun enfrenta falta facilidade hanesan sound system, laptop no transporte ne'ebé afeta ba implementasaun atividade. Aleinde ne'e,

komunikasaun ho grupu alvu sira seidauk efetivu, ne'ebé kontribui ba nivel partisipasaun menus iha atividade sira, no eleva koñesimentu formador sira mós sai hanesan preokupasaun importante.

Relasiona ho servisu fiskalizaun no monitorizaun, limitaun rekursu umanu no orsamentu halo atividade monitorizaun la bele implementa ho di'ak. Iha nesesidade atu elabora padraun prosedimentu operasionál (SOP) hodi hadi'a sistema relatóriu, reforsa kapasidade funsionáriu sira liu-hosi formasaun teknika, no fornese ekipamentu operasionál hanesan tablet, kamera no atributu servisu iha terrenu. Aleinde ne'e, koordenaun entre delegasaun Territoriál (DT) no nivel nasional presiza reforsa atu garante implementasaun rekomendasaun sira ho efetivu no konsistente.

Servisu asisténsia pública no investigaun, identifika katak prosesu relatóriu ne'ebé kleur, kapasidade investigadór sira ne'ebé presiza eleva, no distribuisaun servisu ne'ebé seidauk tuir funsionáriu sira nia kompeténsia teknika, nu'udar dezafiu importante.

Electronic Case Management System (E-CMS) seidauk funsiona ho efisiénsia, no koordenaun iha distribuisaun notifikasaun no relatóriu ba delegasaun sira seidauk efetivu. Nune'e, presiza formasaun espesífika kona-ba investigaun, mediasaun no konsiliaun, analiza dadus no teknika hakerek relatóriu, nomos definisaun prosedimentu klaru atu regula fluxu informasaun interna hodi garante padraun servisu ne'ebé konsistente.

Infraestrutura no sistema komunikasaun, informasaun no teknolojia mós sai hanesan kestaun prinsipál, ne'ebé envolve komputador ho kapasidade limitadu, koneksaun internét ne'ebé la estável, no hard disk iha server balu ne'ebé la funsiona ona. Kondisaun hirak ne'e afeta diretamente ba qualidade no velocidade servisu administrativa no teknika.

Perante diskusaun hirak ne'e, importante atu harmoniza alokasaun orsamentu ba programa no atividade sira tuir prioridade institusionál, no reforsa sistema kontrolu interna hodi aumenta efisiénsia no responsabilizasaun iha ezekusaun servisu.

Entretantu, liu hosi rezultadu Avaliasaun no Retiru Anuál ne'e mós komfirma katak, importante tebes atu disponibiliza kapasitasaun kontínua ba pesoál sira, reorganiza atribuisaun servisu no halo avaliasaun dezenpenhu pesoál, ho kolokasaun pesoál tuir kompeténsia no nesesidade institusaun.

Paralelamente, esforsu sira mós presiza orienta ba hadi'a infraestrutura no sistema suportu institusionál, inklui hadia infraestrutura Informasaun, Komunikasaun no Teknolojia (ICT), dezenvolve rede internét iha edifísiu sentrál no delegasaun Territoriál sira, kompleta ekipamentu eletróniku, no dijitaliza prosesu koleksaun dadus no mekanizmu tratamentu keixa.

3. Servisu Inspesaun no Auditoria Interna

Durante tinan 2025, servisu inspesaun interna hala'o servisu prinsipal rua mak hanesan servisu assurance nomos servisu konsultoria.

Iha servisu assurance nian, gabinete inspesaun realiza Cash Opname (Inspesaun no sura osan fiziku) ne'ebé regularmente realiza ba ofisial finansas Delegasaun Territoriál Maliana, Manufahi, RAEOA no Finansas nasionál, nomos realiza Servisu Auditoria Investigativu (Investigative Audit) hasoru funsionáriu PDHJ iha Delegasaun Territoriál balu.

Entretantu relasiona ho servisu konsultoria, gabinete inspesaun hala'o avaliasaun (*assessment*) ba servisu Provedoria Direitus Humanos no Justisa nian ne'ebé atribui ba kada unidade traballu (Direisaun no Delegasaun Territoriál sira); fó assisténsia ba Direisaun Administrasaun no Finansas nomos Delegasaun Territoriál sira konaba kria Cash Book manuál no eletrónika hodi rejista no kontrola osan sira adiantamentu sira hanesan viajen lokál sira, servisu *catering* nomos Fundo de Maneio nian. Fornese pareser ba Provedór konaba Modalidade (tipu) Prosedimentu Aprovizionamentu ba Konstrusaun Edifisiu Foun PDHJ nian; fasilita assisténsia ba Direisaun Promosaun kona-ba uza plataforma *online* JotForm hodi kria Pre-Test no Post-Test ba atividade formasaun Governasaun di'ak ba funsionáriu públiku iha administrasaun Atauro, funsionáriu SECOOP nomos funsionáriu MPIE nian.

Nune'e, relasiona ho servisu hirak ne'e hotu, gabinete inspesaun produz no submete ona relatóriu servisu hitu (7) ba Provedór. Relatóriu sira ne'e mak:

- 1) Relatóriu Assessment ba Servisu Provedoria dos Direitos Humanos e Justica.
- 2) Relatóriu Servisu Auditoria (assurance) ho tipu **Investigative Audit**.
- 3) Relatóriu Servisu Inspesaun (**Cash Opname**) ba finansas Delegasaun Territoriál Maliana.
- 4) Relatóriu Servisu Inspesaun (**Cash Opname**) ba finansas Delegasaun Territoriál Manufahi.
- 5) Relatóriu Servisu Inspesaun (**Cash Opname**) ba finansas Delegasaun Territoriál Baucau.
- 6) Relatóriu Servisu Inspesaun (**Cash Opname**) ba finansas Delegasaun Territoriál Oecusse.
- 7) Relatóriu Servisu Inspesaun (**Cash Opname**) ba finansas PDHJ nasionál.

Abstante hosi progresu hirak ne'e, servisu inspesaun PDHJ hasoru obstaklu sira mak hanesan:

- 🔔 Tarefa servisu ba pesoál GI sira ladun koresponde ho atribuisaun no kompeténsia GI nian iha Dekretu Lei Nu. 31/2016, artigo 12, Organika PDHJ nomos Regulamentu Auditoria Interna nian iha Dekretu Lei Nu. 38/2024.
- 🔔 Atividade auditoria (Assurance) no konsultoria (Consulting) mak kontein iha Planu Operasionál no Planu Asaun Anuál 2025 nian la-aktualiza ho risku mak akontese iha kada Unidade, Direisaun no

Delegasaun Territoriál nia servisu operasionál sira, nune'e difikulta GI fornese servisu *assurance* no *consulting* regularmente ho efisien no efetivu.

- 🔔 Rekursu Humanu iha GI sei menus konhesimentu hodi hala'o servisu *assurance* no *consulting*.
- 🔔 Auditee/Kliente GI nian (parte nebe hetan ona *assessment* hosi GI) tarde implementa rekomendasaun GI, nune'e difikulta GI halo Follow-up Action Plan ka monitorizasaun ba asaun koretivas nomos kontribui ba in-efisiensi, in-efetividade ba mudansa pozitivu ba operasaun organizasaun nian.

Hodi enfrenta obstaklu hirak ne'e, jestaun gabinete inspesaun toma solusaun sira liu hosi halo ona mudansa ba responsabilidade pesoál ida-idak nian (tarefas) tuir papél GI no funsaun auditoria interna nian, liu hosi kolokasaun pesoál ba realiza atividade *consulting* no *assurance* ninian.

Halo *briefing* regular ba pesoál GI antes tun ba terrenu hodi hala'o servisu *consulting* no *assurance* nian. Kontinua fó hanoín ba Provedór Adjunto Boa Governasaun relasiona ho implementasaun rekomendasaun no kontinua observa inklui halo planu ba hare tuir impletansaun rekomedasaun hosi GI.

Purtantu, hodi melloria no/ka asegura servisu hotu iha PDHJ tuir padraun, prosedimentu no norma legál sira, Gabinete Inspesaun rekomenda ba:

- 📖 Gabinete Sekretariu Ezekutivu nomos Diresaun relevante sira hodi implementa asaun 79 nu'udar rekomendasaun hosi Gabinete Inspesaun nian mak rezulta hosi servisu avaliasaun (*assessment*) ba servisu diresaun traballu sira hotu PDHJ nian;
- 📖 Servisu Jestaun Rekursu Humanu nomos Gabinete Koordinasaun Institusionál no Relasaun Publika atu koordena/koopera ho Fundu Dezenvelopeimentu Kapital Humanu (FDCH) hodi fasilita formasaun kona-ba auditoria interna ba pesoál Gabinete Inspesaun nune'e bele dezenvolve ekipa GI nia kompeténsia téknika no professional;
- 📖 Provedór no Provedór Adjuntu sira hamutuk ho Sekretariu Ezekutivu no Servisu Jestaun Rekursu Humanu PDHJ atu aselera re-kolokasaun ba funsionáriu PDHJ ne'ebé termina ona kargu, inklui ofisial sira iha PDHJ nasional nomos Delegasaun Territoriál ne'ebé komete kazu no hetan ona auditoria hosi GI.
- 📖 Provedór no Provedór Adjuntu sira atu haree no aprova *Internal Audit Charter* hodi regula servisu Auditoria Interna nian, inklui Padraun Prosedimentu Operasionál (SOP sigla Inglés red.) sira kona-ba servisu auditoria nian.

Gabinete Inspesaun lidera hosi Cesarino da Silva nu'udar inspector no apoiu hosi Silvino Saldanha Pereira, Paulina da Costa Caldeira, Casimiro Ferreira Magno, Claudio do Rego, Teresinha da Costa nomos Luis Helio Rangel Pinto.

4. Apoio Jurídiku

Durante 2025, servisu juridiku fornese paraser / opiniaun juridiku hamutuk 158. Hosi paraser hirak ne'e, maioria ba Provedór, diresaun traballu sira, Provedór Adjuntu nomos ba Provedóra Adjunta, inklui ba entidade seluk, relasiona ho relatóriu temátiku sira hosi diresaun traballu sira, materia apresentasaun / meet the press / political statement, jestaun finanseira, jestaun kontratu no jestaun patrimoni, nomos asuntu sira seluk.

Servisu juridiku PDHJ divulga ona leislasaun ba funsionáriu sira PDHJ nian iha edifisiu sentral nomos delegasaun Territoriál sira, relasiona ho:

- 1) Mandatu Provedór Direitus Humanus no Justisa,
- 2) Decreto-Lei n.º 43/2011 de 21 setembro kona-ba Regime Jurídico uza forsa,
- 3) Dekretu lei kona-ba eviksaun no regime aprovisionamentu;
- 4) Decreto-Lei n.º 43/2011 de 21 setembro kona-ba Regime Jurídico uza forsa;
- 5) Dekretu lei kona-ba eviksaun no regime aprovisionamentu; Decreto-Lei n.º 43/2011 de 21 setembro kona-ba Regime Jurídico uza forsa;
- 6) Dekretu lei kona-ba eviksaun no regime aprovisionamentu ba funsionáriu PDHJ hamutuk 94
- 7) Decreto-Lei n.º 43/2011 de 21 setembro kona-ba Regime Jurídico uza forsa
- 8) Dekretu lei kona-ba eviksaun no regime aprovisionamentu;

5. Apoio Adminsitrativa

Durante tinan 2025, servisu asisténsia juridika, administrativa no peskiza finaliza ona padraun prosedimentu operasionál mata - dalan peskiza no manuál prinsípiu governasaun di'ak. Enkuantu manuál jestaun kazu, no hakat - hakat fiskalizasaun no monitorizasaun iha hela prosesu diskusaun.

6. Apresentasaun Relatóriu 2024 ba Parlamentu Nasionál

Nu'udar kumprimentu ba artigu 11, 34 no 46 hosi Lei número 7/2004, 26 de maio, ne'ebé fó obrigasaun ba Provedór Direitus Humanus no Justisa atu apresenta relatóriu atividade no relatóriu finanseira tinan-tinan ba Parlamentu Nasionál.



Foto 4: Parlamentu Nasionál liu husi reuniaun plenária ordinária, iha loron 8 fulan jullu tinan 2025, Deputadu sira halo apresiasaun ba relatóriu anuál Provedoria Direitus Humanus no Justisa (PDHJ) tinan 2024.

Nune'e, iha loron 08 jullu 2025 Provedór Direitus Humanus no Justisa, Virgilio da Silva Guterres "Lamukan" akompaña hosi Provedór Adjuntu Boa Governasaun Rigoberto Monteiro, nomos Provedóra Adjunta Direitus Umanus Maria Marília Ximenes Castro de Oliveira da Costa, Xefe Gabinete, Inspertór, Sekretariu Ezekutivu nomos Kargu Diresaun no Xefia sira PDHJ nian apresenta ona relatóriu atividade no relatóriu finanseira 2024 ba Parlamentu Nasionál hodi hetan apresiasaun liu-hosi reuniaun plenária ordinária mak lidera hosi Vise-Prezidente Parlamentu Nasionál, Alexandrino Afonso Nunes.

Liu hosi plenaria ne'e, Deputadu sira apresia servisu PDHJ nian, ne'ebé husu PDHJ atu nafatin hala'o funsaun sira tuir mandatu konstitusionál no legál ho integridade, imparcial, professional nomos transparente hodi fó hanoín ba orgaun estado nian sira oinsa halo política publika ne'ebé ho respeito ba direitus umanus, nomos promove governasaun di'ak.

Iha tempu mak hanesan, Deputadu sira koloka mós kestaun sira relasiona ho alterasaun orsamentu hosi categoria ida ba categoria seluk, nune'e mós hosi programa ida ba programa seluk. Parlamentu Nasionál husu ba PDHJ atu sai ezemplar iha implementasaun prinsípiu sira governasaun di'ak nina, inklui asegura prinsípiu *orçamento por programa*.

Entretantu, keixa sira iha PDHJ ne'ebé ladauk fináliza nia prosesu investigasaun, efeitu hosi investigasaun mak PDHJ hala'o ona, dadur sira iha prizaun ne'ebé menus informasaun kona-ba sira nia pena, nomos pozisaun PDHJ nian ne'ebé ladun apoiu desizaun estado nian relasiona ho estradisaun ba sidadaun Filipina, Arnolfo Teves Jr. iha loron 28 maiu 2025, nu'udar mós preokupasaun hosi deputadu sira iha plenaria ne'e.

Hatetuk ba apresiasaun no preokupasaun hosi na'i no lou deputadu sira, Provedór akresenta, Provedór Direitus Humanus no Justisa kontinua dezempeña nia knar tuir tramites konstituisaun ho independensia no imparcialidade iha kontestu promove governasaun di'ak nomos protesaun direitus umanus.

Provedór esklaresa, PDHJ simu keixa, halo avaliasaun ba keixa hirak ne'e hodi define mekanizmu ba solusiona. La'os keixa hotu-hotu PDHJ investiga, PDHJ investiga ka halo deit mediasaun ba kazu sira ne'ebé tama ba PDHJ nia kompeténsia, enkuantu seluk, PDHJ haruka ba entidade competente sira.

Provedór subliña, PDHJ laiha poder hola desizaun, PDHJ iha deit kompeténsia atu investiga no hato'o rekomendasaun ba entidade competente sira hodi hola medida sira. Purtantu iha prosesu implementasaun rekomendasaun PDHJ hasoru dezafiu boot, maibé PDHJ kontinua aproxima oinsa bele asegura estadu direitu demokratiku, nomos preve injustisa iha ita nia rai.

Relasiona ho estradisaun ba sidadaun estranjéiru ne'ebé tama iha RDTL, PDHJ salienta, Konstituisaun bandu atu RDTL estradita sidadaun ida bainhira efeitu hosi estradisaun ne'e pena perpetua ka pena morte. Enkuantu relasiona ho Arnolfu Teves Jr. PDHJ komunika ona ho Instituisaun Nasionál Direitus Umanus Filipina, oras ne'e sira revoga ona pena morte no pena perpetua. Entaun desizaun estradisaun ne'e la viola direitus umanus, maibé viola governasaun di'ak. Tanbá Konstituisaun RDTL mak hatete, desizaun ba estradisaun ne'e tenke mai hosi tribunál, la'os desizaun administrativa ka polítika.



Foto 5: Provedór Adjuntu Boa Governasaun **Rigoberto Monteiro** hatan ba preokupasaun Deputadu sira nian relasiona ho alterasaun orsamentu entre programa nomós entre kategoria orsamental, **Video Parlamentu Nasionál**.

PDHJ halo fiskalizasaun no verikasaun konstitusionálide sira kauza hosi lejislasaun no polítika publika sira ne'ebé la justu, iha tendensia diskriminativu no Desigual.

Purtantu, PDHJ apela ba entidade hotu-hotu atu salva guarda estadu direitu demokratiku ne'e liu-hosi hakru'uk ba prinsípiu no garantia sira ne'ebé define iha Konstituisaun RDTL, nune'e proteje sidadaun sira nia direitu hodi hakotu injustisa ne'ebé akontese kauza asaun estadu nian.

Entretantu relasiona ho alterasaun orsamentu, Provedór Adjuntu Boa Governasaun akresenta, PDHJ halo ezersísiu ba orsamentu sira bazea ba regra orsamental, nomos hodi hatan ba nesesidade instituisaun nian. Kuaze kareta no ekipamentu eletroniku sira iha PDHJ akiza iha finan 10 ba kotuk, nune'e labele responde no fasilita servisu operasionál PDHJ nian, liu-liu iha foho.

7. Planu no Orsamentu ba 2026



Foto 6: **Díli, 22 Agostu 2025** – Provedór Direitus Umanus no Justisa, Virgílio da Silva Guterres "Lamukan," hamutuk ho Provedór-Adjuntu Boa Governasaun Rigoberto Monteiro entrega relatóriu fiskalizasaun 2024 ba Primeiru Ministru, hafoin apresentasaun orsamentu PDHJ 2026 ba Komite Revizaun Orsamentu (KRO) iha auditóriu Ministériu Finansas, Aitarak-Laran, Díli.

Iha lora 22 agostu 2026, PDHJ apresenta proposta orsamentu adisionál ba finan 2026 ba Komité Revizaun Orsamentál (KRO) iha salaun auditóriu Ministériu Finansas iha Aitarak-Laran, Díli.

Apresentasaun refere nu'udar faze ida husi preparasaun Orsamentu Jerál Estadu (OJE) ne'ebé Governu liu husi Komité Revizaun Orsamentu hodi verifika alokasaun estratéjiku ba rekursus PDHJ nian ne'ebé foku liu ba atinjimentu komprimisu no objetivu sira ne'ebé deskreve ona iha dokumentu estratéjiku.

PDHJ simu tetu orsamentu inisiál 2026 ne'ebé mak **US\$ 1,925,142.00**, mai husi kategoria orsamentu:

- 1) Saláriu no Vensimentu US\$ 1,402,463.00 (73%) no
- 2) Bens no Servisu Korrente US\$ 522,679.00 (27%).

PDHJ konsidera katak, tetu orsamentu refere la sufisiente hodi finansia despeza sira, relasiona ho nesesidade operasionál nomos servisu regular PDHJ nian liu-liu servisu supervizaun polítika públika, promosaun, protesaun no prevensaun violasaun direitus umanus no governasaun di'ak iha Timor-Leste.

Nune'e, PDHJ propoin proposta adisionál ho montante **US\$ 540.000,00** representa kategoria;

- 1) Saláriu no Vensimentu US\$ 40,000.00,
- 2) Bens no Servisu US\$ 247.000,00, no
- 3) Kapital Menor US\$253.000,00.

Hafoin diskusaun no apresentasaun, ikus mai KRO aprova orsamentu adisionál ba PDHJ ho montante US\$ 205,056.00 representa 38% husi proposta adisionál ne'ebé PDHJ apresenta.

Proposta adisionál ne'ebé aprova mai husi:

- o Redusaun ba Sálariu no Vensimentu ho montante (\$127,657.00),
- o Aumentu iha kategoria Bens no Servisu Korente ho montante US\$ \$152,713.00 nomos
- o Aumentu iha Kapital Menor ho montante US\$ \$180,000.00.

Nune'e alokasaun Orsamentu finál PDHJ ba tinan 2026 aprovadu ho montante **US\$2,130,198.00**.



Foto 7: Provedoria Direitus Umanus no Justisa (PDHJ) foin lalais ne'e hala'o audiénsia públika produtiva ida ho Parlamentu Nasionál nia Komisaun A kona-ba nia proposta Orsamentu Jerál Estadu ba tinan 2026.

Entretantu, PDHJ lideradu husi Provedór-Adjuntu Rigoberto Monteiro hamutuk ho kargu diresaun no xefia, inklui tekniku espesializadu sira PDHJ nian, hatan konvite hosi Parlamentu Nasionál Komisaun A, hodi apresenta orsamentu PDHJ nian ba tinan 2026.

Enkontru refere hala'o iha Salaun Komisaun A Parlamentu Nasionál iha loron 22 outubru 2025. Iha okaziaun refere, PDHJ apresenta planu no programa ne'ebé prevé ba orsamentu tinan 2026 inklui mós progresu servisu husi trimestre I to'o III iha tinan 2025.

Aleinde ne'e, PDHJ apresenta pedidu adisionál relasiona ho arendamentu edifísiu ba tinan 2026. Pedidu ne'e fundamenta ho desizaun husi Konsellu dministrasaun Fundu Infraestrutura (KAFI) ne'ebé autoriza ka kontinua konstrusaun edifísiu foun ba PDHJ.

Iha debate espesialidade OJE 2026, Parlamentu Nasionál (PN) liu husi Komisaun A apresenta duni proposta atu Governu aumenta orsamentu ba PDHJ hodi halo arendamentu edifísiu. Nu'udar resposta hosi Governu orsamentu ba arendamentu edifísiu PDHJ ba tinan 2026 sei foti hosi Dotasaun Jerál Estadu 2025 nian.

8. Jestaun Rekursus Umanus

8.1. Selesaun Méritu ba Kargu Diresaun no Xefia PDHJ

Tau konsiderasaun-aas ba prinsípiu profissionalizmu, akuntabilidade no transparénsia, nu'udar parte hosi promove no hametin governasaun di'ak hodi hasa'e konfiansa públiku ba servisu institusionál nian, iha tinan 2025 PDHJ loke konkursu interna ba kargu diresaun no xefia iha Provedoria Direitus Humanus no Justisa (PDHJ).

Konkursu interna ne'e loke ho koordenasaun no serbisu hamutuk ho Comissão da Função Pública (CFP). Inisiativa ida ne'e nu'udar esforsu institusionál atu asegura katak pozisaun lideransa sira iha PDHJ okupa hosi pessoa sira ne'ebé competente, íntegru no iha kapasidade atu kontribui efetivamente ba realizasaun misaun institusionál, nune'e presiza sesiona liu hosi maneira ne'ebé promove prinsípiu méritu, transparénsia no igualdade.

Total vaga 16 mak loke iha konkursu interna refere ba kargu diresaun no xefia sira iha diresaun traballu sira hanesan:

- 1) Sekretáriu Ezekutivu,
- 2) Inspertór,
- 3) Chefe Unidade Asisténsia Jurídika, Administrasaun no Peskiza,
- 4) Diretór/a Promosaun,
- 5) Diretór/a Investigasaun,
- 6) Diretór/a Jestaun Rekursu Umanu,

- 7) Diretór/a Fiskalizasaun no Rekomendasaun,
- 8) Diretór/a Asisténsia Públika,
- 9) Diretór/a Administrasaun no Finansas,
- 10) Diretór/a Delegasaun Territoriál Same;
- 11) Diretór/a Delegasaun Territoriál RAEOA;
- 12) Diretór/a Delegasaun Territoriál Maliana;
- 13) Diretór/a Delegasaun Territoriál Baucau;
- 14) Chefe Departamentu Aprovizionamentu,
- 15) Chefe Departamentu Finansas, no
- 16) Chefe Departamentu Lojístika no Teknolojia Informatika.

Durante períodu submisaun dokumentu, PDHJ simu aplikasaun hamutuk 160 hosi kandidatu sira, no ema 99 mak passa ba prova eskrita, no 23 mak klasifika hodi kontinua ba prova orál (entrevista).



Foto 8: Ekipa Juri apoiu hosi servisu rekutamentu CFP halo vizilansia ba partisipante konkursu internu kargu diresaun no xefia PDHJ ne'ebé hala'o hela prova eskrita iha salaun CFP

Etapa entrevista ka prova orál ne'e foku ba avalia kapasidade lideransa, kompeténsia téknika no abilidade komunikasaun hosi kandidatu sira. Rezultadu hatudu, vaga ka pozisaun 10 mak onsege prienxe ona liu-hosi prosesu selesaun ida ne'e, ne'ebé:

- 1) **Ambrosio Graciano Soares** nu'udar Sekretáriu Ezekutivu;
- 2) **Cesarino da Silva** nu'udar Inspertór do Gabinete da Inspeção;
- 3) **Terezinha Ximenes** nu'udar Chefe Unidade Assisténsia Jurídika, Administrasaun no Peskiza;
- 4) **Joanita Silveira da Costa** nu'udar Diretóra Nasionál Promosaun;
- 5) **Filomena Maria de Fátima Dias** nu'udar Diretóra Nasionál Fiskalizasaun no Rekomendasaun;

- 6) **Dirce Maria Fernandes Xavier** nu'udar Diretóra Nasionál Assisténsia Públíka;
- 7) **José Maria de Assis Gonçalves** nu'udar Diretór Nasionál Administrasaun no Finansas;
- 8) **Eliseu Lopes de Araújo** nu'udar Diretór Delegasaun Territoriál Maliana;
- 9) **Edilson Marçal Fátima de Almeida** nu'udar Chefe Departamentu Aprovizionamentu; no
- 10) **Apolinário Afonso** nu'udar Chefe Departamentu Lojístika no Teknolojia Informatika.

Enkuantu, pozisaun 6 seluk ne'ebé seidauk prienxe mak:

- 1) Diretór/a Investigasaun;
- 2) Diretór/a Jestaun Rekursu Umanu;
- 3) Diretór/a Delegasaun Territoriál Same;
- 4) Diretór/a Delegasaun Territoriál RAEOA;
- 5) Diretór/a Delegasaun Territoriál Baucau, no
- 6) Chefe Departamentu Finansas



Foto 9: Funsionáriu na'in sanulu oficialmente simu pose hodi asume knaar lideransa iha Provedoria Direitus Umanus no Justisa (PDHJ), *Dili, 1 agostu 2025.*

Jestaun PDHJ promote sei loke fali mekanizmu hanesan hodi hetan ema kompetente ba assume pozisaun sira ne'e.

Entretantu serimónia tomada de posse ba kandidatu na'in 10 ne'ebé selesionadu hala'o iha loron 01 Agostu 2025, iha salaun Konferénsia Centro

Nacional Chega! Balide, ho partisipasaun hosi lideransa institusionál no entidade relevante sira, nu'udar marka importante ida iha prosesu konsolidasaun kapacidade lideransa institusionál PDHJ.

Iha serimonia posse ba kargu diresaun no xefia PDHJ 10 ne'e, intervensaun hosi PDHJ no CFP reforsa importánsia lideransa responsavel, profesionalizmu, no aplikasaun prinsípiu méritu hanesan fundamentu prinsipál ba hametin governasaun di'ak no aumenta konfiansa públiku ba instituisaun estadu.

Komisária **Anita Tavares Oliveira de Jesus**, hosi Comissão da Função Pública (CFP) destaka prosesu rekrutamentu no promosaun tenke hala'o liu-hosi konkursu bazeia ba méritu, tuir Artigu 12 hosi Dekretu-Lei Nú. 27/2008, tanbá sistema méritu nu'udar elementu esensiál atu harii konfiansa públiku iha transparénsia no justisa hosi prosesu selesaun funsionáriu públiku.

Iha fatin mak hanesan, Provedór **Virgílio da Silva Guterres "Lamukan"** subliña katak serimónia ida-ne'e marka momentu importante ba institusaun, tanbá reafirma PDHJ nia kompromisu atu proteje sidadaun sira nia direitu no garante reparasaun bainhira iha violasaun hosi instituisaun públika.

Nia enfatiza katak pozisaun lideransa sira la'ós priviléjiu, maibé responsabilidade atu serbisu ho dedikasaun hodi hadi'a prestasaun atendentu públiku.

8.2. Rekrutamentu ba Pontu Vogál PDHJ

Aleinde loke konkursu ba kargu diresaun no xefia PDHJ, jestaun mós rekruta Ajente Administrasaun Públika (AAP) vaga 13, kompostu hosi:

- 1) Tékniku Profisional Grau C – Simu Keixa no Promosaun, ho total vaga neen (6);
- 2) Tékniku Profisional Grau D – Fiskalizasaun no Rekomendasaun, ho total vaga neen (6);
- 3) Tékniku Profisional Grau D – Administrasaun no Finansas, ho total vaga ida (1).


Ajente Administrasaun Publika hirake ne'e sei destaka ba munisípiu sira mak hanesan, Aileu ema na'in rua, Ainaro ema na'in rua, Covalima ema na'in rua, Bobonaro ema na'in ida, Baucau ema na'in ida, Viqueque ema na'in rua, Lautem ema na'in rua nomos Região Administrativa Especial Oecusse (RAEOA) – ema na'in ida ba apoiu administrasaun no finansas.

Prosesu rekrutamentu ne'e, realiza nu'udar mós demanda hosi Planu Estratéjiku PDHJ 2024 - 2028 ne'ebé hatuur ona iha Planu Asaun Anuál tinan 2025 Diresaun Gestaun Rekursu Umanus nian, ho foku atu estabelese pontu fokal sira iha território nasional hodi hasa'e asesu comunidade nian ba servisu direitus umanus no promosaun governasaun di'ak.

Provedoria Direitos Humanos no Justisa (PDHJ) realiza ho kolaborasaun *Comissão da Função Pública* (CFP), ne'ebé ekipa juri kompostu husi representante sira PDHJ no CFP nian.

Prosesu selesaun hala'o ho konsiderasaun ba prinsípiu transparénsia, imparcialidade no igualdade.


Ema hamutuk 621 mak aplika 38% hosi sira mak feto. Enkuantu ema nain 117 mai admitidu ba prova eskrita, hosi ne'e 56 mak admitidu ba prova orál ka faze entrevista, no ema na'in 13 kompostu hosi feto 4 no mane 9 mak kualifikadu. Dadus detallu hanesan ilustra iha grafiku tuirmai:




Rezultadu hosi konkursu ne'e homologadu hosi Presidente da Comissão da Função Pública, Sr. Agostinho Letêncio de Deus, datada 08 Janeiro 2026.

Purtantu, ajente administrasaun publika hirak ne'e efetiva iha Janeiro 2026, hahu ho induzaun jerál relasiona servisu no mandatu PDHJ nian, fasilita adaptasaun iha edifisiu sentral, no koloka iha deelgasaun Territoriál sira hodi adapta servisu téknika iha terrenu, hafoin mak koloka iha munisípiu idaidak.

8.3. Perfil Forza Traballu PDHJ



Grafiku iha leten apresenta mai ita kona-ba kompozisaun forsa traballu PDHJ iha 2025, tuir estatutu ka termu kontratu, ne'ebé hosi total forsa traballu hamutuk 154 ne'e, 63% mak funsionáriu públiku permanente, 24% mak ajente administrasaun publika, 11% rejime termu sertu, nomos 1% kazuais, enkuantu 2% mak titulares ka kargu polítiku, ho nia klasifikasaun tuir seksu hanesan ilustra iha grafiku tuirmai:




Iha 2025 PDHJ simu despaxu nú. 14946/2025/CFP, 08 Maiu 2025, kona-ba rekizisaun TP/C **Sr. Martinho Pereira** nu'udar kuadru PDHJ ba presta apoiu iha Centru Lojistika Nasionál (CLN), ne'ebé bazeia ba desizaun nú. 6921/2025/PCFP, 08 Maiu 2025, pesoál refere hahu presta nia servisu iha CLN hahu husi 16 Maiu 2025.

Ekuantu iha 01 julu 2025 **Sr. Xisto Constantino Pinheiro** ne'ebé hala'o funsaun nu'udar Oficial Promosaun iha Delegasaun Territoriál Same, destaka ba Instituto Politeknika Betano, Manufahi.

Entretantu iha loron 27 marsu 2025, lutu metan hafalun família boot PDHJ, iha ne'ebé diretór delegasaun Territoriál RAEOA husik is iha Hospital Nacional Guido Valadares Dili hodi hakotu nia jorda moris iha mundu.

Purtantu, hafoin prosesu selesaun méritu ba kargu diresaun no xefia iha PDHJ, **Sr. Cesarino da Silva** ne'ebé antes ne'e servisu iha Ministerio Juventude, Desportu, Arte no Kultura (MJDAC) kualifikadu no klasifikadu hodi asumi fali kargu iha PDHJ hanesan Inspertór, nune'e mós **Eliseu Lopes de Araujo** ne'ebé antes ne'e hala'o kanar iha Ministériu Admistrasaun Estatal Munisípiu Bobonaro kualifikadu no klasifikadu hodi asumi kargu nu'udar Diretór Delegasaun Territoriál Maliana, ne'ebé efetiva iha 01 Agostu 2025, bazeia ba desizaun nu. 7072/CFP, 28 Julu 2025.

Dinámika normal no moruk hirak ne'e afeta ba kompozisaun forsa traballu iha PDHJ, hanesan ilustra iha grafiku tuirmai:



Nune'e, to'o 2025 nia rohan PDHJ iha forsa traballu hamutuk 151 ho klasifikasaun tuir seksu hanesan ilustra iha tabela tuirmai:


Eskalaun / Modalidade Kontratual	Seksu		
	F	M	Seluk
Funsionáriu Públiku Permanente	43	50	-
Ajente Administrasaun Públika	11	26	-

Eskalaun / Modalidade Kontratual	Seksu		
	F	M	Seluk
Regime a termo certo	5	12	-
Kazuais	-	-	1
Titulares / Kargu Politiku	1	2	-
TOTAL	60	90	1

Entretantu, kompozisaun funsionáriu públiku permanente iha PDHJ ne'ebé klasifika bazeia ba eskalaun nomos kategoria ka grau hanesan ilustra iha tabela tuirmai:

Eskalaun / Modalidade Kontratual	Categoria/Grau						
	PS-A	A	B	C	D	E	F
Escalão 1º	-	2	7	10	6	3	3
Escalão 2º	1	-	6	8	9	-	-
Escalão 3º	-	2	9	7	7	2	1
Escalão 5º	-	-	-	4	1	-	-
Escalão 6º	-	-	-	3	2	-	-
TOTAL	1	4	22	32	25	5	4

Enkuantu kompozisaun ajente administrasaun sira iha PDHJ ne'ebé klasifika ba kategoria ka grau mak ilustra iha grafiku tuirmai ne'e:



Nune'e mós klasifikasaun seksu ba pesoál sira ho modalidade kontratu termu sertu, kazuais nomos titulares / kargu politiku hanesan ilustra iha tabela tuirmai:

Eskalaun / Modalidade Kontratual	Seksu		
	F	M	Seluk
Regime termo certo	5	12	-
Kazuais	-	-	1
Titulares / Kargu Politiku	1	2	-
TOTAL	6	14	1

8.4. Servisu Peskiza no Estájiu

Durante tinan 2025, ema 48 kompostu hosi Feto 27 no Mane 21 hosi univesrisade no sentru formasaun naun formal 15 mak halo peskiza no estajiaru iha PDHJ hodi foti dadus no/ka aprende hahalok administrasaun públiku no buka esperiensa servisu.

Hosi estudante 48, universitariu 17 kompostu hosi feto 8 no mane 9 mak hala'o peskiza iha PDHJ hodi foti dadus ba hakerek monografia iha universidade Nasionál Timor Leste (UNTL), Universidade Bina Nusantara (BINUS) Yogyakarta Indonesia, Dili Institute Technologia (DIT), Universidade de Dili (UNDIL), Institute of Bussiness (IOB) nomos Universidade da Paz (UNPAZ).

Enkuantu estudante 31 kompostu hosi feto 19 no mane 12 mak hala'o estájiu iha PDHJ entre fulan rua to'o tolu hodi aprende servisu adminsitrasaun publika iha PDHJ. Estudante sira ne'e mai hosi Asosiasaun Hari Futuru Nabilan ba Timor (AHFNT), Dili Institute Technologia (DIT), Instituto profesionál de Canossa (IPDC), Knuá Buka Hatene (KBH), Centro Formasaun Professional - Dom Bosco Comoro, Grace for Development Timor Leste (GFDTL), Comoro Child & Youth Center (CCYC), Cannosa Youth Training center Atauro, nomos Universidade nasionál Timor Leste (UNTL).

9. Formasaun no Kapasitasaun Rekursu Umanu

Durante finan 2025, Provedoria Direitus Humanus no Justisa (PDHJ) hala'o



Foto 10: Foto hamutuk hafoin konklui workshop kona-ba Hametin Monitorizasaun CRPD, hodi avansa direitu ema ho defisiénsia sira nian, ne'ebé hala'o durante loron 29-30 setembru 2025, apoiu hosi Projektu Konjuntu ONU nian "Empower for Inclusion" ho kolaborasaun

formasaun, induzaun hodi sensibiliza no/ka hasa'e koñesimentu funsionáriu sira nune'e bele tulun melloria prestasaun servisu tuir prinsípiu sira direitus umanus no governasaun di'ak nian.

Formasaun sira ne'e hala'o iha Timor-Leste relasiona ho téknika ASEAN *note taking* no elaborasaun relatóriu, ne'ebé fó kapasidade ba funsionáriu sira atu dokumenta atividade institusionál ho sistemátika no padraun profisionál. Aleinde ne'e, funsionáriu sira mós hetan formasaun kona-ba investigasaun, espesifikamente kona-ba tratamentu *unreasonable complaint conduct* hodi halo jestaun keixa no investiga kazu sira ho efisiénsia no objetividade.

PDHJ mós hasa'e komprensaun funsionáriu sira kona-ba implementasaun Konvensaun Internasionál Direitu Ema ho Defisiénsia (CRPD) hodi asegura katak servisu institusionál ne'ebé presta konsidera prinsípiu inkluziun no asesibilidade ba ema hotu, inklui ema ho defisiénsia.

Funsionáriu PDHJ mós partisipa iha formasaun kona-ba lideransa efetivu, komunikasaun organizasionál no jestaun ekipa mak hala'o iha Institutu Nacional da Administração Pública (INAP).

Servisu jestaun rekursu umanu PDHJ mós organiza formasaun lingua jestuál ba funsionáriu sira iha PDHJ hodi tulun no/ka promove komunikasaun inkluzivu ho ema ho defisiénsia auditivu. Formasaun ne'e aliña ho Timor-Leste nia Planu Asaun Nasionál ba Ema ho Defisiénsia (2021–2030), reforsa liu tan ho PDHJ nia mandatu atu promove no proteje sidadaun hotu-hotu nia direitu, inklui ema ho defisiénsia.

PDHJ fiar katak ema hotu-hotu merese atu rona no komprende comunidade auditivu sira, tanbá direitos umanus ne'e ba ema hotu! Hamutuk hakat ba Timor-Leste ida ne'ebé inkluzivu no asesivel liu.



Foto 11: tekniku professional lian jestuál PDHJ Sra. Luciana do Nascimento Dias fasilita hela formasaun lian jestuál ba funsionáriu sira iha PDHJ datda 17 febreiru 2025.

Nu'udar programa hosi *South East Asian Ombudsman Forum (SEAOF)*, funsionáriu sira PDHJ nian partisipa iha formasaun via online kona-ba *complaint management, leadership skills, no investigation skills*.

Aleinde ne'e, PDHJ organiza induzaun interna kona-ba rejime promosaun antiguidade ba pesoál sira iha PDHJ hodi aumenta funsionáriu sira nia komprensaun kona-ba direitu no prosedimentu relasiona ho dezvoltamentu karreira tuir mekanizmu administrasaun publika nian.

Instituisaun mós promove sesaun *in-house sharing* kona-ba esperiênsia hosi programa internasionál hanesan *International Visitor Leadership Program (IVLP)* iha Washington no *International Law Enforcement Academy (ILEA)* iha Bangkok, ne'ebé permite transferênsia koñesimentu hosi nivel internasionál ba nivel institusionál.

Atividade formasaun no diseminaun hirak ne'e bele kontribui direta ba fortalecimento koñesimentu rekursu umanu PDHJ, promove kultura aprendizajen kontinua no profesionálizasaun rekursu umanu, tulun pesoál sira iha implementasaun mandatu institusionál.

Iha 2025, funsionáriu nain tolu hosi PDHJ, **Sra. Aurelia Guterres Martins Babo, Sra. Evalisa dos Reis Alves no Sra. Margarida Francisca José Maria dos Santos** selesionadu hodi partisipa iha programa *New Zealand English Language Training for Officials (NZELTO)* Edisaun 60 ho tema governasaun di'ak, durante fulan tolu entre 20 febreiru - 23 maiu 2025 iha Nova Zelandia.

10. Jestaun Finanseira, Adminitrasaun no Lojístika

Hodi orienta implementasaun programa governamentál no garante kontinuidade servisu públiku iha territóriu nasionál, Parlamentu Nasionál hasai Lei N.º 8/2024, lora 26 Novembru, kona-ba *Orçamento Geral do Estado* (OGE) ba tinan 2025, nu'udar instrumentu polítika fiskál prinsipál Estadu nian.

Lei refere aprova orsamentu hamutuk **US\$ 2.617.170.234,00 (Dólares Amerikanu biliaun rua, miliaun atus neen sanulu - resin - hitu, rihun atus ida, hitu - nulu, atus rua, tolu - nulu - resin - haat)**, ne'ebé refleto kompromisu polítiku Governu atu promove desenvolvimentu sustentável, haforsa inklusaun sosiál no mellora qualidade servisu públiku ba sidadaun sira liu hosi alokasaun rekursu ba setór estratéjiku sira.

Implementasaun OGE 2025, tuir orientasaun Lei refere, representa mekanizmu importante ida atu hametin estabilidade fiskál no promove desenvolvimentu ekilibradu iha nivel nasionál, ho enfaze ba monitorizasaun kontínua no transparénsia iha ezekusaun orsamentu atu asegura katak rekursu públiku uza ho efetividade, efisiénsia no responsividade ba nesesidade populasau.

Orsamentu ba Provedoria Direitus Humanus no Justisa (PDHJ) mós nu'udar parte integradu hosi Lei refere³, ne'ebé alokadu hamutuk **US\$ 2.139.368,00 (Dólares Amerikanu miliaun rua, rihun atus ida, tolu - nulu resin sia, atus tolu, neen - nulu - resin - ualu)**.

Montante ne'e distribuídu ba Programa 157: *Direitos Humanos e Boa Governação* no Programa 150: *Funcionamento e Desenvolvimento Institucional*, hodi suporta implementasaun atividade institusionál no garante funsionamentu efetivu PDHJ iha área promosaun no protesau direitus umanus, fiskalizasaun boa governação, no fortalese kapasidade institusionál hanesan ilustra iha tabela tuirmai:

Estrutura Programa	Klasifikasaun Ekonomika			TOTAL
	501: Salários e Vencimentos	502: Bens e Serviços Correntes	504: Capital Menor	
Programa 157: Direitos Humanos e Boa Governação	-	272.155	-	272.155
Programa 150: Funcionamento e Desenvolvimento Institucional	1.402.463	424.750	40.000	1.867.213
TOTAL	1.402.463	696.905	40.000	2.139.368

3 Aneksu Tabela V kona-ba Despesa do Subsetor da Administração Central, por classificação orgânica, económica e estruturada por programas (página 19)

Rezultadu husi programa/atividade sira esplika ona iha parte anteriór, enkuantu iha parte ida-ne'e sei esplika vizaun jerál kona-ba flutuasaun fundu no dinámika ezelesaun orsamentu.

10.1. Prioridade Sira hosi Alokasaun Orsamentu

Hamatan ba alokasaun orsamentu nu'udar ilustra iha tabela leten, komfirma, PDHJ nia orsamentu sira fó prioridade ba fortalese rekursu umanu, suporta atividade operasionál no mobilidade servisu iha território nasional, no investe uitoan ba patrimoniu no lojístiku insituisaun nian hodi hala'o mandatu institusionál ho efisiente no efikaz.

Nune'e iha Categoria **501: Salários e Vencimentos** aloka ba salário funcionáriu no agentes administrasaun publika, no salário ba kontratadu nasional sira, subsídiu transporte no alimentasaun ba funcionáriu no agente adminsitrasaun públiku sira, no dêsimo terseiru, hanesan ilustra iha tabela tuirmai:

501: Salários e Vencimentos	1.402.463,00
5010101: Salário de Titulares de Cargos Políticos	69.300,00
5010103: Salário de Titulares de Cargos de Direção e Chefia	78.372,00
5010104: Salário de Funcionários e Agentes	542.864,00
5010105: Salário de Contratados Nacionais	286.078,00
5010109: Abono Para Despesas de Representação	58.050,00
5010110: Décimo Terceiro Mês	68.345,00
5010111: Outros Abonos Regulares e Permanentes	104.854,00
5010201: Horas Extraordinárias	5.000,00
5010205: Subsídiu Mensal de Transporte	60.900,00
5010209: Housing Allowance	15.600,00
5010210: Subsídiu de Alimentação	86.400,00
5010212: Outros Abonos Variáveis ou Eventuais	26.700,00

Enkuantu iha **Kategoria 502: Bens e Serviços Correntes**, foku liu ba atividade operasionál no mobilidade servisu institusionál.

Alokasaun despeza boot liu iha kategoria ida ne'e mak arrendamentu bens imóveis (27%) no ajudas de custo por deslocações em serviço no país (23%). Perioridade ne'e hatudu PDHJ presiza fatin servisu ne'ebé adekuaadu, nomos ilustra natureza servisu PDHJ nian ne'ebé atividade monitorizasaun, fiskalizasaun, promosaun, investigasaun, no jestaun keixa ne'ebé presiza mobilidade aas.

PDHJ kontinua realiza atividade ne'ebé envolve kooperasaun no partisipasaun iha eventu sira iha nível internasionál, nune'e orsamentu iha kategoria ne'e persentajen balu aloka ba transporte internacionais.

Kombustível ba veíkuu sira, servisu profissionais, eletridade, komunikasaun, materiál eskritoriu, publikasaun no impresasaun konsideradu iha kategoria ida ne'e hodi suporta implementasaun programa no atividade institusionál, hanesan ilustra iha tabela tuirmai:

502: Bens e Serviços Correntes	696.905,00
5020301: Fardamento	7.000,00
5020402: Eletricidade	30.000,00
5020901: Materiál de Escritório	17.000,00
5021002: Combustível para Veículos	39.780,00
5021601: Limpeza e Higiene	3.040,00
5021701: Manutenção de veículos	10.300,00
5021706: Manutenção de equipamento de ar condicionado	5.000,00
5021901: Comunicações Fixas	6.000,00
5021902: Comunicações Móveis	31.200,00
5022002: Transportes Internacionais	53.244,00
5022101: Catering	3.000,00
5022401: Ajudas de Custo por Deslocações em Serviço no País	157.860,00
5022402: Ajudas de Custo por Deslocações em Serviço ao Estrangeiro	41.701,00
5022504: Informática	6.500,00
5022507: Outros Serviços Profissionais	75.760,00
5022701: Publicação	5.520,00
5022703: Impressão	18.000,00

502: Bens e Serviços Correntes	696.905,00
5023102: Arrendamento de Bens Imóveis de Média e Curta Duração	186.000,00

Entretantu iha **Kategoria 504: Capital Menor**, foku ba akizisaun veíkulu civis. Prioridade ida ne'e refleta nesesidade atu aumenta kapasidade mobilidade institusionál, liu-liu hodi suporta atividade monitorizasaun no fiskalizasaun, jestaun keixa no investigasaun, nune'e mós promosaun iha munisípiu no área remota.

Maski valor total iha kategoria ida ne'e ladun boot kompara ho kategoria rua seluk, nesesita aseguira instituisaun iha meius patrimoniu no lojístiku sufisiente ba hala'o servisu institusionál ho efisiénsia, hanesan ilustra iha tabela tuirmai:

504: Capital Menor	40.000,00
5040101: Veículos Civis	40.000,00

10.2. Flutusaun no Realokasaun Orsamental

Hamatan ba nesesidades institusionál, durante prosesu ezekeusaun orsamentu ne'e, jestaun halo realokasaun orsamental kuaze **US\$ 161,235.60**, entre no dentru kategoria hodi responde ba nesesidade institusionál, hanesan ilustra iha tabela tuirmai:

Kategoria Orsamentu	Osai Sai	Osai Tama	Diferensa
501: Salários e Vencimentos	(10.000,00)	10.000,00	-
502: Bens e Serviços Correntes	(151.235,60)	79.722,35	(71.513,25)
503: Transferências Públicas	-	775,00	775,00
504: Capital Menor	-	70.738,25	70.738,25
TOTAL	(161.235,60)	161.235,60	-

Tabela iha leten ilustra flutusaun orsamental, ne'ebé iha kategoria salariu no vensimentu akontese alterasaun orsamentu US\$ 10,000.00 hosi sub-rubrika *Outros Abonos Regulares e Permanentes* ba sub-rubrika *Outros Abonos Variáveis ou Eventuais*.

Enkuantu, iha kategoria Bens no Servisu Korrentes akontese alterasaun orsamentu hamutuk US\$ 151,235.60 hosi sub-rubrika:

- 1) Faramentu US\$ 678.00;
- 2) Transportes Internacionais US\$ 858.85;
- 3) Publikasaun US\$ 4,320,00;
- 4) Impresaun US\$ 3,000.00, no

- 5) Arrendamento de Bens Imóveis de Mídia e Curta Duração US\$ 142,378.75.

Hosi montante orsamentu mak altera, kuaze US\$ 79,722.35 mak muda ba sub-rubrika sira iha kategoria Bens no Servisus Korrentes hanesan:

- 1) Catering US\$ 1,486.00
- 2) Ajudas de Custo por Deslocações em Serviço no País US\$ 62,650.85
- 3) Ajudas de Custo por Deslocações em Serviço ao Estrangeiro US\$ 11.396,00;
- 4) Outros Serviços Profissionais US\$ 4.189,50

Entretatantu, kuaze US\$ 71,513.25 ekivale 10% hosi total dotasaun ba kategoria Bens no Servisus Korrentes muda ba:

- 1) Categoria Transferencia Pública ba sub-rubrika *other current transfer* US\$ 775.00;
- 2) Categoria Capital Menor US\$ 70,738.25 ne'ebé fahe ba:
 - a) Veículos Cívicos US\$ 25,000.00
 - b) IT Equipment US\$ 44,138.25
 - c) Communications Equipment US\$ 1,000.00; no
 - d) Other Equipment US\$ 600.00

Kuaze 18% hosi realokasaun orsamentu ne'e, foti hosi sub-rubrika *Arrendamento de Bens Imóveis de Mídia e Curta Duração*. Alterasaun orsamentu iha sub-rubrika refere kuaze 88% hosi dotasaun inisial US\$ 186,000.00 ne'eé atu arenda edificiu provizoriu PDHJ nian, durante halo konstrusaun edificiu foun PDHJ nian iha tinan 2025. Entretantu, iha loron 14 outobru 2024, PDHJ simu karta N.º Ref. 494 / SGP/X/2024 hosi SGP hodi notifika, CAFI hasa'i deliberasaun N. 08/IX/CAFI/2024 hodi kansela **Construction and Supervision of New Building of Provedoria Direitos Humanus no Justisa (PDHJ)**.

Nune'e, reajustamentu orsamentu ne'ebé realiza husi jestaun PDHJ rezulta mudansa iha kompozisaun orsamentu, hanesan ilustra iha tabela tuirmai:

Kategoria Orsamentu	Dotasaun Orijinal	Alterasaun	Dotasaun Final
501: Salários e Vencimentos	1.402.463,00	-	1.402.463,00
502: Bens e Serviços Correntes	696.905,00	(71.513,25)	625.391,75
503: Transferências Públicas	-	775,00	775,00
504: Capital Menor	40.000,00	70.738,25	110.738,25
TOTAL	2.139.368,00	-	2.139.368,00

Purtantu, PDHJ apresenta situasaun no kondisaun edificiu PDHJ atual ba Komitee Revizaun Orsamentu iha âmbito apresentasaun orsamentu tinan 2026, PDHJ hetan resposta di'ak kona-ba prosesu aprovisionamentu ba **Construction and Supervision of New Building of Provedoria Direitos Humanus no Justisa (PDHJ)** sei hahu fali.

Nune'e PDHJ apresenta proposta adisionál ba Parlamentu Nasionál atu aloka verba ruma hodi halo arendamentu edificiu iha tinan 2026 durante prosesu konstrusaun ba edificiu foun.

Hosi alterasaun ne'e, akontese mudansa orsamentu kuaze US\$ 13,410.00 hosi Programa 510: *Funcionamento e Desenvolvimento Institucional* ba programa 157: *Boa Governacao e Direitos Humanos*, nune'e kompozisaun orsamentu iha estrutura programa hanesan ilustra iha tabela tuirmai:

Programa	Dotasaun Inisiál	Alterasaun	Dotasaun Final
Programa 157: Boa Governacao e Direitos Humanos	272.155,00	13.410,00	285.565,00
Programa 510: Funcionamento e Desenvolvimento Institucional	1.867.213,00	(13.410,00)	1.853.803,00
TOTAL	2.139.368,00	-	2.139.368,00

Entretantu, hafoin debate no aprovasaun orsamentu hosi Parlamentu Nasionál, PDHJ hetan transferénsia Orsamentu hosi *Dotação todo Governo* ho montante **US\$ 150.666,66** koloka iha sub-rubrika *Arrendamento de Bens Imóveis de Mídia e Curta Duração*. Nune'e, kompozisaun orsamentu PDHJ iha klasifikasaun ekonómika hanesan ilustra iha tabela tuirmai:

Kategoria Orsamentu	Dotasaun Inisiál	Alterasaun	Dotasaun Final
501: Salários e Vencimentos	1.402.463,00	-	1.402.463,00
502: Bens e Serviços Correntes	696.905,00	79.153,41	776.058,41
503: Transferências Públicas	-	775,00	775,00
504: Capital Menor	40.000,00	70.738,25	110.738,25
TOTAL	2.139.368,00	150.666,66	2.290.034,66

Alterasaun orsamentu ne'e mós afeta ba kompozisaun orsamentu iha estrutura programa hanesan ilustra iha tabela tuirmai:

Programa	Dotasaun Inisiál	Alterasaun	Dotasaun Final
----------	------------------	------------	----------------

Programa 157: Boa Governacao e Direitos Humanos	272.155,00	13.410,00	285.565,00
Programa 510: Funcionamento e Desenvolvimento Institucional	1.867.213,00	137.256,66	2.004.469,66
TOTAL	2.139.368,00	150.666,66	2.290.034,66

10.3. Ezekusaun Orsamentu PDHJ 2025

Flutusaun no realokasaun orsamentu ne'ebé akontese durante período ezeekusaun, refleto esforsu jestaun nian hodi ajusta rekursu finansiera tuir nesidade no prioridade institusionál.

Nune'e, ho ajustamentu hirak ne'e, prosesu ezeekusaun orsamentu kontinua hala'o ho orientasaun ba efisiénsia utilizaun rekursu no garante implementasaun atividade sira tuir planu. Nune'e parte tuirmai sei deskreve kona-ba ezeekusaun orsamentu 2025, ho montante **US\$ 2.290.034,66**.

To'o periodu 2025 nia rohan, PDHJ ezeekuta orsamentu hamutuk **US\$ 2.051.878,72** (Dolares Americano Miliaun Rua, Lima – Nulu – Resin – Ida, Atus Ualu, Hitu – Nulu – Resin – Ualu, Sentavos Hitu – Nulu – Resin - Rua), ekivale 90%, ho nia detallu tuir klasifikasaun ekonomika hanesan ilustra iha tabela tuirmai:

Kategoria Orsamentu	Dotasaun Finál	Ezekusaun	Balansu	%
501: Salários e Vencimentos	1.402.463,00	1.267.298,61	135.164,39	90
502: Bens e Serviços Correntes	776.058,41	679.010,11	97.048,30	87
503: Transferências Públicas	775,00	775,00	-	100
504: Capital Menor	110.738,25	104.795,00	5.943,25	95
GRAND TOTAL	2.290.034,66	2.051.878,72	238.155,94	90

PDHJ nia prioridade despeza finansiera iha tinan 2025 mak rekursu umanu, arrendamentu edifísiu, nomos mobilidade operasionál hanesan deslokasaun servisu iha rai laran no rai liur, akizisaun kareta operasionál, disponibilizasaun materiál eskritóriu, komunikasaun, eletrisidade, impresaun ne'ebé orienta ba garante kontinuidade funsionamentu institusionál ho efikásia no efisiénsia.

Iha Categoria **501: Salários e Vencimentos**, observa katak nivel ezeekusaun atinje 90% hosi dotasaun finál, ne'ebé prioridade hosi despeza ne'e mak pagamentu *Salário de Titulares de Cargos Políticos*, *Salário de Titulares de Cargos de Direção e Chefia* nomos pagamentu ba *Funcionários e Agentes*

no *Contratados Nacionais* hodi asegura funcionamentu no implementasaun programa institusionál, ho nia detallu hanesan ilustra iha tabela tuirmai:

Kategoria / Sub-Rubrika	Dotasaun Finál	Ezekusaun	Balansu	%
501: Salários e Vencimentos	1.402.463,00	1.267.298,61	135.164,39	90
5010101: Salário de Titulares de Cargos Políticos	69.300,00	214.567,00	(145.267,00)	310
5010103: Salário de Titulares de Cargos de Direção e Chefia	78.372,00	166.264,00	(87.892,00)	212
5010104: Salário de Funcionários e Agentes	542.864,00	442.791,90	100.072,10	82
5010105: Salário de Contratados Nacionais	286.078,00	241.307,71	44.770,29	84
5010109: Abono Para Despesas de Representação	58.050,00	-	58.050,00	0
5010110: Décimo Terceiro Mês	68.345,00	-	68.345,00	0
5010111: Outros Abonos Regulares e Permanentes	94.854,00	-	94.854,00	0
5010201: Horas Extraordinárias	5.000,00	1.652,80	3.347,20	33
5010205: Subsídium Mensal de Transporte	60.900,00	53.400,00	7.500,00	88
5010206: Relocation Allowance	-	700,00	(700,00)	#DIV /0!
5010209: Housing Allowance	15.600,00	9.600,00	6.000,00	62

Kategoria / Sub-Rubrika	Dotasaun Final	Ezekusaun	Balansu	%
5010210: Subsídium de Alimentação	86.400,00	77.650,00	8.750,00	90
5010212: Outros Abonos Variáveis ou Eventuais	36.700,00	59.365,20	(22.665,20)	162

Enkuantu, iha kategoria **502: Bens e Serviços Correntes** ezekusaun atinje 87%, prioridade hosi despesa iha kategoria ida ne'e orienta ba kestaun operasionál sira hanesan *combustível para veículos, informática, ajudas de custo por deslocações em serviço no país, transportes internacionais, comunicações fixas, publicação*, ne'ebé indika funsionamentu institucionál PDHJ ejize nesesidade komunikasaun institucionál no disseminasaun informasaun pública, mobilidade no suportu teknolójiku ba implementasaun atividade institucionál, nomos refleta intensividade servisu monitorizasaun, fiskalizasaun, promosaun no protesaun, inklui representasaun institucionál iha nivel nasional no internacional, ho nia detallu hanesan ilustra iha tabela tuirmai:

Kategoria / Sub-Rubrika	Dotasaun Final	Ezekusaun	Balansu	%
502: Bens e Serviços Correntes	776.058,41	679.010,11	97.048,30	87
5020301: Fardamento	6.322,00	6.061,00	261,00	96
5020402: Eletricidade	30.000,00	29.173,92	826,08	97
5020901: Material de Escritório	17.000,00	13.479,50	3.520,50	79
5021002: Combustível para Veículos	39.780,00	39.701,82	78,18	100
5021601: Limpeza e Higiene	3.040,00	1.162,00	1.878,00	38
5021701: Manutenção de veículos	10.300,00	3.675,90	6.624,10	36
5021706: Manutenção de equipamento de ar condicionado	5.000,00	4.062,00	938,00	81

Kategoria / Sub-Rubrika	Dotasaun Finál	Ezekusaun	Balansu	%
5021901: Comunicações Fijas	6.000,00	19.000,94	(13.000,94)	317
5021902: Comunicações Móveis	31.200,00	13.629,78	17.570,22	44
5022002: Transportes Internacionais	52.385,15	52.011,00	374,15	99
5022101: Catering	4.486,00	4.238,00	248,00	94
5022401: Ajudas de Custo por Deslocações em Serviço no País	220.510,85	206.515,00	13.995,85	94
5022402: Ajudas de Custo por Deslocações em Serviço ao Estrangeiro	53.097,00	48.683,90	4.413,10	92
5022504: Informática	6.500,00	6.499,50	0,50	100
5022507: Outros Serviços Profissionais	79.949,50	61.785,90	18.163,60	77
5022701: Publicação	1.200,00	2.956,50	(1.756,50)	246
5022703: Impressão	15.000,00	8.173,45	6.826,55	54
5023102: Arrendamento de Bens Imóveis de Mídia e Curta Duração	194.287,91	158.200,00	36.087,91	81

Entretantu, ba kategoria **503: Transferências Públicas** nia ezekusaun atinje 100%, orsamentu ne'e uza hodi indemniza membru comunidade ida iha Maliana ne'ebé halo to'os iha PDHJ nia rai, nune'e orsamentu refere hodi selu ai-horis ne'ebé nia kuda, nu'udar parte ida hosi komprimentu legál no morál estadu nian, atu respeita no valoriza povu sira ne'ebé uza rai Estadu ba moris, no garante prosesu ba hasai sira ho respeito ba prinsípiu justisa no dignidade humana, ho nia detallu hanesan ilustra iha tabela tuirmai:

Kategoria / Sub-Rubrika	Dotasaun Finál	Ezekusaun	Balansu	%
503: Transferências Públicas	775,00	775,00	-	100
5030331: Other Current Transfer	775,00	775,00	-	100

Purtantu, kategoria **504: Capital Menor**, ezekusaun atinje 95%, despeza iha kategoria ne'e foku akizisaun Veículos Cívís, ekipamentu informatika, ekipamentu komunikasaun nomos ekipamentu operasinal (makina ko'a du'ut) hodi reforsa mobilidade operasionál no modernizasaun sistema informátika, nune'e kontinua fó apoiu ba melloria kapasidade teknika institusaun, ho nia detallu hanesan ilustra iha tabela tuirmai:

Kategoria / Sub-Rubrika	Dotasaun Finál	Ezekusaun	Balansu	%
504: Capital Menor	110.738,25	104.795,00	5.943,25	95
5040101: Veículos Cívís	65.000,00	60.000,00	5.000,00	92
5040103: IT Equipment	44.138,25	44.135,00	3,25	100
5040106: Communications Equipment	1.000,00	260,00	740,00	26
5040112: Other Equipment	600,00	400,00	200,00	67

Ezekusaun orsamentu hirak mak hatudu no/ka deskreve iha leten hosi kategoria to'o nia prioridade espesífiku sira hatan ba programa no sub-programa sira hanesan ilustra iha tabela tuirmai:

Programa	Dotasaun Finál	Ezekusaun	%
Programa 157: Boa Governacao e Direitos Humanos	285.565,00	268.634,65	94%
Programa 510: Funcionamento e Desenvolvimento Institucional	2.004.469,66	1.783.241,07	89%
GRAND TOTAL	2.290.034,66	2.051.875,72	90%

Orsamentu PDHJ alokadu hodi implementa estratéjia servisu lima ne'ebé akumula iha programa rua nu'udar ilustra iha tabela anterior. Estratéjia hirak ne'e mak hosi servisu promosaun, prevensaun, protesaun, supervizaun polítika publika, nomos fortalecimento institucionál.

Nu'udar deskreve iha parte anterior, hafoin Parlamentu Nasionál Aprova Orsamentu Jerál Estadu tinan 2025, durante prosesu ejekusaun jestaun PDHJ halo ajustamentu ka realokasaun orsamentu bazea ba nesesidades institusionál, até hetan aumentu orsamentu hosi *dotação todo governo*. Purtantu, hosi total dotasaun kuaze 20% aloka ba estratégia servisu promosaun, prevensaun, protesau, no supervizaun política publika, enkuantu 80% aloka ba fortalecimento institusionál.

1) Servisu promosaun

Servisu promosaun kobre mídia no publikasaun informasaun, formasaun direitus umanus no governasaun di'ak, disseminasaun informasaun ba públiku kona-ba direitus umanus no governasaun di'ak, nomos partisipa no realiza eventu nasionál no internasionál.

Dotasaun inisiál ba servisu ne'e mak US\$ 176,065.00, enkuantu sofre alterasaun ne'ebé orsamentu iha atividade mídia kuaze US\$ 4,320.00 foti sai tomak, no 1,180.00 foti sai hosi atividade disseminasaun informasaun, aumenta US\$ 4,710.00 ba atividade formasaun, nomos US\$ 11,079.15 ba atividade partisipasaun no realizasaun eventu nasionál no internasionál.

Nune'e dotasaun finál ba servisu promosaun mak US\$ 186,354.15, ezejuta US\$ 179,497,65 ekivale 96%, ho nia detallu hanesan ilustra iha tabela tuirmai:

SERVISU / ATIVIDADES	Dotasaun Inisiál	Iterasaun	Dotasaun Finál	Ezekusaun	%
SERVISU PROMOSAUN	176.065,00	10.289,15	186.354,15	179.487,65	96%
Mídia no publikasaun	4.320,00	(4.320,00)	-	-	#DIV/0!
Formasaun	20.600,00	4.710,00	25.310,00	25.661,00	101%
Disseminasaun	20.000,00	(1.180,00)	18.820,00	19.931,00	106%
Partisipasaun no realizasaun eventu	131.145,00	11.079,15	142.224,15	133.895,65	94%

2) Servisu Prevensaun

Servisu prevensaun ne'e kobre atividade fiskalizasaun no monitorizasaun regular nomos urjente. Dotasaun inisiál ba estratégia ida ne'e mak US\$ 37,720.00, durante ezejutaun iha ajustamentu ne'ebé aumentu ba atividade fiskalizasaun urjente US\$ 2,020.00, nomos fiskalizasaun regular

hamutuk US\$ 448.00, nune'e dotasaun finál ba servisu refere mak US\$ 40,188.00, ezekuta US\$ 35,535.00 ekivale 88%, nia detallu nu'udar hatudu iha tabela tuirmai:

SERVISUS / ATIVIDADES	Dotasaun Inisiál	Alterasaun	Dotasaun Finál	Ezekusaun	%
SERVISU PREVENSAUN	37.720,00	2.468,00	40.188,00	35.535,00	88%
<i>Urgent Issue Monitoring</i>	5.920,00	2.020,00	7.940,00	8.315,00	105%
<i>Monitoring management</i>	31.800,00	448,00	32.248,00	27.220,00	84%

3) Servisu Protesaun

Servisu protesau ne'e kobre atividade jestaun keixa, jestaun kazu, halo investigasaun, mediasaun no konsiliaun, nomos haree tur rekomendasaun. Dotasaun inisiál ba servisu ida ne'e mak US\$ 47,230.00, durante prosesu ezekusaun iha ajustamentu ne'ebé aumenta US\$ 892,85 ba atividade jestaun keixa, US\$ 1,780.00 ba atividade jestaun kazu no investigasaun, nomos US\$ 2,160.00 ba atividade mediasaun no konsiliaun. Nune'e dotasaun finál ba servisu protesau mak US\$ 52,062.85, ezekuta US\$ 46,652.00 ekivale 90%, detallu nu'udar ilustra iha tabela tuirmai:

SERVISUS / ATIVIDADES	Dotasaun Inisiál	Alterasaun	Dotasaun Finál	Ezekusaun	%
SERVISU PROTESAUN	47.230,00	4.832,85	52.062,85	46.652,00	90%
Complaint Management	12.200,00	892,85	13.092,85	12.168,00	93%
Case management and investigation	27.010,00	1.780,00	28.790,00	25.308,00	88%
Mídiation and conciliation in specific cases	3.600,00	2.160,00	5.760,00	4.756,00	83%
Monitoring the implementation of the recommendation	4.420,00	-	4.420,00	4.420,00	100%

4) Servisu Supervizaun Polítika Publika

Estratêjia servisu supervizaun polítika públika kobre atividade advokasia, estudu no peskiza, ne'ebé nia orsamentu inisiál mak US\$ 11,140.00, iha prosesu ezelesaun altera ka hasai US\$ 4,180.00 ne'ebé dotasaun finál ba atividade ne'e mak US\$ 6,960.00 no to'o fin 2025, osan ne'e zekuta 100%, hanesan hatudu iha tabela ne'e:

SERVISUS / ATIVIDADES	Dotasaun Inisiál	Alterasaun	Dotasaun Finál	Ezekusaun	%
Advocacy, Studies and Research	11.140,00	(4.180,00)	6.960,00	6.960,00	100%

5) Fortalesimentu Institusionál

Fortalesimentu institusionál nu'udar estratêjia servisu operasionál ne'ebé tulun kapasidade instituisaun dezenvolve no funsiona ho di'ak. Nune'e atividade sira ne'ebé inklui iha estratêjia ne'e mak planeamentu no dezenvolvimentu estratéjiku, apoiu juridiku, inspesaun no auditoria, jestaun finanseira, lojistika, planeamentu, monitorizasaun no avaliasaun, jestaun rekursus umanus, kapsitasaun rekursus umanus, jestaun kontratu no aprovizionamentu, nomos kooperasaun no parseria.

Dotasaun inisiál ba servisu ne'e mak US\$ 1,867,213.00 kuaze 88% hosi total dotasaun ba PDHJ. Iha prosesu ezelesaun iha aumentu orsamentu ba atividade planeamentu no orientasaun estratéjiku US\$ 1,486.00, jestaun finanseira no lojistika US\$ 13,815.00, planeamentu, monitorizasaun no avaliasaun US\$ 32,746.00, jestatun rekursus umanus US\$ 10,183.50, nomos jestaun kontratu no aprovizionamentu US\$ 79,026.16, nune'e dotasaun finál ba servisu fortalesimentu institusionál mak US\$ 2,004,469.66 ezelekuta US\$ 1,783,241.07 ekivale 89%, hanesan ilustra iha tabela tuirmai:

SERVISUS / ATIVIDADES	Dotasaun Inisiál	Alterasaun	Dotasaun Finál	Ezekusaun	%
	1.867.213,00	137.256,66	2.004.469,66	1.783.241,07	89%
Planning, strategic development and policy guidance	5.240,00	1.486,00	6.726,00	6.338,00	94%
Legál supports	1.440,00	-	1.440,00	1.440,00	100%

SERVISUS / ATIVIDADES	Dotasaun Inisiál	Alterasaun	Dotasaun Finál	Ezekusaun	%
	1.867.213,00	137.256,66	2.004.469,66	1.783.241,07	89%
Inspection, supervision and audit	6.720,00	-	6.720,00	6.060,00	90%
Financial management, Administration and Logistics	99.070,00	13.815,00	112.885,00	102.198,37	91%
Planning, monitoring and statistics	5.860,00	32.746,00	38.606,00	29.619,00	77%
Human Resource Management	1.404.963,00	10.183,50	1.415.146,50	1.274.284,11	90%
HR training and development	4.900,00	-	4.900,00	4.350,00	89%
Procurement and contract management	331.440,00	79.026,16	410.466,16	352.452,09	86%
ICT management	6.500,00	-	6.500,00	6.499,50	100%
Cooperation and partnerships	1.080,00	-	1.080,00	-	0%

Nu'udar deskritu iha tabela sira anterior relaciona ho ezekeusaun orsamentu tuir klasifikasaun ekonómika no programa, entretantu iha tabela tuirmai, apresenta ba ita kona-ba ajustamentu orsamental no dezenpeñu ezekeusaun orsamentu iha kada diresaun traballu sira iha PDHJ:

Diresaun Traballu Sira	Dotasaun Inisiál	Alterasaun	Dotasaun Finál
Diresaun Jestaun Rekursu Umanu	1.409.863,00	10.183,50	1.420.046,50
Unidade Asisténsia Juridika, Administrativa no Peskiza	12.580,00	(4.180,00)	8.400,00
Gabinete Inspesaun	6.720,00	-	6.720,00

Diresaun Traballu Sira	Dotasaun Inisiál	Alterasaun	Dotasaun Final
Diresaun Adminsitrasaun Finansas	421.410,00	82.901,16	504.311,16
Gabinete Sekretariu Ezekutivu	5.860,00	32.746,00	38.606,00
Diresaun Promosaun	46.480,00	(4.388,00)	42.092,00
Diresaun Fiskalizaun no Rekomendasaun	16.080,00	3.500,00	19.580,00
Gabinete Relasaun Publika no Koordinasaun Institusionál	119.985,00	15.643,15	135.628,15
Delegasaun Territoriál Baucau	15.500,00	3.700,00	19.200,00
Delegasaun Territoriál Maliana	15.940,00	1.940,00	17.880,00
Delegasaun Territoriál Same	15.500,00	1.988,00	17.488,00
Delegasaun Territoriál Oe-cusse	14.060,00	(67,15)	13.992,85
Disresaun Asisténsia Publika	15.740,00	4.080,00	19.820,00
Diresaun Investigasaun	23.650,00	2.620,00	26.270,00
TOTAL	2.139.368,00	150.666,66	2.290.034,66

Durante prosesu ezelesaun, orsamentu iha Unidade Asisténsia Juridika, Administrativa no Peskiza, Diresaun Promosaun, nomos Delegasaun Territoriál Oe-cusse sofre alterasaun menus, enkuantu orsamentu ba diresaun sira seluk aumenta, hanesan ilustra iha tabela iha leten. Nune'e, iha tabela tui mai, apresenta ba ita kona-ba dezenpeñu ezelesaun:

Diresaun Traballu Sira	Dotasaun Final	Ezelesaun	%
Diresaun Jestaun Rekursu Umanu	1.420.046,50	1.278.634,11	90%
Unidade Asisténsia Juridika, Administrativa no Peskiza	8.400,00	8.400,00	100%
Gabinete Inspesaun	6.720,00	6.330,00	94%

Diresaun Tráballu Sira	Dotasaun Finál	Ezekusaun	%
Diresaun Administrasaun Finansas	504.311,16	437.717,76	87%
Gabinete Sekretariu Ezekutivu	38.606,00	29.619,00	77%
Diresaun Promosaun	42.092,00	39.607,75	94%
Diresaun Fiskalizasaun no Rekomendasaun	19.580,00	19.003,00	97%
Gabinete Relasaun Publika no Koordinasaun Institusionál	135.628,15	128.365,90	95%
Delegasaun Territoriál Baucau	19.200,00	18.208,20	95%
Delegasaun Territoriál Maliana	17.880,00	17.308,00	97%
Delegasaun Territoriál Same	17.488,00	16.677,00	95%
Delegasaun Territoriál Oe-cusse	13.992,85	12.757,00	91%
Disresaun Asisténsia Publika	19.820,00	17.816,00	90%
Diresaun Investigasaun	26.270,00	21.432,00	82%
TOTAL	2.290.034,66	2.051.875,72	90%

10.4. Jestaun Patrimóniu no Lojistika

1) Veikulu no Ekipamentu Sira

Iha tabela tuirmai, apresenta mai ita kona-ba dados jerál kona-ba kuantidade patrimóniu ne'ebé iha, nomos kondisaun fízika sira, se iha estadu di'ak ka ladún di'ak, hodi ajuda identifika nesesidade manutensaun, reparasaun ka substituisaun hodi apoiu iha funsionamentu institusionál.

Tipu Patrimóniu	Kuantidade	Kondisaun Di'ak	Kondisaun Ladi'ak
Kareta	21	17	4

Tipu Patrimoniu	Kuantidade	Kondisaun Di'ak	Kondisaun Ladi'ak
Motor	12	11	1
Komputador	165	129	36
Laptop	53	26	27
Makina Fotokopia	4	3	1
Makina Imprezora	31	20	11
Air Conditioners (AC)	43	37	6

2) Materiál Eskritoriu

Tabela tuirmai apresenta ba ita kona-ba disponibilidade no nível utilizaun materiál eskritóriu durante tinan 2025, ne'ebé refleta kuantidade materiál ne'ebé disponivel hela, utiliza ona, no sira ne'ebé ladauk utiliza, hodi ajuda jestaun ba aseguja jere materiál sira ho efetivu.

Tipu Materiál Sira	Unidade	Kuantidade mak iha durante 2025	Kuantidade mak Uza Ona	Iha Hela
HVS	Dos	200	150	50
Tonner	PCS	227	19	208
Amplop Coklat boot	Pak	26		26
Amplop mutin kiik	Pak / Box	25	3	22
Map	Pak	208	8	200
Note book A5 no Note book spiral	Pak / Pcs	669	13	656
Teka folder	Dos	103	21	82
Box File Teka	Pcs	48		48
Kabel roll 15m no 10 m	Unit	22	1	21
Box Kontainer	Unit	54	1	53

3) **Materiál Konsumaveis no materiál Limpeza no Sanitariu**

Elein-de materiál eskritoriu no patrimoniu sira iha leten, PDHJ mós halo akizisaun ba materiál konsumaveis sira hanesan kafe, masimidar, aqua nomos materiál sanitaria hanesan bygone nomos byfresh hodi fasilita no apoiu servisu operasionál sira. Detallu kona-ba materiál hirak ne'e hanesan ilustra iha tabela tuirmai:

Materiál Konsumiveis no Materiál Limpeza no Sanitariu				
Tipu Materiál Sira	Unidade	Kuantidade mak iha durante 2025	Kuantidade mak Uza Ona	Iha Hela
Kafe	Box	174	165	9
Masin-midar	Sak	10	9	1
Aqua	Dos	440	389	51
Bygone, Byfresh	Dos	16	15	3

11. **Jestaun kontratu no Aprovizionamentu**

Realizasaun prosesu tenderizasaun ne'e hodi garante transparénsia, efisiénsia no responsabilizasaun iha jestaun rekursu finansial, garante nesesidade operasionál PDHJ iha nivel sentral no delegasaun Territoriál sira disponivel hodi hala'o knar ho di'ak.

Nune'e, durante tinan 2025, PDHJ liu hosi servisu aprivizionamentu hala'o prosesu tenderizasaun relasiona ho servisu *catering*, forneselemente aqua, *outros despesas operacionais*, jornal, telekomunikasaun, impresan no foto kopia, manutensaun eletrisidade no AC, publisidade, kombustivel, uniforme, kapital menor, transportes nomos arenda uma hodi uza nu'udar edifsiu provizoriu PDHJ nian durante 2026.

Nune'e to'o tinan 2025 nia rohan, PDHJ realiza pagamentu hotu-hotu ne'ebé liu hosi prosesu tenderizasaun hamutuk **US\$ 440,091.25 (Dolares Amerikanu Rihun Atus Haat, Haat – Nulu, Sia – Nulu – Resin – Ida, Sentavos Rua – Nulu – Resin – Lima)**, ho nia detallu hanesan deskreve iha tabela tuirmai:

ITEM	FORNESEDOR / VENDOR	PAGAMENTU	DESKRISAUN
CATERING	Domingfill Fladagro Unipesoál, Lda	\$ 658.00	Fornesedor catering ba servisu Delegasaun Territoriál Same

ITEM	FORNESEDOR / VENDOR	PAGAMENTU	DESKRISAUN
	Gimival Unipesoál, Lda	\$ 7,221.00	Fornese catering ba atividade operasionál no eventú nasionál sira iha PDHJ Dili
	Inder Prily Unipesoál, Lda	\$ 2,944.50	Fornesedor Catering ba servisu Delegasaun Territoriál Maliana
	Rainka-Rbf-Unipesoál, Lda	\$ 16,831.75	Fornesedor Catering ba atividade PDHJ iha Dili
AQUA GALON	Germinar Unipesoál	\$ 576.50	Fornesedor galung ba PDHJ iha Dili
OUTROS DESPESAS OPERACIONAIS	W Four Unipesoál, Lda	\$ 9,540.59	Fornesedor sasán konsumaveis, materiál sanitasaun no limpeza ba PDHJ Sentrá
	W Four Unipesoál, Lda (BAUCAU)	\$ 750.25	Fornesedor sasán konsumaveis, materiál sanitasaun no limpeza ba Delegasaun Territoriál Baucau
INFORMASAUN	Diario Nacional	\$ 615.50	Fornese jornal ba PDHJ iha Dili
	STL CROP	\$ 495.00	
	Jornal Independente	\$ 520.50	
	Timor Post	\$ 440.00	
	Dili Post	\$ 364.00	

ITEM	FORNECEDOR / VENDOR	PAGAMENTU	DESKRISAUN
KOMUNIKASAUN	Timor Telecom	\$ 29,943.64	Fornese pulsa prepagu, lane-line nomos telfone fiksi ba PDHJ sentral nomos servisu delegasaun territoriál sira
IMPRESAUN NO FOTO KOPIA	Sylvia Dili	\$ 12,799.20	Emprime no jilid dokumentu, sertifikadu, relatóriu no baner durante 2025
MANUTENSAUN AC NO ELETRISIDADE	Korry Agung	\$ 2,398.00	Manutensaun ba AC no Eletridade iha PDH Central
ANTI VIRUS	WORLDVIEW	\$ 6,499.50	Selu ba Anti-Virus
MATERIÁL ESKRITÓRIU	Marmori Unipesoál, Lda	\$ 6,460.50	Akizisaun materiál Eskritoriu
ALUGA EDIFISIU	Emeraldwynn Wynn Unipesoál, Lda	\$ 142,380.00	Arenda hotel Exelcior nu'udar edifisiu provizorio PDHJ nian durante tinan 2026
PUBLISIDADE	RTTL, EP	\$ 360.00	Selu ba RTTL.EP ne'ebé fo sai ona avizu kona-ba tenderizasaun sira PDHJ nian
COMBUSTIVEL	Aitula Fuel	\$ 37,210.00	Fornese gasolina no gazoel ba PDHJ durante tinan 2025
	Pertamina International	\$ 2,491.82	Fornese kombustivel ba delegasaun territoriál RAEOA

ITEM	FORNECEDOR / VENDOR	PAGAMENTU	DESKRISAUN
UNIFORME / PRINTING	Papa Printing Unip, Lda	\$ 4,180.00	Fornese kamizola ba selebrasaun loron mundial direitus humanus iha Timor-Leste
	Sika Gio Unipesoál, Lda	\$ 1,881.00	Fornese farda desportu mai PDHJ
	Instantshop	\$ 120.00	Imprime Play
CAPITAL MINOR	Zeon International	\$ 44,135.00	Fornese ekipamentu teknolojia no Informatika/IT
	Mutiara Enterprise Unipesoál, Lda	\$ 21,000.00	Sosa kareta Toyota New Rush ida
	Agubomabo Unipesoál, Lda	\$ 400.00	Sosa makina kua dut
	Mouipalos Unipesoál, Lda	\$ 260.00	Fornese radio
	Fastep Unipesoál, Lda	\$ 39,000.00	Akiza Kareta Toyota Hi-Lux ida
TRANSPORTES	Rozi Tour & Travel, Lda	\$ 13,947.00	Fornese billete aviaun hodi fasilita servisu PDHJ iha estranjéiru durante 2025
	Ace Travel, Lda	\$ 32,730.00	
	Mega Tour & Travel	\$ 938.00	
TOTAL		\$ 440,091.25	

12. Sistema Informatika no Teknolojia

Importante hosi sistema informatika, komunikaun no teknolojia (ICT) iha instituisaun públika ka privadu sira hodi tulun funksionamentu institusionál, liliu relasiona ho fasilita komunikaun interna no externa.

Nune'e, bainhira ko'alia kona-bá sistema informatika, komunikaun no Teknolojia (ICT) barak liu relasiona ho ekipamentu no/ka aprarellu teknolojiku sira. Oinsá kona-bá PDHJ nia ICT:

- ❑ Hodi fasilita atividade administrativa no komunikasaun dijitál ho efisiénsia, durante tinan 2025, *Internét* ba PDHJ fornese hosi DNIC - MTC ho kapasidade 20 Mbps ba edifísiu sentral (Dili) no 10 Mbps ba kada Delegasaun Territoriál mak hanesan delegsaun Territoriál Baucau, Maliana, Oe-cusse no Same.
- ❑ Hodi fasilita atividade administrativa, preparasaun dokumentu no jestaun dados, PDHJ utiliza ekipamentu informátika sira hanesan komputador no laptop ne'ebé utiliza iha Instituisaun PDHJ opera ho sistema operasionál Windows 10 no Windows 11 Home, no aplikasaun Microsoft Office 2013 no 2019.
- ❑ Durante tinan 2025, servisu ICT PDHJ buka nafatin hodi halo manutensaun no kuidadu seguransa ba Plataforma komunikasaun sira PDHJ nian hanesan website, sistema jestaun keixa, facebook PDHJ nomos PDHJ nia Plataforma komunikasaun sosiál sira seluk tan;
- ❑ Fornese apoiu tekniku ba hosi Diresaun DFR no Unidade UAJAP ne'ebé utiliza **KoboCollect** hodi rekolla dados iha terrenu.
- ❑ PDHJ iha instalasaun servidór iha fatin rua, mak **Server Room PDHJ** iha departamentu ICT no **Data Center DNIC-MTC**, ne'ebé utiliza hodi aseguira dados institusionál.
- ❑ Entretantu haree ba kondisaun ekipamentu eletroniku sira ne'ebé kuaze utiliza liu ona tinan tolu nomos kapasidade internét mak ki'ik, dala-ruma kotu-kotu, servisu ICT PDHJ relata, nivel responsividade ICT iha PDHJ foin atinji 50%, enkuantu nivel seguransa dados kuaje 60%. Kondisaun ida ne'e kauza hosi *hard disk* balu iha servidor ne'ebé la funsiona ona, ne'e afeta ba armazenamentu dados, seguransa informasaun no sustentabilidade servisu dijitál PDHJ nian.

Hatetuk ba situasaun no kondisaun sira iha leten, nesesária medida sira hanesan manutensaun no renovasaun ekipamentu ICT sira hodi garante funsionamentu sistema ne'ebé seguru no responsivu.

13. Kooperasaun no Parseria



Foto 12: Sekretariu Ezekutivu PDHJ, Sekretariu Jerál KOMNAS HAM akompanha hosi Provedór Direitus Umanus no Justisa, Embaxador Timor-Leste iha Indonézia, nomós Ketua KOMNAS HAM foto hamutuk hafoin asina akordu tékniku servisu hamutuk entre PDHJ no KOMNAS HAM, iha Jakarta Indonézia

Durante tinan 2025, Provedoria Direitus Humanus no Justisa (PDHJ) kontinua reforsa servisu kooperasaun no parseria ho instituisaun estadu, organizasaun sosiedade sivíl, no parseiru internasionál sira, hodi hametin protesaun no promosaun direitus umanus no governasaun di'ak iha Timor-Leste.

Liu-hosi enkontru bilateral sira, PDHJ troka informasaun, partilla esperiênsia, no koordenasau asaun conjunta ho parseiru sira relaciona ho sistema prizonál, inklusaun sosiál, prevensaun violasaun direitus umanus, no fortalesimentu kapasidade institusionál.

Servisu kooperasaun no parseria ne'e kontribui signifkativamente ba harmonizasaun esforsu entre parseiru sira, hodi garante intervensaun sira ne'ebé realiza responde efetivamente ba nesesidade comunidade no promove governasaun ne'ebé transparente, akuntável no inkluzivu.

Iha tinan 2025, Provedoria ba Direitus Umanus no Justisa (PDHJ) no Komisi Nasionál Hak Asasi Manusia Republik Indonesia (KOMNAS HAM) asina Akordu Servisu Hamutuk, hodi servisu hamutuk durante tinan rua ba oin ba hala'o formasaun, diálogu komunitáriu, fiskalizasaun relaciona ho direitu ekonomia, sosiál no kultura (ECOSOC) iha área fronteira entre Timor-Leste no Indonézia, nomos ba dezvoltamentu institusionál hodi hasa'e efetividade servisu institusaun sira iha defesa no promosaun direitus umanus iha nível nasionál no rejionál.

Akordu tékniku ne'e nu'udar asaun kontinuasaun husi parseria ne'ebé estabesele dahuluk iha Jakarta datada 20 Novembru 2023, no marka continuidade ba kooperasaun estratéjika atu hametin protesaun no

promosaun direitos umanus entre nasaun rua. Renovasaun akordu ne'e realiza hafoin enkontru mapamentu ba prioridade no asaun konjunta sira ne'ebé parte rua hala'o iha Bali, Indonézia, datada 27 - 28 Agostu 2025.

Iha tinan ida ne'e mós PDHJ realiza enkontru barak ho parseiru nasional no internasionál sira ne'ebé foka liu ba diskusaun kona-ba possibilidade kooperasaun iha área promosaun no protesaun direitos umanus.

Enkontru sira ne'e inklui simu vizita kortezia husi delegasaun governu no rede rejional sira, hasoru malu ho representante embaixada no organizasaun parseiru internasionál, hanesan delegasaun husi Embaixada Austrália, Embaixada Suísa, no programa dezvoltamentu hanesan PARTISIPA, ne'ebé diskute oportunidade kolaborasaun iha área inkluzau sosal, igualdade jeneru, direito ema ho defisiénsia, dezvoltamentu infraestrutura inkluziva, formasaun direitos umanus, mediasaun, no fortalecimento institucional.



Foto 13: Díli, 06 febreiru 2025 – Ekpa Kuadrilateral ne'ebé kompostu husi Provedoria Direitos Umanus no Justisa (PDHJ), Komisaun Anti Korupsaun (CAC), Komisaun Funsau Públika (CFP), no Inspeasaun Jerál Estadu (IGE), hala'o enkontru konjunta hodi ko'alia kona-ba implementasaun akordu sira tuir sira-nia Memorandu Intendimentu (MoU)

Aleinde estabele kooperasaun, Provedoria Direitos Humanus no Justisa (PDHJ) kontinua reforsa kooperasaun interinstitucional liu-hosi partisipasaun iha mekanizmu kolaborativu sira hanesan enkontru kuadrilateral entre Provedoria Direitos Humanus no Justisa (PDHJ), Comissão Anti Corupção (CAC), Comissão da Função Pública (CFP), no Inspeção Geral do Estado (IGE) iha 06 fulan-febreiru 2025. Enkontru ne'e diskute kona-ba implementasaun akordu kuadrilateral nian inklui mekanizmu monitorizasaun, no prevensaun ba mal utilizasaun patrimóniu estadu.

Entretantu, iha loron 29 fulan-abril 2025, realiza enkontru Rede Apoio Servisu Prizional (RSAP), nu'udar plataforma kolaborativu entre instituisaun estadu no organizasaun sosiedade sivil sira hodi promove sistema prizional ne'ebé proteje no respeita direitos umanus. Enkontru sira ne'e importante hodi promove interesse mútuu, hametin no desenvolve inisiativa konjunta iha futuru, nu'udar parte hosi komprimisiu PDHJ nian ba hametin koordinasaun

interinstitusionál hodi promove governasaun di'ak no respeita direitos umanus.



Foto 14 – Hafoin enkontru ho autoridade rejiaun administrative espesial Oe-Cusse, Provedór Direitos Humanus no Justisa, Virgílio da Silva Guterres "Lamukan," entretga hela manual governasaun di'ak no direitos umanus ba Prezidente Autoridade Rejiaun Administrativa Espesiál Oé-Cusse Ambeno (RAEOA), Regio da Cruz Salu, iha Gabinte Autoridade iha Oebau, Pante Makassar - 3 dezembru 2025

Durante tinan 2025, Provedór Direitos Humanus no Justisa mós hala'o vizita kortezia, diálogu institusionál no diskusaun estratéjika ho lideransa no/ka autoridade lokál sira, hodi hametin inisiativa ba promove governasaun di'ak, proteje direitos umanus, no hakbesik servisu ba comunidade sira iha território nasional, inklui destaka kestaun sira relaciona ho servisu públiku ne'ebé transparente, responsavel no asesível ba sidadaun hotu-hotu.

Iha Rejiaun Administrativa Espesiál Oé-Cusse Ambeno (RAEOA), Provedór subliña importánsia profesionalizmu, imparsiálidez no tratamentu justu iha instituisaun públika sira nu'udar baze importante hodi proteje direitos umanus no hametin konfiansa públika.

PDHJ hatu'o preokupasaun kona-ba continuidade projetu infraestrutura sira ne'ebé pendente, reativasaun sistema *Boarding Pass* pós-pandemia COVID-19, no problema sidadaun laiha estadu (*statelessness*) ne'ebé afeta comunidade fronteira sira.

Autoridade RAEOA manifesta kompromisu atu kontinua koopera ho PDHJ no foti medida sira oinsá responde ba rekomendasaun no preokupasaun ne'ebé hatu'o durante diálogu ne'e.

Iha sorin seluk, PDHJ mós sorumutu ho Autoridade Administrativa Ataúro hodi diskute planu estabelesimentu Pontu Fokál PDHJ nian, ema na'in rua iha administrasaun ne'e.

Inisiativa ida-ne'e konsidera importante atu fasilita asesu comunidade sira ba mekanizmu keixa no servisu direitos umanus, liu-liu tanbá kondisaun jeográfika ne'ebé durante ne'e limita asesu sidadaun sira ba PDHJ nia servisu. Autoridade Administrativa Ataúro simu ho pozetivu inisiativa ne'e no pronto apoia implementasaun programa refere.



Foto 15: Provedór Direitos Humanos no Justisa, Virgílio da Silva Guterres "Lamukan", akompaña hosi Diretor Delegasaun Territorial Maliana sorumutuk ho Prezidente no Autoriedade sira iha munisípiu Covalima - 24 juñu 2025

Kestaun mak hanesan destaka mós iha sorumutu ho autoridade Munisípiu Covalima nomós Ermera. Durante enkontru iha Covalima, Provedór hato'o mós preokupasaun kona-ba seguransa públika no nesesidade atu hametin kontrolu no responsabilizasaun iha utilizasaun rekursu públiku, partikularmente relasiona ho aprovasaun viajen servisu no implementasaun prosedimentu administrativu sira.

Entretantu iha Ermera, PDHJ mós fó rekomendasaun kona-ba nesesidade atu hametin relasaun públika no promove descentralizasaun servisu merkadu lokál sira atu fasilita asesu comunidade.

Liu-hosi inisiativa no diálogo institusionál hirak ne'e, PDHJ reafirma ninia kompromisu atu kontinua hakbesik servisu ba povu, hametin mekanizmu protesau direitos umanus no promove kultura governasaun di'ak iha nível nasional no lokál.

Kolaborasaun entre PDHJ no autoridade sira iha território tomak sai nu'udar pasu estratéjiku ida hodi garante katak sidadaun hotu-hotu, inklui sira ne'ebé hela iha área remota no fronteira, bele asesu ba servisu públiku.

SERVISU PROTESAUN

Jestaun Keixa, medisaun no konsilisaun, investigasaun no haree tuir rekomendasaun

Provedoria Direitus Humanus no Justisa (PDHJ) ezerse nia atuasaun sira iha ambitu servisu autoridade públika sira nian, nomeadamente Governu, Polísia Nasionál Timor-Leste (PNTL), Servisu Prizionál no FALINTIL Forsa Defeza Timor-Leste (F-FDTL), habelar mós ba atividade sira hosi órgaun no entidade públiku ka privadu sira ne'ebé hala'o funsaun, presta servisu públiku ka responsavel ba jestaun fundu ka patrimóniu públiku sira, hodi asegura servisu públiku sira la'o tuir lei no regulamentu, razoavel, justu, la opresivu, la diskriminativu, kompativel ho dever no/ka kompeténsia institusionál.

Nune'e ema hotu iha direitu ba hetan benefisiu hosi servisu Provedoria Direitus Humanos no Justisa ho gratuita, liliu ema sira ne'ebé vulneravel no dezvantajen liu, hanesan dadur, feto, labarik no grupu minoria sira, nomos ema ho nesesidade espesiál, partikularmente iha asuntu kultura, lian no saúde, no ema ho defisiénsia⁴.

Nune'e, PDHJ fornese asisténsia ba sidadaun sira liu hosi simu no prosesa keixa sira, elabora dokumentu relevante no halo analiza preliminar ba keixa hirak ne'e hodi hatene natureza keixa nian no define mekanizmu ne'ebé apropriadu hodi buka rezolve liu hosi mekanizmu ne'ebé apropriadu hanesan investigasaun, mediasaun no konsiliasaun, refere ba entidade relevante, ka taka.

PDHJ nia asiténsia sira haleno ba prinsípiu asesibilidade, responsabilidade, inkluzivu, igualdade no naun-diskriminasaun. Protesaun seguransa no sizilu dadus keisoza sira sai prioridade, inklui emisaun pareser kona-ba risku ne'ebé bele afeta seguransa ba ema ne'ebé hato'o keixa.

PDHJ iha nia edifisiu sentral no delegasaun Territoriál sira esforsu nafatin hodi padroniza prosedimentu simu no prosesa keixa hodi asegura asesibilidade nomos responsividade, nune'e bele kontribui ba reforsu *estado de direito*, liu hosi fasilita asesu, promove solusaun ne'ebé adekuadu, no garante katak povu nia lian hetan resposta hosi entidade estado ho efetivu.


Entretantu, iha 2025 PDHJ simu, rejista no prosesa keixa sira hanesan ilustra iha tabela no grafiku sira hanesan tuirmai:

1. Servisu Jestaun Keixa


Iha 2025, servisu asiténsia publika PDHJ rejista keixa hamutuk 179, ne'ebé keixa hamutuk 74 mak alega ba violasaun direitus umanus no keixa 105 ho alegasaun ba violasaun governasaun di'ak.

⁴ Lei n.º 7/2004, de 26 de maio aprova os estatutos do provedor dos direitos humanos e de justiça alteradu ho lei n.º 8/2009 jornal da república de 15 de julho lei sobre a comissão anti-corrupção, artigo 3º no 8º

Keixa 4 ne'ebé rejista bazea ba iniciativa Provedór, enkuantu keixa 175 simu hosi sidadaun sira kompostu hosi feto 61, mane 113 no ema anonimu ida. PDHJ simu keixa hirak ne'e hosi sidadaun sira iha munisípiu 13, nota katak munisípiu Dili mak keixa aas liu, hanesan ilustra iha mapa tuirmai:



Hosi keixa hirak ne'e hotu, servisu asisténsia pública PDHJ halo ona avaliasaun preliminar, komfirma, alegasaun kona-ba violasaun direitos umanus barak liu relasiona ho violénsia fíziku, partikularmente husi la'en sira hasoru sira-nia parseiru, mestre sira hasoru estudante, no husi entidade seguransa no/ka defeza hasoru comunidade. Entretantu, alegasaun kona-ba violasaun ba prinsípiu governasaun di'ak jerálmente relasiona ho falta transparénsia no klareza informasaun iha servisu públiku, nomos prátika kobransa ilegál hosi autoridade pública ba membru comunidade sira.



Bazeia ba rezultadu avaliasaun preliminaríu nu'udar apresenta iha grafiku ne'e, ne'ebé 56,42% hosi keixa hirak ne'e mak Komite Jestaun Keixa (KJK) deside loke ba investigasaun, 12,29% aleinde halo investigasaun haruka mós notisia krime ba Ministériu Públiku nu'udar na'in ba kazu krime, 7,26% ekivale keixa 13 mak rezolve liu hosi mediasaun no konsiliaaun, keixa 12 (6,70%) PDHJ refere ba entidade relevante sira no nafatin halo monitorizasaun, enkuantu keixa 15 (8,38%) PDHJ haruka ba entidade relevante, no keixa 15 (8,38%) mak PDHJ taka arkiva, enkuantu keixa ida mak PDHJ adia desizaun keixa ida mak adia desizaun, tanbá presiza aprofunda analiza no fó pareser, hafoin apresenta ba komite jestaun keixa hodi deside mekanizmu rezolusaun ba problema refere.

Keixa hirak ne'ebé loke investigasaun tanbá iha indikasaun violasaun direitos umanus no governasaun di'ak, enkuantu loke investigasaun no hato'o tan notisia krime tanbá iha tendensia violasaun direitos umanus no governasaun di'ak nomos iha indisius krimi.

Keixa ne'ebé relasiona ho problema entre fen ho laen (responsabilidade fen ho la'en ba oan sira), fó impresta osan ba malu no la fó-fali, PDHJ deside rezolve liu hosi mediasaun & konsiliaaun.

Entretantu, PDHJ loke refere ba keixa sira ne'ebé relasiona ho disputa rai, naran laiha lista elektroniku veteranus, nomos disputa laborar (hapara traballador), enkuantu taka haruka kestaun sira hanesan Ministériu Públiku la rejista sidadaun nia keixa, kazu emprestimo, kazu krimi entre ema sivil no kazu laen ameasa fen (violénsia domestika).

Hodi informa ba keisozu sira kona-ba prosesu no/ka andamentu keixa mak sira apresenta, PDHJ distribui ona notifikasaun dahuluk hamutuk 148 nomos notifikasaun daruak hamutuk 135.

Notifikasaun dahuluk 31 inklui 1 anonimu no IP – 4 mak ladauk distribui kauza Keixa foin tama, nomos balun tanbá enderesu husi kesar nain la klaru (númeru telefone la ativu, hela fatin la permanente (Kontrak). Enkuantu notifikasaun daruak 44 ladauk distribui tanbá Komitee Jestaun Keixa (KJK) foin hola desizaun.


2. Servisu Mediasaun no Konsiliaaun

Mediasaun no konsiliaaun mak ida hosi mekanizmu rezolusaun konfliktu ne'ebé apropriadu, rápidu no eficiente, ho mekanizmu rezolve konfliktu la - sempre liu husi prosesu investigativu naruk.

Purtantu, nu'udar apresenta ona iha parte anterior, kuaze keixa 13 ekivale 7,26% hosi total keixa mak tama iha tinan 2025, ne'ebé Komite Jestaun Keixa deside rezolve liu hosi prosesu mediasaun no konsiliaaun.

Entretantu iha kazu 2 ne'ebé servisu mediasaun no konsiliaaun ladauk konklui iha 2024.

Nune'e, iha 2025, servisu mediasaun no konsiliaaun konklui ona kazu 11 (79%) hosi kazu 13, enkuantu kazu ida tama ona ba prosesu pre-mediasaun, no kazu 1 mak ladauk prosesa, hanesan ilustra iha grafiku tuirmai:



Grafiku iha leten apresenta mai ita, 85% hosi parte sira ne'ebé envolve iha kazu ne'e iha ona akordu ba solusaun ruma hodi hakotu sira nia problema, nune'e ekipa mídiador PDHJ produz no publika ona relatóriu mediasaun finál.


Entretantu pre-mediasaun katak iha hela prosesu aprosimasaun (asina karta konsentimentu mediasaun, deklarasaun no karta konvite ba parte rua) antes hahu prosesu mediasaun. Enkuantu kazu ida ne'ebé ladauk prosesa kauza komite jestaun keixa foin mak deside iha dia 29 dezembru 2025, nune'e, kazu refere ekipa sei kontinua prosesa iha tinan 2026.

3. Servisu Investigasaun

Nu'udar deskreve iha servisu jestaun keixa nian, tinan 2025 Komitee Jestaun Keixa (KJK) deside keixa 123 kompostu hosi governasaun di'ak 78 no direitus umanus 45 hodi investiga. Entretantu iha kazu 94 kompostu hosi governasaun di'ak 50 no direitus umanus 44 mak ladauk konklui nia prosesu investigasaun iha 2024.

Nune'e, iha 2025 PDHJ liu hosi servisu investigasaun prosesa kazu hamutuk 217 kompostu hosi governasaun di'ak 128 no direitus umanus 89, ne'ebé durante 2025, servisu investigasaun PDHJ konklui prosesu investigasaun ba kazu hamutuk 194 ekivale 89% hosi total kazu kompostu hosi governasaun di'ak 112 ekivale 88% no direitus umanus 82 ekivale 92%.

Entretantu kazu direitus umanus ida hosi tinan 2024 nian mak iha hela prosesu, enkuantu kazu 22 iha tinan 2025 nian kompostu hosi governasaun di'ak 16 no direitus umanus 6 mak sei iha hela prosesu, no sei konklui nia prosesu iha tinan 2026, hanesan ilustra iha gráfiku tuirmai:



Hafoin halo investigasaun, servsiu investigasuan PDHJ konklui prosesu ba kazu 194 refere liu hosi produz relatóriu investigasaun finál ho rekomendasaun hamutuk 37 (19%) kompostu hosi governasaun di'ak 19 no direitus umanus 18, relatóriu investigasaun finál no sujestaun 23 (12%) kompostu hosi governasaun di'ak 14 no direitus umanus 9, nomos relatóriu investigasaun finál badak (arkiva) hamutuk 134 (69%) kompostu hosi governasaun di'ak 79 no direitus umanus 55, hanesan ilustra iha tabela tuirmai:

RELATÓRIU INVESTIGASAUN	TOTAL	BG	DH	%
BADAK / ARKIVA	134	79	55	69%
SUJESTAUN	23	14	9	12%
REKOMENDASAUN	37	19	18	19%
TOTAL	194	112	82	100%


Iha tabela ne'e apresenta mai ita, kuaze 69% hosi kazu prosesadu mak arkiva. Arkivamentu ba kazu ne'e kauza Ministériu Públiku halo ona Prosesu ka akuzasaun ba iha Tribunál, kesar nain retira nia kazu tanbá rezolve ona liu hosi dalan família, ka prosesu investigasaun la identifika akonteseimentu violasaun.

Enkuantu, iha relatóriu investigasaun finál ho sujestaun tanbá, komfima maske prosesu investigasaun la prova akontese violasaun ruma, PDHJ fó hanoin ba instituisaun respondente sira atu tau atensaun ba kestaun refere.

Entretantu, relatóriu investigasaun finál ho rekomendasaun, servisu investigasaun komfima iha violasaun ba prinsípiu direitus umanus ka governasaun di'ak, nune'e rekomenda ba Instituisaun respondente sira atu instaura prosesu ka foti medida sira adekuadu hasoru respondente.

Violasaun ba governasaun di'ak, 38% relasiona ho administrasaun ladi'ak, 36% relasiona ho abuzu poder, 22% relasiona ho ilegálide, enkuantu 5% mak kona-ba inkompeténsia.

Enkuantu, violasaun ba direitus umanus kuaze 63% relasiona ho kontra direitu ba liberdade, integridade no seguransa, tratamentu, aat, kruel no la-umanu (TAKLU), restante relasiona ho direitu ba propriedade, direitu ba onra no privasidade, abuzu seksual hasoru labarik, direitu ba moris, direitu ba uma no korrespondensia, violénsia laek hasoru feto, tortura, direitu ba nasonálide, direitu asesu ba justisa, nomos kontra liberdade konsiensia relijiaun no kultura.



Kazu sira ne'ebé PDHJ investiga, barak liu hasoru Instituisaun hitu ne'ebé ilustra iha gráfiku ne'e. Enkuantu instituisaun 29 mak nu'udar respondente hosi kazu hirak ne'ebé PDHJ investiga durante 2025, inklui Ministériu Solidariedade Sosiál no Inkluzsaun (MSSI), Ministériu Obras Públiku (MOP),


Ministériu Transporte no Telekomunikasaun (MTK), Ministériu Finansas (MF), Sekretariu Estadu Formasaun Profesionál no Empregu (SEFOPE), Ministériu Antigos Kombatientes no Libertasaun Nasionál (MACLAN), Sekretariu Estadu Asuntu Toponomia no Organizaçaun Urbanu (SEATOU), Komisaun Funsan Publika (CFP), Ministériu Interior (MI), TATOLI, IP, Ministériu Koordinator Asuntu Ekonomiku (MKAE), Sekretariu Estadu Terras Propriedades (SETP), Institutu Jestaun Ekipamentu (IGE.IP), Servisu Nasionál Intelijensia (SNI), Ministériu Komersiu no Industria (MCI), Parlamentu Nasionál (PN), Eletridade Timor-Leste (EDTL), Universidade Nasionál Timor Lorosa'e (UNTL), Ministériu Ensinu Superior, Siensia no Kultura (MESCC), Ministerio Petroleum (MP), Primeiru Ministru (PM), nomos Gabinete Apoiu Sosiedade Sivil (GASS).

4. Servisu Haree Tuir Rekomendasaun

Além disso, Servisu Assisténsia Públika monitoriza no analiza implementasaun rekomendasaun sira ne'ebé Provedór hato'o ba instituisaun públika sira, hodi garante katak rezultadu husi prosesu keixa la para deit iha rekomendasaun, maibé introduz ba prátika sira iha administrasaun públika.

Purtantu, dentru 2025, Servisu haree tuir rekomendasaun monitoriza ona Relatóriu Investigasaun Finál (RIF Rekomendasaun) hamutuk 26 kompostu hosi direitus umanus 16 no governasaun di'ak 10 ne'ebé emite hosi servisu investigasaun.

Hosi relatóriu ne'e komfirma katak, RIF Rekomendasaun relasiona ho violasaun direitus umanus, 100% entidade respondentes implementa ona, entidade hirak ne'e mak hanesan ilustra iha grafiku tuirmai:



Nu'udar ilustra iha grafiku ne'e, hosi relatóriu rekomendasaun hirak ne'e, 37% mak hatu'o ba PNTL no 27% mak hatu'o ba Ministériu Interior, ne'e

hatudu prezisa iha esforsu seriu ba hadi'ak ita nia sistema seguransa oinsa autoridade seguransa sira bele atua ho respeito ba direitos umanus.

Rekomendasaun hirak ne'e, relaciona ho kazu sira ho nia númeru hanesan ilustra iha tabela tuirmai:

INSTITUISAUN RESPONDENTES	PROGRESU IMPLEMENTASAUN	NÚMERU OFISIU RELATÓRIU
PNTL, MI, PJR	Implementa	C. 2156/2023/DH
MF	Implementa	C. 2248/2023/DH
ME, MP.Bobonaro	Implementa	C. 2341/2024/DH
MESCC, Prez. Politecnico Betano	Implementa	C. 2327/2024/DH
PNTL, MI	Implementa	C. 2114/2023/DH
PNTL	Implementa	C. 2329/2024/DH
MI, PNTL	Implementa	C. 2165/2023/DH
MI, PNTL	Implementa	C. 2189/2023/DH
PNTL	Implementa	C. 2232/2023/DH
MI, PNTL	Implementa	C. 2268/2023/DH
PNTL	Implementa	C. 2286/2023/DH
MI, PNTL	Implementa	C. 2292/2024/DH
MI, MP.Ermera	Implementa	C. 2362/2024/DH
PNTL, ME, MP.Baucau	Implementa	C. 2367/2024/DH
PNTL, MI, MP.Baucau	Implementa	C. 2384/2024/DH
MAE	Implementa	C. 2385/2024/DH

Purtantu RIF rekomendasaun relaciona ho violasaun governasaun di'ak, 10, kuaze 7 mak entidade respondente sira implementa no tolu mak implementa parsial.

RIF rekomendasaun ne'e haruka ba entidade 14, entidade sira ne'ebé implementa ona rekomendasaun mak Ministériu Edukasaun, Ministerio Administrasaun Estatal, Ministerio Negecio Estrangeiro e Cooperação, Comição Anti Corupção, Comição da Função Publica, nomos Sekretario Rejiaun Asuntu Edukasaun no Sosiál RAEOA, enkuantu Ministériu Interior, Primeiro Ministro, Ministerio Saúde, Parlamento Nasionál, Ministerio Público, Vise-Primeiro Ministro, Ministerio Cordenador dos Assuntos Economicos nomos Miniterio Turismo e Ambiente mak implementa ho parsial hanesan ilustra iha tabela tuirmai:

INSTITUISAUN RESPONDENTES	PROGRESU IMPLEMENTASAUN	NÚMERU OFISIU RELATÓRIU
MNEK	Implementa	C. 2077/2022/BG
MAE	Implementa	C. 2181/2023/BG
ME	Implementa	C. 2273/2023/BG
PM, MS, PN, MP	Implementa Parsial	C. 2038/IP/24
CAC, CFP	Implementa	C. 2237/2023/BG
Vise-PM, MKAE, MTA	Implementa Parsial	C. 2334/2024/BG
MS	Implementa	C. 2335/2024/BG
Sek. Rej. Asuntu Eduk. no Sosiál RAEOA	Implementa	C. 2376/2024/BG
ME	Implementa	C. 2399/2024/BG
MI	Implementa Parsial	C.2416/2024/BG

Aleinde relatóriu RIF Rekomendasaun, servisu aistensia pública mós haree tuir rekomendasaun sira ne'ebé hasai liu hosi relatóriu fiskalizasaun mak emite hosi servisu fiskalizasaun no rekomendasaun.

Nune'e iha 2025 monitoriza mós implementasaun ba rekomendasaun hosi relatóriu temátiku (fiskalizasaun) rua (2) kompostu hosi direitos umanus ida no governasaun di'ak ida ne'ebé hatu'o ba Ministériu Saúde no Autoriedade Nasionál ba Dezenvolvimentu (ADN).

Entretantu, hosi rekomendasaun iha relatóriu temátiku (fiskalizasaun) rua ne'e implementa parsial, hanesan ilustra iha tabela tuirmai:

INSTITUISAUN	PROGRESU IMPLEMENTASAUN	KATEGORIA (BG / DH)
Ministériu Saúde no ADN	Implementa Parsial	BG
Ministériu Saúde	Implementa Parsial	DH

Relatóriu temátiku governasaun di'ak ne'ebé rekomenda ba Ministériu Saúde (MS) no Autoriedade Dezenvolvimentu Nasionál (ADN) ne'e relasiona ho rezultadu fiskalizasaun projetu konstrusaun posto saúde, uma ba mediku no parteira iha suku Beiseuc, Administrativu Tilomar, Munisípiu Covalima. Enkuantu relatóriu temátiku asuntu direitus umanus mak hatu'o ba ministériu saúde ne'e relasiona ho monitorizasaun Inan Partus (Tuur-Ahi) iha odamatan oin sala maternidade sentru saúde Natarbora, munisípiu Manatuto.

Implementasaun ba rekomendasaun ne'e indika ho resposta eskrita hosi entidade relevante relasiona ho aktu mak entidade respondente foti kabe ba rekomendasaun mak PDHJ hatu'o. Enkuantu implementasaun parsial indika ho resposta verbal hosi entidade respondente sira.

Purtantu, hodi melloria servisu haree tuir rekomendasaun, nesesira ativu fila fali enkontru altu nivel hodi komfirma no/ka aseguara implementasaun rekomendasaun sira tuir tempu.



IDA HOSI ISTÓRIA SUSESU SIRA

Istória susesu ida-ne'e destaka intervensaun desizivu hosi Provedoria Direitus Humanus no Justisa (PDHJ) iha Oé-Cusse, ne'ebé ho susesu rezolve atrazu iha saláriu ne'ebé afeta traballadór na'in 172 iha sentru saúde sira no Ospital Referál Rejionál RAEOA. Kazu ne'e hahú bainhira António Felix Colo, jardineiru ida iha Ospital Rejionál Referál, iha Outubru 2025 relata ba PDHJ Delegasaun Territoriál (DT) Oé-Cusse, katak nia ho nia kolega sira la simu sira nia saláriu durante fulan rua tanbá atrazu sira hosi empreza kontratadu ida.

Ekipa PDHJ halo kedas koordenasaun ho Servisu Rejionál Saúde Oé-Cusse no kompañia ne'ebé responsavel. Liuhusi diálogu konstrutivu no akompañamentu besik, PDHJ nia advokasia lori rezultadu pozitivu - empreza selu saláriu pendente fulan rua nian ba António no nia maluk traballadór sira. Rezultadu konkretu ida-ne'e reafirma PDHJ nia papél vital hodi promove justisa, no responsabilizasaun iha servisu fatin.

António hato'o agradese wa'in ba PDHJ ba sira-nia intervensaun ne'ebé oportunu no efetivu, ne'ebé lori kmaan ba nia no nia kolega sira. Nia mós enkoraja traballadór sira seluk ne'ebé karik hasoru dezafiu hanesan ka violasaun ba sira-nia direitu atu hato'o sira-nia kazu ba PDHJ, hatene katak instituisaun ne'e iha kompromisu atu hamriik ba justisa. PDHJ hato'o apresiasaun ba Servisu Rejionál Saúde Oé-Cusse ba kooperasaun no kompromisu, hodi solusiona problema ne'e. Sira-nia asaun kolektiva transforma keixa pesoál ida ba testamentu ida kona-ba oinsá advokasia no kooperasaun bele restaura direitus umanus ho susesu.

SERVISU PREVENSAUN

Servisu prevensaun reprezenta estratéjia institusionál importante ida ba Provedoria Direitus Humanus no Justisa (PDHJ) ne'ebé orienta ba prevene violasaun direitus humanus no hasa'e konsiénsia ba aplikasaun prinsípiu governasaun di'ak iha servisu públiku.

Akordu ho Dekretu-Lei N.º 31/2016, Artigu 8.º, Direção de Fiscalização e Recomendação desempenha papél estratéjiku iha supervizaun funsionamentu poder públiku no entidade sira ne'ebé ezerse funsaun públika, liu-hosi atividade monitorizasaun, fiskalizasaun no elaborasaun rekomendasaun atu aseguira kumprimentu lei no padraun direitus umanus.

Implementasaun estratéjia ne'e liu-hosi mekanismu fiskalizasaun urjénsia no fiskalizasaun regular, ne'ebé permite PDHJ responde lalais ba situasaun ne'ebé iha poténsia atu viola direitus umanus, no iha tempu hanesan avalia sistematikamente funsionamentu instituisaun públika sira.

Liu-hosi prosesu ida ne'e, PDHJ bele identifika risku no fragilidade institusionál sedu, halo rekomendasaun apropriadu ba entidade relevante, no prevene agravamentu situasaun ne'ebé bele rezulta iha violasaun direitus umanus.

Nune'e mós, servisu prevensaun envolve partisipasaun ativa delegasaun Territoriál sira, kolaborasaun ho instituisaun relevante no sosiedade sivil. Abordajen prevensaun ida ne'e kontribui diretamente ba fortalecimentu transparénsia no responsabilidade instituisaun públika, no promove prestasaun servisu públiku ne'ebé efisiente, inkluzivu no respeita sidadaun sira-nia direitu, liberdade no garantia sira. Nune'e iha parte sira tuirmai, sei deskreve kona-ba servisu fiskalizasaun no monitorizasaun mak PDHJ realiza durante tinan 2025.

1. Fiskalizasaun Urjente

Durante tinan 2025, servisu fiskalizasaun nasional no delegasaun Territoriál Baucau, Maliana, Same no Oecusse hala'o ona fiskalizasaun no monitorizasaun iha área temátiku oioin, hodi aseguira atuasaun entidade públiku nian garante protesasaun direitus umanus no presta servisu públiku ne'ebé justu no efetivu ba comunidade.

Nune'e, iha área saúde públika, fiskalizasaun halo ona ba fatin karantina saúde ne'ebé abandona iha munisípiu Atauro, Liquiça no Ermera, no responde mós ba kazu emerjénsia relasiona ho seguransa no funsionamentu fasilidade saúde, inklui problema ahi mate iha Hospital Nasionál Guido Valadares (HNGV). Monitorizasaun mós halo ba postu saúde sira no verifikasaun kona-ba pagamentu salariu funsionáriu apoiu saúde, nune'e mós haree disponibilidade rekursu umanu iha estabesimentu saúde sira.

PDHJ mós hala'o fiskaliza relasiona ho asuntu seguransa no direitus umanus, responde ba kazu violénsia no alegasaun abuzu autoridade hosi ajente seguransa, inklui agresaun fiziku hosi membru PNTL hasoru joven iha Dili,

kazu tortura hosi guarda prizionál iha Prizaun Gleno, no kazu violénsia hasoru menoridade hosi membru F-FDTL no família. Monitorizasaun mós halo ba situasaun seguransa iha fronteira no kazu konfrontu entre sidadaun no forsa seguransa, nune'e mós akompaña asaun manifestasaun públika iha kapital Dili.

Iha setór edukasaun, fiskalizasaun identifika dezafiu relasiona ho jestaun rekursu umanu no kondisaun aprendizajen estudante sira. Monitorizasaun halo ba prosesu avaliasaun dezempeñu funsióriu edukasaun, reklamasaun profesór voluntariu, no situasaun eskola paralelu ne'ebé amiasadu taka⁵. Nune'e mós, identifika kondisaun infraestrutura edukasaun ne'ebé abandona no situasaun estudante ne'ebé la hetan facilidade apropriadu iha ambiente aprendizajen.

Iha área governasaun di'ak no administrasaun públika, fiskalizasaun hala'o hodi verifika despeza administrativu, funsionamentu servisu públiku no atendimentu sidadaun, inklui balkaun uniku ne'ebé funsiona hodi emite dokumentu identidade ba sidadaun sira, haree servisu notariadu ne'ebé enfrenta problema tekniku. Monitorizasaun mós envolve avaliasaun dixiplina funsióriu públiku, pagamentu subsidu sira ba funsióriu no benefisiáriu sosiál sira, no implementasaun disizaun administrativu hosi instituisaun kompetente.



Foto 16: Provedoria Direitus Umanus no Justisa (PDHJ), liu husi nia Delegasaun RAEOA, halo monitorizasaun ba pagamentu subsidu ba idozu no ema ho defisiénsia hamutuk 256 iha Beneufe, Oecusse. Monitorizasaun ne'e garante katak prosesu ne'e respeita direitus umanus no governasaun di'ak, enkuantu destaka mós dezafiu sira ne'ebé benefisiáriu balun hasoru hodi to'o iha fatin refere

Relasiona ho justisa no direitu ba rai, servisu fiskalizasaun atende kazu disputa rai entre instituisaun públika no comunidade⁶, nune'e mós prosesu despezu administrativu no judisiál relasiona ho pose uma no rai.

⁵ Eskola paralelu Turiscail, klase paralelu Babulo (Same Vila), no eskola Sekundaria paralelu 1912 Fahinehan (Fatuberlihu)

⁶ Disputa entre DSTPSC Munisípiu Lautem ho comunidade suku Fuiloro, Lautem

Monitorizasaun mós halo ba alegasaun fa'an rai ne'ebé la tuir prosedimentu legál⁷.

Kona-ba dezvoltamentu infraestrutura no projetu públiku, fiskalizasaun foka ba projetu sira ne'ebé afeta direta ba comunidade, inklui projetu auto-estrada kosta sul, konstrusaun edifisiu públiku ne'ebé abandona, no projetu estrada rural no sistema kanalizasaun bee. Iha área balun, identifika obra ne'ebé paradu, la fináliza tuir kontratu, ka fináliza maibé la utiliza, ne'ebé bele afeta efisiénsia uza rekursu públiku.

Direitu polítika, sosiál no relasaun comunidade, fiskalizasaun responde ba kazu dezentendementu relijiozu entre grupu comunidade, monitoriza ejistensia relijiaun foun, akompaña prosesu eleisaun Suku Tahube (suku foun), hodi asegura estabilidade sosiál no respeitu ba liberdade relijiaun no partisipasaun demokratiku.

Haree mós servisu imigrasaun no fronteira, hala'o verifikasaun ba kazu relasiona ho movimentu sidadaun no autoridade imigrasaun, inklui desizaun administrativu ne'ebé afeta direitu mobilidade sidadaun⁸.

Ho ida ne'e, fiskalizadór PDHJ nasional no delegasaun Territoriál sira kontinua dezempeña papél importante iha identifikasaun problema estrutural no operasionál iha setór públiku, hodi kontribui ba hasa'e transparénsia, responsabilidade instituisaun públika no protesauun efetiva ba direitos umanus iha territóriu nasional.

Hafoin halo fiskalizasaun hirak ne'e, servisu fiskalizasaun submete ona relatóriu ba Provedór, no Provedór haruka ona karta no/ka enkontru ho entidade relevante sira hodi foti medida sira haktuir ba rekomendasaun sira.



Foto 17: Dili, 7 Novembru 2025 –Provedór Direitos Umanus no Justisa, Virgílio da Silva Guterres “Lamukan” realiza enkontru ida ho lideransa Eletricidade de Timor-Leste (EDTL), Presidente Komisaun Ezekutiva, Paulo da Silva ho nia ekipa téknika, hodi diskute deskobrimentu husi PDHJ nia inspesaun surpresa foin lalais ne'e ba fornecimentu eletricidade iha Ataúro, ne'ebé oras ne'e daudaun funciona de'it oras 18 kada loron.

⁷ Institutu Jestaun Ekipamentu (IJE) hamutuk ho Autoridade Suku fa'an rai mutin ba comunidade sira iha Suku Triloka

⁸ Autoriedade Imigrasaun bandu Sr. Safii'ti tama Timor-Leste

Provedór mós realiza komunikadu imprensa no publika rezultadu monitorizasaun hirak ne'e iha plataforma komunikasaun sosiál PDHJ nia.

Enkuantu, iha kazu balu mak enkamina ba servisu asisténsia publika PDHJ nian hodi rejista no loke ba investigasaun nu'udar iniciativa Provedór hodi halo ezame no/ka avaliasaun kle'an no sistemátiku, nune'e garante satisfasaun ba entidade hotu-hotu.

2. Fiskalizasaun Regular

2.1. Monitorizasaun ba Sela Detensaun Polisiál iha Timor-Leste

Kauza hosi uniforme ba detidu sira laiha, detidu sira ne'ebé detein ho kondisaun isin molik de'it, tanbá laiha uniforme ba sira.



Foto 18: Imagen ne'e ekipa hasai iha sela detensaun esquadra Na'in Feto.

Timor-Leste nia ordem jurídika adota no integra prinsípiu direitu internasionál sira relaciona ho protesaun direitus umanus, tuir konvensaun, tratadu no akordu internasionál sira ne'ebé hetan aprovasaun, ratifikasaun ka adezaun hosi órgaun competente no publika iha jornál republika, hanesan temi iha Artigu 9.º Konstituisaun RDTL.

Ne'ebé komfirma, ema hotu-hotu inklui sira ne'ebé sai detidu, suspeitu ka arguidu, iha direitu atu hetan protesaun hosi Estadu, tanbá ema hotu-hotu iha direitu no dignidade ne'ebé hanesan.

Detidu sira iha direitu atu hetan tratamentu di'ak no dignu iha kualkér momentu, hetan informasaun loloos kona-bá razaun detensaun, no apresenta ba autoridade judisiária competente iha prazu legál, liu-liu iha oras 72 nia laran, atu asegura legálidez prosesuál no prezunsaun inosénsia.

Detidu sira iha direitu atu hetan asisténsia legál hosi advogadu privadu ka defensor públiku, komunika ho família no ema iha liur, hetan asisténsia saúde, alimentasaun no saneamentu ne'ebé apropriadu tuir padraun sira mak aplikavel.

Autoridade polisiál tenke atua detidu sira tuir prinsípiu legálide, nesesidade no proporsionalidade, uza forsa bainhira nesesáriu atu defende - an ka mantén orden públiku.

Aleinde ne'e, sistema jurídku nasional regula mós mekanismu rejistu no dokumentasaun detensaun, inspesaun regulár ba facilidade detensaun no garantia direitu espesífiku ba grupu vulnerável hanesan detidu feto no menor sira.

Bainhira detensaun la tuir prosedimentu legál ka la nesesáriu ona, autoridade kompetente tenke halo libertasaun imédiata no fó - hatene ba Ministériu Públiku tuir lei.

Nune'e, PDHJ nia monitorizasaun ba sela detensaun sira nu'udar mekanizmu ba asegura implementasaun norma sira ne'e, no reflete kompromisu Estado Timor-Leste atu asegura katak prosesu detensaun hala'o tuir lei, respeita dignidade umana no promove responsabilizasaun institusionál.

Durante finan 2025, servisu Fiskalizasaun no Rekomendasaun iha nasional no delegasaun Territoriál sira hala'o monitorizasaun iha sela detensaun polisial 27 iha territóriu nasional, kompostu hosi sela detensaun iha komandu munisipál 8 hanesan Ainaro, Ataúro, Baucau, Bobonaro, Covalima, Ermera, Lautem no RAEOA, nomos eskuadra polisia 19 inklui Laulara, Aileu-Vila, Hatobuilico, Ataúro, Quelicai, Balibo, Tilomar, Dom Aleixo, Na'in Feto, Metinaro, Railaco, Iliomar, Maubara, Liquiça-Vila, Same-Vila, Turiscail, Uatucarbau, Viqueque-Vila, nomos eskuadra sub rejaun Oesilo.

Fiskalizasaun ne'e hala'o hodi observa progresu implementasaun rekomendasaun tinan anterior no atualiza informasaun kona-ba situasaun no kondisaun sela detensaun iha territóriu nasional nu'udar parte hosi estratéjia prevensaun violasaun direitus umanus no promosaun prinsípiu governasaun di'ak iha setór seguransa.

Iha monitorizasaun ne'e, fiskalizador sira observa direta kondisaun sela detensaun, verifica dokumentu administrativu relevante, no entrevista direta ho detidu sira, membru Polisia Nasional Timor-Leste (PNTL) no komandante iha komandu munisipál no eskuadra polisia sira, nomos detidu sira ne'ebé ekipa hasoru.

Dadus rekolla liu-hosi lista mahusuk ne'ebé ekipa prepara ona no integra iha sistema eletroniku (KoboCollect), no analiza ho metodu kuantitativu no kualitativu.

Iha monitorizasaun ne'e, ekipa fiskalizador sira konsege entrevista ho ema 27 (mane 24 no feto 3), ema sira ne'e mak komandante PNTL Munisípiu 8 no Komandante Eskuadra 19.

Aleinde ne'e, ekipa monitorizasaun mós entrevista direta ho detidu 20 kompostu hosi mane 18 no feto 2, hosi sira ne'e, 13 mak ema adultu, joven 6 no idozu ida. Rezultadu monitorizasaun ba sela detensaun polisial tinan 2025, hatudu:

1. Kondisaun infraestrutura iha maioria sela detensaun mak seidauk hatudu mudansa significativu. Hanesan, ventilasaun ladauk apropriadu, odamatan sela balun mak laiha ka aat, koneksaun eletrisidade ladauk di'ak, plafon balun aat no instalasaun bee mós no saneamentu ladauk apropriadu. Purtantu, kuaze detensaun hitu⁹ (26%) hosi sela detensaun mak PDHJ vizita, PNTL uza nu'udar armajen hodi tau ekipamentu polisia. Ne'e afeta funsaun prinsipál sela detensaun nian.
2. Hosi detidu sira ne'ebé ekipa PDHJ hasoru, informa, sira la hetan tortura ka tratamentu aat no degradante durante prosesu kapturasaun no detensaun. Situasaun ida ne'e hatudu progresu iha respeitu dignidade umana. Maske nune'e, importante no nesesáriu atu haree tuir no fó hanoin bebeik ba entidade seguransa sira oinsa atua ho respeitu ba direitos humanos.
3. Rezultadu monitorizasaun ba sela detensaun tinan 2025, hatudu katak, detidu sira seidauk hetan asisténsia legál mak adekuadu no apropriadu hosi advogadu privadu ka defensor públiku durante prosesu detensaun. Situasaun ida ne'e bele afeta direitu detidu sira atu hetan protesaun legál ho apropriadu no tuir padraun legál ne'ebé vigora.
4. Hafoin dada lia ho detidu sira, 65% mak informa, sira konsege kontaktu família bainhira sira kapturadu, enkuantu 35% la-hetan asesu ba komunikaun ho família. 28% hosi sira ne'ebé la komunika ho família, tanbá limita hosi parte polisia. Situasaun ida ne'e refleta nesesidade atu fortaleza mekanizmu protesaun direitu komunikaun ho família.
5. Ekipa fiskalizador PDHJ nota, iha sela detensaun sira laiha programa vizita médiku regular. Médiku sira presente bainhira hetan kontaktu hosi polisia de'it, no maioria sela detensaun mós laiha ekipamentu primeiru sokorru (P3K). Situasaun ida ne'e bele sai risku ba detidu sira nia saúde.
6. Rezultadu monitorizasaun konfirma, asesu ba alimentasaun kontinua sai preokupasaun ba detidu sira. Iha parte barak, fornecimentu hahán depende ba apoiu família ka iniciativa hosi membru PNTL sira.
7. Rezultadu monitorizasaun hatudu, iha sela detensaun balu sistema rejistu detidu ladauk implementa ho konsisténsia. Iha sela detensaun balu, livru rejistu detidu hamutuk ho livru atividade diária polisia nian, iha sela detensaun balu mak ekipa labele asesu ba livru rejistu detidu nian. Situasaun ida ne'e bele afeta transparénsia no responsabilizasaun legál. Tanbá legalidade detensaun la depende deit ba kumprimentu prazu, maibé oinsá aseguza dokumentasaun ne'ebé klaru no kompletu.
8. Progresu ida ne'ebé ekipa fiskalizador PDHJ rejista iha monitorizasaun 2025 mak, maioria komandu munisipál no eskuadra polisia iha ekipamentu operasionál hanesan aljema, gas lakrimogénio, rádio komunikaun, kamera fotografia, computador no makina impresora.

⁹ Esquadra Atauro, Barique, Iliomar, Maubara, Laulara no sela detensaun iha komandu jerál Baucau no Ermera;

Maski nune'e, veikulu no kombustivel sei nafatin nu'udar preokupasaun PNTL nian iha servisu operasionál polisiál.

Hamatan ba averiguasaun no deskobrimentu sira hosi atividade monitorizasaun sela detensaun tinan 2025, PDHJ kontinua subliña importánsia atu autoridade kompetente no relevante sira tau atensaun seriu ba hadia kondisaun detensaun no servisu apoiu relasiona ho protesaun direitus umanus.

Iha kontestu ida-ne'e, PDHJ rekomenda ba Komitee Revizaun Orsamentu, Governu no Parlamentu Nasionál atu tau konsiderasaun masimu ba alokasaun orsamentu hosi Ministériu Interior, liu-liu ba konstrusaun armajem no kazerna ba membru PNTL, rehabilitasaun sela detensaun sira tuir padraun adekuadu, no akizisaun fasilidade bazika hanesan sumaxu, biti ka esponza, uniforme ba detidu sira, no fiskalizasaun ezekeusaun orsamentu ba forneseimentu alimentasaun no kombustivel iha unidade polisiál sira iha territóriu nasionál.

Aleinde ne'e, PDHJ rekomenda ba Ministériu Interiór atu kontinua aloka orsamentu ba konstrusaun no rehabilitasaun edifísiu komandu no esquadra PNTL sira, inklui instalasaun eletrisidade, kanalizasaun bee mos, instalasaun Closed-Circuit Television (CCTV), no manutensaun fasilidade detensaun sira tuir padraun internasionál.

Iha tempu hanesan, Ministériu Saúde presiza fortalese programa vizita médika regulár no fornese ekipamentu primeiru sokoru iha sela detensaun sira. Enkuantu Ministériu Justisa no Defensoria Pública Jerál presiza aumenta númeru defensor públiku no koloka defensor permanente iha jerál sira nomos RAEOA hodi aseguira asisténsia legál ne'ebé efetivu ba detidu sira.

Ba Komandu Jerál PNTL, PDHJ rekomenda atu hadi'a sistema jestaun sela detensaun, inklui separasaun sela ba mane no feto, garantia forneseimentu alimentasaun, akizisaun fasilidade bazika ba detidu sira, no manutensaun transporte operasionál.

Iha nivel institusionál, PDHJ mós konsidera importante atu kontinua promove kapasidade membru PNTL sira, liu hosi formasaun kona-bá padraun internasionál sira inklui regras Mandela, atu aseguira katak jestaun detensaun hala'o tuir prinsipiu dignidade umana no respeitu ba direitus umanus.

2.2. Monitorizasaun ba Prizaun iha Timor-Leste

Artigu 9.º hosi Konstituisaun Repúblika Demokrátika Timor-Leste (RDTL) determina ordem jurídiku nasionál simu no integra prinsipiu no norma sira hosi direitu internasionál sira ne'ebé estadu aprovasa, ratifika ka adezaun ba tratadu no konvensaun internasionál sira, ne'ebé Timor-Leste ratifika ona instrumentu internasionál importante sira, inklui Paktu Internasionál kona-ba Direitus Sivil no Polítiku, Paktu Internasionál kona-ba Direitus Ekonómiku, Sosiál no Kultural, Konvensaun kontra Tortura, Konvensaun kona-ba Eliminasan Diskriminasaun hasoru Feto, no Konvensaun kona-ba

Direitus Labarik, nu'udar baze importante ba protesaun direitos umanus iha Timor-Leste.

Purtantu, Konstituisaun RDTL, Artigu 30.º, 32.º no 34.º, garante direito fundamentál sira ba ema hotu-hotu ne'ebé hetan restrisaun liberdade, inklui direito atu hetan informasaun kona-ba razaun defensaun, assisténsia jurídika, no garantia prejunsan inosénsia to'o tribunál fó desizaun finál.

Lei mós bandu tratamentu kruél, dezumanu ka degradante. Rejime Ezekusaun Penál (Dekretu-Lei nú. 14/2014) no Rejime Kareira Espesiál Guarda Prizionál (Dekretu-Lei nú. 10/2012) define regra operasionál sira kona-ba tratamentu ema-dadur no papél pesoál guarda prizionál sira.

Lei sira ne'e garante direito ba ema ne'ebé dadur atu hetan kondisaun moris adekuada hanesan hetan ka asesu ba assisténsia saúde, hahán, vizita família, no oportunidade ba edukasaun no reintegrasaun sosiál, inklui protesaun espesiál ba feto isin - rua no labarik sira.

Iha tempu hanesan, guarda prizionál iha dever atu mantein seguransa, ordem no dixiplina iha estabelesimentu prizionál, ho prinsípiu respeito ba dignidade no direitos umanus ema-dadur sira.




Foto 19: Iha Prizaun Becora ema dadur sira kuru bee no lalin hosi bloku liur lori tau ba tanki sira iha sela laran

Nune'e durante tinan tomak, PDHJ halo vizita ba estabelesimentu prizionál sira iha territóriu nasionál hodi rekolla informasaun kona-bá situasaun no kondisaun prizaun nomos dadur sira liu hosi halo observasaun direta, foti dokumentasaun nomos halo entrevista estrutural ho autoridade Prizionál, Pesoad Saúde no prezu sira iha prizasaun, uza mahusuk sira ne'ebé ekipa prepara no dezenvolve ona ho konsiderasaun ba lei nasionál no internasionál sira, inklui Regras Nelson Mandela nian ne'ebé ONU adopta ona liu husi rezolusaun assembleia jerál iha kongresu loron 17 Dezembru 2015.

Monitorizasaun ne'e nu'udar aktu prevensaun krime no tratamentu ba Ofensór sira, buka atu apresenta prinsípiu sira no prátika di'ak kona-ba tratamentu ba ema-dadur sira (ema-dadur penál, sivíl, no dadur preventiva sira) inklui ko'alia kona-ba jestaun instituisaun prizaun nian.


Monitorizasaun ne'e realiza semestralmente (kada fulan neen), ekipa fiskalizador PDHJ vizita no entrevista alvu sira kompostu hosi Autoridade Prizonál, Pesoal Saúde no prezu sira.

Nune'e, tinan ne'e PDHJ vizita dala rua ba prizaun Becora, Gleno no Suai, ne'ebé entrevista dadur 105 inklui dadur feto 12, dadur defisiente nain tolu, juvenil 10, idozu nain lima no estranjéiru rua. Aleinde dadur sira, entrevista mós diretór servisu prizonál nain tolu, guarda prizonál 17, no pesoal saúde nain tolu.



PDHJ nia monitorizasaun ba estableimentu prizonál sira hodi komfirma kestaun sira relasiona ho kondisaun infraestrutur, atendimentu ba prezu sira, kondisaun no situasaun autoridade prizonál sira nian, ne'eb'e sei dekreve tuirmai.

Prizaun Becora, Gleno no Ermera nu'udar fatin ofisiál ne'ebé estadu estabese hodi dadur ema ne'ebé tribunál deside ona katak sala, ka hein desizaun hosi tribunál, hodi kumpri pena tuir sentensa. Ne'ebé prizaun Becora bele akumula prezu to'o 290, prizaun Gleno bele akumula prezu to'o 120 nune'e mós prizaun Suai hanesan ilustra iha grafiku tuirmai:



Grafiku iha leten hatudu prizaun Becora no Suai enfrenta sobrelotasaun. Ne'ebé oras ne'e prizaun Becora akumula prezu mane hotu ema hamutuk 417, kondendu 351 no preventiva 66. Hosi total prezu sira ne'e, Ema ho Deficiente 31, nomos ema estranjéiru 15 hosi nasaun Indonézia 7, Bulgaria 1, Nepal 1, Cina 3, Bangladez 2 no Nigeria 1.

Iha prizaun Gleno akumula prezu hamutuk 108, kompostu hosi prezu feto 24 no mane 84, kondenadu hamutuk 101 no prizaun preventiva 7. Ema estranjéiru nain 3 hosi Indonézia.

Labarik (bebe) nain tolu (3), ida ho idade fulan ida, ida seluk ho idade fulan neen no ida tan ho idade tinan ida mak hamutuk ho sira nia inan dadur mós iha prizaun Gleno. Hosi labarik nain tolu ne'e ida ho kondisaun deficiente fiziku (ain).

Entrentatu iha prizaun Suai akumula prezu hamutuk 122 kompostu hosi mane 121 no feto 1, kondenadu 105 no preventiva 17. Hosi sira, prezu nain tolu mak Ema ho Deficiente.

Iha **prizaun Becora**, identifika katak plafon iha bloku A no D lahu no iha parte ruma monu, ne'ebé iha ameasa direta ba seguransa dadur sira iha bloku refere. Iha tempu udan, bee tama ba sela laran no halo fatin toba bokon, rezulta dadur sira labele toba ho di'ak.

Maski iha tinan kotuk halo ona rehabilitasaun ba parte ruma hosi estabesimentu ne'e, kondisaun ne'e kontinua mosu no presiza atensaun hosi parte competente sira.

Kondisaun odamatan sela iha Bloku A to'o D mós identifika aat no labele xave, nune'e dadur sira iha bloku refere bele halo movimentu livre entre sela sira. Situasaun ne'e bele prezudika seguransa no komfortu dadur seluk, liu-liu bainhira sira sente la seguru bainhira toba.

Entretantu, iha Bloku A, B, C, F no Bloku Centru, ekipa identifika sobrelotasaun (overcapacity), tanbá kada sela akomoda dadur nain 4, ne'ebé nain rua toba iha sela laran no nain rua seluk toba iha salaun ne'ebé kondisaun odamatan aat, ne'e kontribui ba risku seguransa.

Nune'e, kondisaun seguransa iha bloku sira presiza atensaun imediata tanbá maioria odamatan sela aat no laiha sistema CCTV ne'ebé destakadu iha kada bloku. CCTV ne'ebé iha sala vizita família no fatin entrevista mós identifika aat hotu ona.

Iha Semestre I tinan 2025, ekipa monitorizasaun mós identifika falta bee iha estabesimentu prizonál Becora, ne'ebé obriga dadur sira kuru bee hosi bloku liur hodi uza ba hemu, haris, uza ba sintina no fase roupa.

Entretantu, facilidade judisiál iha Tribunál Oe-Cusse, sela tranzitória ne'ebé tenke uza ba dadur sira durante prosesu julgamentu, oras ne'e uza hanesan armajen atu rai materiál tribunál nian. Tanbá ne'e, bainhira dadur sira lori ba tuir julgamentu iha tribunál refere, sira hela deit iha postu seguransa tribunál, situasaun ne'e bele afeta seguransa no dignidade dadur sira durante prosesu judisiál.



Foto 20: Kondisaun dapur no fatin rai aihan iha prizaun Becora iha Premeiru semestral tinan 2025 Prizaun Becora

Iha **prizaun Gleno**, PDHJ identifika iha Bloku A, dadur feto nain rua seidak hetan facilidade toba adekuadu hanesan kulsaun, sumasu no manta, tanbá dadur sira ne'e foin tama iha estabesimentu no atualmente toba deit iha biti.

Iha Bloku C, identifika didin-lolon lahuk, tohik no rahun, ne'ebé bele fó ameasa ba seguransa dadur sira, partikularmente iha tempu udan ka bainhira mosu rai-nakdoko. Aleinde ne'e, kondisaun estrutura ne'ebé rahun mós fasilita possibilidade ba dadur sira atu halo rahun atu halai sai hosi sela, ne'ebé aumenta risku seguransa iha estabesimentu prizonál refere.

PDHJ mós identifika plafon iha Bloku A, ne'ebé utiliza ba atividade formasaun, identifika monu no bele fó ameasa ba dadur feto sira bainhira partisipa iha atividade formasaun iha fatin refere. Odamatan iha sela, Bloku A mós aat, ne'ebé fó inseguransa ba dadur sira iha bloku refere.

Durante vizita iha semestre dahuluk, ekipa monitorizasaun identifika katak dadur sira seidak asesu ba materiál hijiene báziku hanesan sabaun haris, sabaun fase roupa, shampoo, eskova nehan, pasta dente no gilette. Situasaun ne'e bele afeta nivel ijene pesoál no saúde dadur sira.

Aleinde ne'e, sistema kanalizasaun bee ba estabesimentu refere uza hamutuk ho comunidade iha Suku Fatuquero, ne'ebé frekuentemente hetan estragus hosi comunidade, nune'e kontribui ba falta bee iha prizaun no difikulta asesu dadur sira ba bee hodi fasilita sira nia nesesidade lorloron.

Relasiona ho servisu saúde, sala postu saúde iha prizaun refere identifika ho espasu limitadu no laiha armáriu adekuadu atu rai materiál saúde no aimoruk.

Iha estabesimentu prizionál ne'e mós, to'o agora seidauk iha sistema CCTV, inklui iha bloku sela sira, sala vizita família no fatin entrevista, ne'ebé bele afeta nivel seguransa no kapasidade monitorizasaun iha estabesimentu laran.



Foto 21: Rezultadu monitorizasaun tinan 2025, Plafon Bloku A. (foto) Prizaun Gleno ne'ebé monu ne'ebé seidauk hetan manutensaun

Iha Estabesimentu **Prizionál Suai**, identifika katak uniforme ba prezú foun sira seidauk disponível, nune'e dadur sira ne'e la asesu kedas ba uniforme prizaun nian bainhira foin tama.

Situasaun seluk mak iha Bloku A, ne'ebé utiliza ba dadur preventiva, identifika kondisaun sobrelotasaun (overcapacity), tanbá sela refere iha kapasidade atu akomoda dadur nain 4–5 deit, enkuantu atualmente akomoda entre dadur nain 7–9, ne'ebé rezulta dadur sira toba sena malu no halo sira la konfortavel.

Aleinde ne'e, salaun vizita família atualmente utiliza hanesan bloku alternativa ba dadur kuzineiru sira tanbá espasu alojamentu la natoon.

Fatin entrada prinsipal ne'ebé normalmente utiliza ba vizita família mós uza hanesan fatin vizita, nune'e dadur ho família sira konversa sente la livre.

Durante vizita iha semestre II, ekipa monitorizasaun identifika katak bloku postu saúde utiliza fali hanesan sela alternativa ba dadur feto nain ida ne'ebé transferidu hosi estabesimentu prizionál Gleno hodi hein prosesu julgamentu iha tribunál Suai. Nune'e, salaun formasaun ba dadur sira mak sai hanesan fatin konsulta saúde bainhira dadur sira presiza atendimentu saúde.

Iha aspetu infraestrutura no seguransa, identifika katak estabesimentu prizaun Suai seidauk iha moru externa adekuadu, ne'ebé aumenta risku

inundasaun iha tempu udan. Parte seluk ne'ebé presiza atensaun urgente mak falta postu vijilánsia, rede separasaun entre bloku sira, lampu sorot no sistema CCTV.

Aujénsia facilidade seguransa sira ne'e bele afeta kontrolu seguransa no monitorizasaun iha estabesimentu, liu-liu iha período kalan no situasaun emerjénsia.

Abstante hosi problema sira mak ekipa fiskalizador PDHJ identifika no apresenta iha parte anterior, PDHJ mós identifika mudansa pozetiva ka kondisaun adekuadu sira iha estabesimentu prizionál sira hanesan tuirmai:

Iha Estabesimentu Prizionál Becora, kada sela iha ona facilidade sintina no haris-fatin ho kondisaun di'ak. Prezu sira kada fulan simu materiál hijiene hanesan sabaun, rinso, pasta dente, shampoo, gilette, nomos kada bloku simu materiál limpeza nian hanesan aisar, hena hamos rai no materiál hamos sintina.

Iha semestre daruak tinan 2025 nian, PDHJ identifika katak sistema kanalizasaun bee iha estabesimentu ne'e hadi'a ona, nune'e prezu sira la presiza kuru bee hosi bloku liur. Prezu hotu iha asesu ba facilidade toba nian hanesan kulsaun, manta taka no sumasu. Bloku no sela sira mós iha asesu ba eletrisidade durante oras 24/7, ho ventilasaun adekuadu atu aseguira sirkulasaun anin ne'ebé di'ak.

Purtantu, iha estabesimentu Prizionál Gleno, dadur hotu asesu ona ba uniforme prizaun nian no facilidade toba hanesan kulsaun, sumasu no manta.

Iha bloku feto nian, kada sela iha haris-fatin no sintina, inklui asesu ba bee mós atu hemu, haris no fase roupa. Dadur hotu asesu ba materiál hijiene no limpeza, no ba dadur feto sira, iha mós asesu ba roupa interior feto nian, pensu no hand body. Bloku no sela hotu iha asesu ba eletrisidade no ventilasaun adekuadu atu garante sirkulasaun anin ne'ebé di'ak.


Enkuantu iha estabesimentu prizionál Suai, prezu hotu asesu ba facilidade toba nian hanesan kulsaun, sumasu no manta hodi taka bainhira toba. Sela prizaun hotu iha asesu ba eletrisidade no ventilasaun ne'ebé di'ak ba sirkulasaun anin. Kada sela iha haris-fatin no sintina ho kondisaun di'ak, no prezu hotu asesu ba materiál hijiene hanesan sabaun haris, sabaun fase roupa, shampoo, eskova kose nehan, pasta dente no gilette, inklui materiál limpeza. Prezu sira mós iha asesu ba bee mós atu hemu, haris no fase roupa.

Entretantu, prezu sira hatu'o preokupasaun prinsipál sira relasiona ho limitasaun asesu ba justisa no asisténsia legál, inklui demora iha prosesu julgamentu no atraju iha emisaun karta likida ba prezu sira ne'ebé kumpri ona pena.

Prezu sira mós manifesta difikuldade iha asesu ba vizita família, liu-liu família sira ne'ebé mai hosi dook. Maioria prezu informa sira la hetan tratamentu aat hosi autoridade prizionál. Enkuantu prezu nain rua hosi prizaun Becora hatu'o katak sira hetan basa hosi guarda prizionál, prezu nain rua iha

prizaun Glenomos relata, sira hetan tratamentu aat no dezumanu hosi guarda prizaun. Situasaun ne'e hatudu, haree hosi númeru ki'ik maibé hatudu risku violasaun ba dignidade no integridade ba prezu sira sei eziste.

Prezu sira husu parte competente atu tau konsiderasaun no tau importansia ba kestaun no/ka situasaun hirak hodi aseguira respeitu ba direitu no dignidade prezu sira nian tuir padraun no prinsípiu direitus umanus.



Grafiku iha leten, ilustra, to'o 2025 nia rohan, númeru guarda prizionál iha Timor-Leste hamutuk 280, kompostu hosi feto 54 no mane 226 mak fó atendimentu ba prezu sira iha prizaun Becora, Gleno no Suai.

Iha monitorizasaun ne'e, autoridade prizionál sira iha prizaun Becora, Gleno no Suai apresenta dezafiu ne'ebé sira enfrenta relasiona ho rekursus umanus, rekursus materiais, rekursus finanseiru, fornecimentu alimentasaun, no sistema promosaun kareira guarda prizionál sira nian.

Ne'ebé autoridade prizionál sira ezije formasaun ba sira kona-ba direitus umanus hodi hasa'e sira konñesimentu nune'e bele melloria sira nia atendimentu ba ema-dadur sira. Iha parte seluk, iha Prizaun Becora, guarda balun tama ona ba reforma obrigatóriu, ne'ebé bele afeta continuidade servisu seguransa.

Entretantu, rekursu materiais liliu fasilidade seguransa iha prizaun sira seidakuficiente. Iha Prizaun Becora, Gleno no Suai, ekipamentu esensial sira hanesan alzeima, gas lakrimozenu, stik seguransa, radio komunikaun no lampu vijilánsia menus no balu aat.

Iha Prizaun Suai, kazerna ka guarda sira nia hela fatin sai mós preokupsaun, tanbá maioria guarda hela iha fasilidade tuan ho kondisaun aat no laiha seguransa adekuadu.

Enkuantu, guarda prizionál sira informa katak, kada tinan servisu prizionál laiha orsamentu propriu, ne'ebé difikulta ba jestaun operasionál, liu-liu bainhira guarda presiza halo deslokasaun hodi fó seguransa ba ema-dadur

sira iha prosesu julgamentu. Durante ne'e, guarda sira uza osan rasik hodi hala'o servisu sira, enkuantu prosesu reembolsu osan viajen lokál prosesa kleur.

Iha prizaun Becora qualidade no kuantidade aihan ba guarda prizionál sira konsidera la adekuaudu tuir padraun ne'ebé estabelese, enkuantu durante tinan 2025, kompania fornecedor hapara fornese aihan ba guarda prizionál sira iha Prizaun Gleno no Suai sein justifikasaun klaru, ne'ebé afeta bem-estar no kapasidade guarda sira hodi hala'o sira nia funsaun.

Guarda prizionál sira mós destaka preokupasaun relasiona ho estagnasaun promosaun no implementasaun estatutu kareira, ne'ebé seidak aplika efetivamente maski promulgadu ona desde tinan 2010. Situasaun ne'e konsidera afeta motivasaun no morál profissional guarda prizionál sira iha sira nia servisu loroloron.

Rezultadu monitorizasaun hatudu, maski iha progresu significativu iha forneshimentu facilidade báziku hanesan asesu ba eletrisidade, ventilasaun, facilidade hijiene no materiál limpeza iha maioria estabehesimentu prizionál sira, dezafiu prinsipál kontinua eziste relasiona ho infraestrutura, seguransa, sobrelotasaun no servisu saúde.

Problema sira hanesan plafon lahuk, odamatan aat, falta CCTV, no limitasaun facilidade seguransa ba guarda prizionál sira hatudu nesesidade atu halo intervensaun urjente hosi autoridade competente sira. Bainhira situasaun ne'e la hetan atensaun imédiata bele aumenta risku seguransa, afeta dignidade dadur sira no limita kapasidade instituisaun prizionál atu opera ho efektivu no seguru.

Aleinde ne'e, rezultadu monitorizasaun mós demonstra, maski iha esforsu hosi entidade relevante sira, seidak iha mudansa significativu iha área balun, liu-liu relasiona ho jestaun populasaun prizaun, atendimentu saúde no rekursu operasionál.

Tanbá ne'e, presiza iha atensaun integradu hosi entidade relevante sira hodi melloria kondisaun servisu guarda prizionál sira, nune'e garante seguransa institusionál no asegura katak servisu prizionál bele hala'o tuir padraun direitus umanus no prinsípiu governasaun di'ak.

Bazeia ba rezultadu ne'ebé hetan, Provedór Direitos Humanos no Justisa rekomenda ba órgaun competente sira, liu-liu Governu ho apoiu Parlamentu Nasionál, atu fó atensaun prioritária ba alokasaun orsamentu no desenvolvimentu polítika públika ne'ebé orienta ba konstrusaun prizaun foun, melloria infraestrutura prizaun sira ne'ebé eziste, no garantia separasaun ema-dadur tuir categoria sira hanesan adulto, juvenil, feto, no ema ho kondisaun saúde mental ka nesesidade espesiál.

Rekomenda atu aselera prosesu justisa ba ema-dadur ho estatutu preventiva, haforsa servisu saúde prizaun, aumenta ekipamentu seguransa, no hasa'e kapasidade profissional guarda prizionál sira.

PDHJ mós husu atu estabelese mekanizmu kooperasaun entre Ministériu Justisa ho entidade relevante sira hanesan Ministériu Saúde, Tribunál no Polísia Nasionál Timor-Leste, atu aseguara atendimentu integradu ba emadadur sira no garante protesaun ba sira nia direitu fundamental.

Nune'e mós, PDHJ husu atu autoridade prizonál sira fó atensaun ba direitu vizita família no dezvoltamentu programa formasaun téknika ba prezu sira, hodi fasilita prosesu reabilitasaun no reintegrasaun sosiál.

Rekomendasaun hirak ne'e, PDHJ espera katak entidade relevante sira iha vontade polítika, profesionál no téknika hodi implementa medida sira ne'ebé nesesáriu, atu dezvoltave sistema prizaun iha Timor-Leste ne'ebé respeita dignidade umana no garante direitu ema hotu-hotu, ho abordajen progresivu, neneik maibé bebeik ba Timor-Leste ida ne'ebé respeita no proteje direitos humanos ho servisu públiku mak justu no efetivu.

2.3. Monitorizasaun Hospital, Sentru Saúde no Postu Saúde Sira

PDHJ nia servisu fiskalizaun iha setór saúde reflete implementasaun direta ba mandatu institusionál hodi promove, proteje no defende direitos humanos no governasaun di'ak.

Direitu asesu ba saúde garantidu iha Konstituisaun RDTL no konvensaun internasionál sira ne'ebé Timor-Leste ratifika ona, nune'e monitorizasaun regulár ba establesimentu saúde sira funsiona hanesan mekanizmu prevensaun ba violasaun direitu sidadaun nian relasiona ho assisténsia saúde.

Servisu ne'e integra iha estratéjia institusionál PDHJ nian 2024 – 2028 ba servisu prevensaun, ne'ebé orienta atu haforsa sosiedade sensível ba direitos humanos no governasaun di'ak, liu-hosi mekanizmu kontrolu no prevensaun ne'ebé efetivu.

PDHJ nia espetativa, rezultadu monitorizasaun ne'e bele sai baze ba entidade relevante sira atu hatene no komprende kona-ba kondisaun no situasaun sistema saúde iha rai laran hodi foti medida adekuadu, nune'e kontinua melloria kualidade servisu saúde hodi garante realizasaun efetiva direitu sidadaun sira nian ba saúde.


Métodu ne'ebé uza iha monitórizasaun ida ne'e mak observasaun direta iha establesimentu saúde sira ne'ebé identifikadu, uza lista verifikasaun (checklist) tuir padraun fiskalizaun PDHJ nian hodi konfirma disponibilidade ai-moruk, ekipamentu, facilidade laboratoriu no maternidade, nomos rekursu umanu.

Iha 2025, servisu fiskalizaun no rekomendasaun PDHJ vizita establesimentu saúde hamutuk 34 kompostu hosi ospitál nasional ida, ospitál referral lima, Institutu Nasionál Farmásia no Produto Medikamentu (INFPM) Dili, sentru saúde komunitária no internamentu 25, no postu saúde rua iha jerál Aileu, Ainaro, Ataúro, Baucau, Bobonaro, Covalima, Dili, Ermera, Lautem, Liquiça, Manatuto, Manufahi, Viqueque no Rejiaun Administrativa Espesiál Oe-Cusse Ambeno (RAEOA).

Ekipa mós halo entrevista ho autoridade relevante sira hamutuk 132, kompostu hosi diretór ospitál sira, director kontrolu kualidade INFPM, xefe departamentu sira, xefe sentru saúde sira, coordenador postu saúde sira, farmasista sira, parteira sira nomos analista laboratóriu sira.

Entrevista ho entidade hirak ne'e hodi klarifika no valida informasaun kona-ba jestaun servisu saúde, liu-liu relasiona ho jestaun stok ai-moruk, kapasidade rekursu umanu, nomos kondisaun fasilidade saúde sira.

Kombinasaun observaun no entrevista ne'e garante katak dados ne'ebé hetan sai prezizu no representativu.



1. Kona-ba Medikamentu

Rezultadu monitórizaun hatudu, jestaun no disponibilidade medikamentu kontinua sai nu'udar kestaun kítiku iha prestasaun servisu saúde iha Timor-Leste. Iha ospitál, sentru saúde no postu saúde sira, disponibilidade medikamentu esensial no vital sira seidak konsistente, liu-liu iha sentru saúde komunitária no sentru saúde internamentu enfrenta *stock out*, ne'ebé afeta kualidade tratamentu no asisténsia saúde ba pasiente sira.

Problema *stock out* relasiona ho problema planifikasaun no jestaun armajen medikamentu, liu-liu tanbá prosesu pedidu no distribuisaun medikamentu depende barak ba mekanizmu administrativu no dados *stock* ne'ebé seidak padronizadu ka atualiza regularmente.

Sistema jestaun *stock* iha fasilidade saúde balun sei uza métodu manuál, ne'ebé aumenta risku erru administrativu, enkuantu utilizaun sistema dijitál hanesan M-Supply mós hasoru dezafiu tékniku hanesan limitasaun asesu internét no abilidade / koñesimentu pesoál, nune'e kontribui ba atrazu iha prosesu pedidu ka distribuisaun medikamentu nune'e hamosu *stock out* ka *stock* excedente iha nivel fasilidade saúde sira.

Insufisiénsia medikamentu ka *stock out* konsidera hanesan risku sistemátiku ba realizaun direitu sidadaun nian atu hetan asisténsia saúde ne'ebé adekua no kontínua. Aleinde ne'e, observa alokasaun orsamentu ba akizisaun medikamentu seidak suficiente, ne'ebé limita volume disponibilidade medikamentu.

Nu'udar estadu iha obrigasaun atu asegura disponibilidade, asesibilidade no kualidade medikamentu iha nivel fasilidade saúde hotu-hotu, ho konsiderasaun ba fatór sira hanesan númeru populasaun, frekuensia moras sira, presu medikamentu iha merkadu no kapasidade sistema saúde.

Nune'e, presiza haforsa sistema planifikasaun, alokasaun orsamentu, akizisaun, armazenamentu no distribuisaun medikamentu tuir padraun aplikável sira, hodi aseguira disponibilidade medikamentu iha nivel facilidade saúde hotu-hotu.

Presiza fó atensaun ba kondisaun armazenamentu medikamentu iha facilidade balun, liu-liu kona-ba kontrolu temperatura, ventilasaun no disponibilidade ekipamentu hanesan *refrigerator*, ne'ebé importante atu mantén qualidade medikamentu.

2. Facilidade, ekipamentu no materiál sira

Iha monitorizasaun ne'e, ekipa PDHJ mós foku ba facilidade no disponibilidade ekipamentu saúde ne'ebé nu'udar fator importante iha garantia qualidade prestasaun servisu saúde.

Nune'e ekipa haree disponibilidade no kondisaun ekipamentu laboratoriu hanesan mikroskópiu, centrifuge, hemoglobin meter, glucometer, incubator laboratoriu, test rapidu no materiál laboratoriu seluk ne'ebé importante atu suporta servisu diagnostiku báziku.

Observa mós ekipamentu maternidade hanesan *delivery bed*, fetal doppler, partus kit, tensiómetru, tetu (*timbangan*) inan no bebé, no materiál suporta partus seluk tan, ne'ebé importante atu garante seguransa inan isin-rua no bebé durante prosesu partus.

Aleinde ne'e iha monitorizasaun ne'e haree mós disponibilidade materiál suporta servisu kliniku hanesan *stethoscope*, tensiometer, thermometry, oxygen concentrator, nebulizer, infusion stand, autoclave, refrigerator ba armazenamentu medikamentu no vasinasaun, nomos materiál konsumível hanesan maskara, seringa, gaze no materiál esterilizasaun seluk tan.

Rezultadu monitorizasaun komfirma, iha ospital, sentru saúde no postu saúde sira, facilidade no ekipamentu balu disponivel maibé kondisaun tuan no ladi'ak ona kauza laiha manutensaun regular ne'ebé afeta ba efisiénsia servisu no seguransa pasiente sira.

Aleinde ne'e, kondisaun facilidade suporta hanesan sala tratamentu, sala maternidade no área laboratoriu iha fatin balun presiza hetan rehabilitasaun ka manutensaun, hodi aseguira kondisaun hijiene, seguru no konfortu tuir padraun aplikável sira.

Eletrisidade, bee mós no refrigerator sai nu'udar elementu importante atu garante operacionalizasaun facilidade saúde ho di'ak, nune'e presiza tau atensaun ba nia fisionamentu regular.

Situasaun ida ne'e hatudu katak, sistema planifikasaun, alokasaun rekursu nomos sitema kontrolu iha setór saúde ladauk efetivu no responsivu. Nune'e, akizisaun, manutensaun ba facilidade no ekipamentu saúde ladauk efetivu, ne'ebé afeta ba qualidade prestasaun servisu saúde ne'ebé la efetivu, la seguru tuir padraun saúde nian.

3. Rekursu Umanu

Rekursu umanu nu'udar elementu fundamentál iha funsionamentu sistema saúde, tanbá qualidade no efetividade prestasaun servisu saúde depende diretamente ba disponibilidade no kompeténsia profesionál saúde sira.

Profesionál saúde hanesan médiku, enfermeiru, parteira no tékniku saúde sira iha papél estratéjiku atu asegura prestasaun servisu saúde ne'ebé seguru, efetivu no responsivu ba nesesidade populasau.

Entidade internasionál sira, inklui Organizasaun Mundial Saúde (OMS), rekomenda katak disponibilidade rekursu umanu ho kapasidade adekuaudu nu'udar kondisaun esensiál atu garante fornese kuidaun saúde ne'ebé efetivu no qualidade ba sidadaun sira.

Entretantu, to'o oras ida ne'e, rekursu umanu iha estabesimentu saúde sira iha Timor-Leste kontinua sai nu'udar dezafiu krítiku iha prestasaun servisu saúde.

Iha nível ospital, sentru saúde no postu saúde sira, observa katak disponibilidade profesionál saúde la ekilibradu no la distribui ho maneira proporsional. Iha facilidade balun, númeru pesoál la suficiente atu responde ba volume pasiente ne'ebé aas, enkuantu iha facilidade seluk observa akumulasaun profesionál saúde ne'ebé liu nesesidade. Kondisaun ida ne'e hamosu sobrekarga servisu iha facilidade balun no afeta ba efikasias prestasaun servisu saúde.

Situasaun ida ne'e agrava tanbá limitasaun iha eskema substituisaun no rotasaun pesoál, inklui difikuldade atu atrai no motiva profesionál saúde sira atu servisu iha área remota no periféria.

Estabesimentu saúde iha área periferia no jerál balun nafatin enfrenta problema seriu tanbá laiha profesionál saúde permanente no depende ba vizita ka rotasaun temporária, ne'ebé la suficiente atu garante kontinuidade no efetividade servisu.

Aleinde ne'e, kapasidade téknika rekursu umanu iha facilidade balun prezisa hetan fortaleseimentu, liu-liu iha área diagnostiku, emerjénsia no saúde maternal-infantil.

Nune'e, nesesáriu atu hadia prosesu planifikasaun no kolokasaun rekursu umanu iha setór saúde, inklui mekanizmu rekrutamentu no apresia ka dignifika profesionál saúde sira ne'ebé orienta ba motiva no asegura estabilidade servisu. Nune'e, bele asegura katak estabesimentu saúde hotu-hotu iha territóriu nasional iha rekursu umanu ne'ebé suficiente no competente hodi fornese servisu saúde ne'ebé adekuaudu, efetivu no tuir padraun qualidade ne'ebé aplikável.

Rezultadu fiskalizasaun iha estabesimentu saúde sira iha nível ospital, sentru saúde no postu saúde hatudu katak prestasaun servisu saúde iha territóriu nasional kontinua enfrenta dezafiu signifikativu ne'ebé prezisa atensaun urjente hosi entidade relevante sira.

Dezafiu prinsipal sira identifikadu relasiona ho limitasaun iha disponibilidade medikamentu esensial, kondisaun fasilidade no ekipamentu saúde ne'ebé seidauk adekuadu, nomos distribuisaun rekursu umanu ne'ebé seidauk ekilibradu entre fasilidade saúde sira, liu-liu iha área periférika no remota.

Situasaun hirak ne'e bele afeta diretamente kualidade, continuidade no efetividade prestasaun servisu saúde ba populasau, no potensialmente hamosu sobrekarga servisu ba profesionál saúde sira.

Nune'e, presiza iha medida integradu no sustentável hodi hadia sistema jestaun iha setór saúde, liu-liu iha área planifikasaun nesesidade medikamentu, manutensaun fasilidade no ekipamentu, nomos jestaun no distribuisaun rekursu umanu tuir nesesidade real iha kada fasilidade saúde.

Fornese ekipamentu no materiál ne'ebé adekuadu ba laboratoriu no maternidade, nomos halo konstrusaun no reabilitasaun infraestrutura báziku hanesan instalasaun eletrisidade, bee moos, haris-fatin no fasilidade suporta seluk tan ne'ebé importante ba prestasaun servisu saúde.

PDHJ mós rekomenda ba Ministériu Saúde no entidade relevante sira atu aumenta alokasaun orsamentu ba akizisaun ai-moruk tuir padraun internasionál, hodi aseguza disponibilidade produktu medikamentu ne'ebé la-kotu (*continuo*).

Haforsa sistema planifikasaun, jestaun no monitorizasaun medikamentu, nomos aumenta investimentu iha infraestrutura no ekipamentu saúde.

Presiza dezenvolve polítika rekursu umanu ne'ebé orienta ba distribuisaun ekilibradu no motivasaun profisionál saúde sira, liu-liu iha área remota sira presiza aumenta número profisionál saúde hanesan enfermeiru, parteira, farmasista, analista laboratoriu no médiku espesializadu, nomos fornese oportunidade formasaun kontinua hodi eleva kapasidade no kompeténsia profisionál sira.

Bainhira ita implementa medida hirak ne'e ho forma konsistente, sistemátiku no koordinadu sei bele kontribui ba garantia prestasaun servisu saúde ne'ebé efetivu, seguru, kualidade, dignu no tuir padraun hodi responde di'ak liu ba sidadaun sira nia nesesidade saúde iha território nasional.

2.4. Monitorizasaun regular ba Instituisaun Solidariedade Sosiál

Fornese seguransa no/ka tulun sosiál ba sidadaun sira mak presiza nu'udar ordem konstitusionál. Nune'e, Governu liu hosi Ministeriru Solidariedade Sosiál no Inklusaun (MSSI) fó apoiu ba instituisaun solidariedade sosiál no entidade seluk ne'ebé la ho fins-lukrativu mak presta seguransa no tulun sosiál ba sidadaun sira.

Prosesu apoiu ne'e hahú desde finan 2008 ba instituisaun solidariedade sosiál hamutuk 64 tuir tipu resposta sosiál, konforme rejime jurídku aplikável.

Entretantu, Provedór Direitos Humanus e Justisa (PDHJ) iha kompeténsia konstitusionál no legál ba haree tuir hahalok poder públiku sira nian hodi

promosaun governasaun di'ak nune'e bele asegura papél estadu ba proteje direitos umanus.

Nune'e, hahu kedas iha 2024, PDHJ monitoriza instituisaun solidariedade sosiál sira ne'ebé hetan apoiu husi MSSJ hodi garante katak prestasaun servisu ba benefisiáriu sira tuir prinsípiu direitos umanus.

Uma mahon no/ka sentru protesaun sosiál sira aleinde nu'udar protetor ba ema vulneravel sira, iha mós possibilidade ba violasaun direitos umanus, prátika má-jestaun, diskriminasaun, nomos tratamentu la umanu.

Rezultadu hosi monitorizasaun ne'e, PDHJ hein katak bele kontribui ba melloria kualidade servisu sosiál no reforsu responsabilidade instituisaun sira iha prestasaun protesaun sosiál ba sidadaun sira iha Timor-Leste.



Foto 22: Ekipa fiskalizadora PDHJ halo observasaun ba fatin han iha dormitoriu Sentru Komunitáriu Lar O Bom Samaritano, Ermera.

Iha 2025, servisu fiskalizaun no rekomendasaun hala'o vizita ba sentru protesaun sosiál hamutuk 11 iha Timor-Leste mak hanesan:

1. Sentru Formasaun Integradu ba Joven no Labarik (CFIJC), Manatuto;
2. Uma Mahon FCJ (Fundação Fórum de Comunicação da Juventude) Oratóriu de Dom Bosco, Dili;
3. Sentru Komunitáriu Lar O Bom Samaritano, Ermera;
4. Uma Mahon Lospalos;
5. Sentru Komunitáriu São Miguel Arcanjo Lospalos;

6. Sentru Sosiál Nossa Senhora de Fatima Padiaé, Pante Makassar-RAEOA;
7. Associação Espesiál Olímpiku Timor-Leste (SOTL), Dili;
8. Sentru Komunitáriu Lorosa'e, Same-Manufahi;
9. Uma Mahon Knua Haberan Comunidade, Viqueque;
10. Uma PAS (Prontu Atu Serbi), Baucau;
11. Uma Mahon Maria Tapo, Maliana;

Iha vizita ne'e, PDHJ entrevista ema hamutuk 225 kompostu hosi jestór 15, traballadór 70 no benefisiáriu 140, hala'o mós observasaun direta ba fasilidade sira, no verifika dokumentu relevante, atu konfirma servisu sira hala'o tuir estatutu organizasaun no programa sira ne'ebé finansia hosi Ministério da Solidariedade Sosiál no Inklusaun (MSSI).

Rezultadu monitorizasaun ba Instituisaun Seguransa Sosiál (ISS) iha tinan 2025 hatudu, kondisaun no prátika sira ne'ebé relasiona ho kualidade servisu no protesaun ba benefisiáriu sira iha sentru protesaun sosiál hirak ne'e.

Informasaun hirak ne'e organiza tuir temátiku prinsipál hanesan infraestrutura no kondisaun fasilidade, rekursu umanu, alimentasaun no nesesidade báziku, programa formasaun no dezenvolvimentu benefisiáriu, protesaun no tratamentu, seguransa, jestaun orsamentu no sustentabilidade finanseira, no mós apoiu comunidade no autoridade lokál.

Klasifikasaun temátiku ida ne'e permite análise ne'ebé sistemátiku atu identifika prátika di'ak, dezafiu prinsipál no área sira ne'ebé presiza atensaun atu melloria kualidade atendimentu no garante protesaun efetiva ba benefisiáriu sira, hanesan deskreve tuirmai:

(1) Infraestrutura no Kondisaun Fasilidade

Entre aspetu fundamentál sira ne'ebé observa iha prosesu monitorizasaun, infraestrutura no kondisaun fasilidade sai hanesan elementu importante ne'ebé determina kualidade servisu no nivel protesaun ba benefisiáriu sira.

Kondisaun fasilidade ne'ebé adekuadu la'ós deit garante komfortu ba benefisiáriu sira, maibé mós kontribui ba seguransa, saúde no bem-estar ba sira durante hela iha fatin hirak ne'e.

Entretantu, maioria Instituisaun Solidariedade Sosiál (ISS) iha fasilidade bázika hodi hala'o servisu, enkuantu presiza tau atensaun ba espasu aprendizajen, ekipamentu ba atividade tempu livre, nomos ekipamentu eletroniku hanesan komputadór no sistema laboratoriu nian, ne'ebé limitadu, afeta ba implementasaun programa no servisu ba benefisiáriu sira.

Aleinde ne'e, identifika mós problema estrutura sira hanesan laiha istema bee-moos adekuadu, falta armáriu ba benefisiáriu sira iha dormitóriu, no

falta transporte atu facilita mobilidade benefisiáriu sira. Kondisaun hirak ne'e afeta ba qualidade atendimento no halo benefisiáriu sira la komfortavel, nune'e presiza tau atensaun imídiata hodi garante kondisaun facilidade ne'ebé seguru no adekuadu ba proteje no benefisiáriu sosiál sira.

(2) Rekursu Umanu

Aleinde infraestrutura no facilidade, rekursu umanu mós nu'udar elementu esensiál iha implementasaun servisu no protesaun ba benefisiáriu sira. Númeru traballadór, kapasidade técnica no motivaun pesoál sira iha influénsia direta ba qualidade atendimento no continuidade servisu iha ISS sira.

Rezultadu monitorizasaun hatudu, ISS barak depende ba traballadór kontratadu sira, ne'ebé sentru balu mak enfrenta númeru traballadór seidauk suficiente hodi responde ba nesesidade benefisiáriu sira.

Falta traballadór ne'ebé especializada hodi presta asisténsia kontínua, liu-liu ba benefisiáriu ne'ebé presiza kuidadu espesífiku, hanesan vitima violénsia bajea ba jéneru ka benefisiáriu ho nesesidade espesiál.

Traballadór sira mós manifesta preokupasaun kona-ba saláriu ne'ebé la padronizadu entre ISS, no konsidera seidauk proporsional ho sira nia responsabilidade servisu lora-lora nian. Kondisaun hirak ne'e bele afeta motivaun no qualidade servisu, nune'e presiza mekanismu ne'ebé padroniza sira nia remunerasaun no reforsa traballadór sira nia koñesimentu liu-hosi formasaun relevante.

(3) Alimentasaun no Nesesidade Baziku

Tuirmai, kona-ba alimentasaun no nesesidade báziku ba benefisiáriu sira, ne'ebé nu'udar parte importante atu garante saúde no bem-estar ba sira.

Disponibilidade alimentasaun no materiál báziku seluk ne'ebé suficiente sai indikadór importante atu avalia qualidade kuidadu ne'ebé fornese hosi ISS sira.

Rezultadu monitorizasaun hatudu, maioria ISS fornese alimentasaun regulár ba benefisiáriu sira, ho frekuénsia han dala tolu to'o haat kada lora, inklui matabixu, almosu, merenda no han kalan.

Aleinde ne'e, iha sentru balun hetan mós apoiu materiál ijene pesoál hanesan sabaun, pasta-denti, no pensu, ne'ebé kontribui ba saúde no ijene pesoál.

Maske nune'e, monitorizasaun identifika katak iha ISS balun enfrenta limitasaun kona-ba variedade menu no disponibilidade alimentasaun, ne'ebé dala barak la troka regularmente. Iha mós situasaun ne'ebé materiál ijene pesoál la suficiente hodi responde ba nesesidade benefisiáriu sira nian durante fulan ida, nune'e presiza planeamentu ne'ebé di'ak atu aseguara disponibilidade alimentasaun no nesesidade baziku ba benefisiáriu sira.

(4) Programa Formasaun no Dezenvolvimentu ba Benefisiáriu

Aleinde nesesidade báziku, ISS sira mós iha responsabilidade atu promove benefisiáriu sira nia dezenvolvimentu pesoál no sosiál liu-hosi programa formasaun no atividade edukativa.

Programa hirak ne'e importante atu prepara benefisiáriu sira atu hetan autonomia no reintegra ho di'ak iha comunidade.

PDHJ nia vizita komfirma, maioria Instituisaun Solidariedade Sosiál (ISS) implementa programa formasaun no atividade dezenvolvimentu ba benefisiáriu sira, hanesan atividade edukativa, formasaun abilidade bázika no atividade tempu livre.

Programa hirak ne'e kontribui ba dezenvolvimentu kapasidade benefisiáriu sira, liu-liu labarik no joven sira, hodi aumenta koñesimentu no abilidade bázika atu prepara sira ba reintegrasaun iha comunidade.

Maske nune'e, iha ISS balu seidauk iha programa formasaun ne'ebé regular no estruturadu, tanbá limitasaun iha rekursu umanu, fasilidade no ekipamentu. Iha sentru balu mós mak nia programa dezenvolvimentu ba benefisiáriu sira depende liu ba apoiu entidade seluk ka voluntáriu sira nian, nune'e presiza dezenvolve planu programa ne'ebé sustentável no sistemátiku atu asegura continuidade atividade sira ne'ebé orienta ba dezenvolvimentu abilidade técnica no profesionál ba benefisiáriu sira.

(5) Protesaun no Tratamentu ba Benefisiáriu

Aspetu seluk ne'ebé presiza tau atensaun mak protesau no tratamentu ba benefisiáriu sira, ne'ebé diretamente relasiona ho respeito ba dignidade umana no garantia direitos fundamentál sira.

Implementasaun mekanismu protesau ne'ebé apropiadu importante ba prevene risku no asegura tratamentu ne'ebé justu no sensível ba benefisiáriu sira.

Rezultadu monitorizasaun hatudu, maioria ISS halo esforsu hodi garante protesau no tratamentu ne'ebé respeita dignidade benefisiáriu sira, liu-liu ba labarik, feto no grupu vulnerável sira.

Até, benefisiáriu balu tenke hetan kuidadu báziku estra, apoiu emocional no orientasaun hosi traballadór sira, no iha mós mekanismu koordinasaun ho entidade relevante bainhira presiza assisténsia saúde ka protesau adisionál.

Entretantu, identifika mós, instituisaun solidariedade sosiál sira seidauk implementa mekanismu protesau ho forma padraunizadu, hanesan falta prosedimentu kona-ba tratamentu ba benefisiáriu sira no limitasaun iha monitorizasaun individual. Kondisaun hirak ne'e hatudu nesesidade atu reforsa sistema protesau ba benefisiáriu sira liu-hosi dezenvolvimentu política interna no kapasidade traballadór sira atu garante tratamentu ne'ebé apropiadu no sensível ba benefisiáriu sira nia nesesidade.

(6) Seguransa

Seguransa iha instituisaun solidariedade sosiál sira nu'udar parte importante no nesesáriu hodi garante ambiente ne'ebé seguru ba benefisiáriu no traballadór sira.

Sistema seguransa ne'ebé efetivu ajuda prevene insidente no responde sedu ba situaun emergjénsia ne'ebé bele akontese iha kualker tempu.

Rezultadu monitorizasaun hatudu, iha ISS balu mak implementa medida seguransa básika hanesan kontrolu entrada no saida, no iha sentru balu destaka pessoa seguransa. Medida hirak ne'e ajuda kria ambiente ne'ebé relativamente seguru ba benefisiáriu sira, liu-liu ba labarik no feto sira ne'ebé hela iha ne'ebá.

Entretantu, iha ISS sira kuaze ladauk iha sistema seguransa ne'ebé forte no estruturadu, hanesan falta prosedimentu emergjénsia, limitasaun iha vijilánsia permanente, no menus ekipamentu seguransa. Kondisaun hirak ne'e bele lori risku seguransa ba benefisiáriu no traballadór sira.

Nune'e presiza reforsa mekanismu seguransa institusionál no aumenta preparasaun atu responde ba situaun emergjénsia sira ne'ebé dalaruma labele antisipa.

(7) Jestaun Orsamentu no Sustentabilidade Finanseira

Implementasaun servisu iha ISS sira la bele separa hosi disponibilidade rekursu finanseiru ne'ebé adekuadu.

Jestaun orsamentu ne'ebé efetivu no sustentabilidade finanseira sai fator determinante ba garante continuidade programa no ezistensia institusionál, ba tempu naruk.

Rezultadu monitorizasaun komfirma, maske ISS sira hetan mós apoiu hosi doadór ka entidade seluk, maioria programa/atividade mak depende liu ba apoiu finanseiru hosi Ministériu Solidariedade Sosiál no Inkluzsaun (MSSI).

Nune'e, ISS sira enfrenta dezafiu kona-ba sustentabilidade finanseira, tanbá limitasaun orsamentu ne'ebé disponivel no atrazu, afeta ba implementasaun programa/atividade sira, tanbá ne'e ISS idaidak presiza melloria sistema planeamentu no buka estratéjia diversifikasaun fonte finanseira atu aseguira sustentabilidade servisu iha tempu naruk.

(8) Apoiu Komunidade no Autoriedade Lokál ba ISS

Entretantu, kooperasaun entre ISS ho comunidade no autoridade lokál nu'udar mós elementu importante atu garante protesaun ba benefisiáriu sira iha entidade apoiu sosiál sira nomos reintegrasaun komunitaria.

Parte relevante sira nia apoiu fasilita fortalamentu rede protesaun sosiál no aseguira continuidade asisténsia ba benefisiáriu sira.

Rezultadu monitorizasaun hatudu, maioria hosi sentru solidariedade sosiál sira hetan apoiu hosi comunidade, autoridade lokál no munispál.

Inklui apoiu materiál, atividade sosiál no koordenasau iha kazu espesífiku. Apoiu hirak ne'e kontribui ba fortalese relasaun entre ISS no comunidade, no ajuda promove reintegrasaun sosiál ba benefisiáriu sira.

Maske nune'e, iha sentru balu mak enfrenta dezafiu, ladaun hetan apoiu di'ak hosi comunidade no autoridade. Kondisaun hirak ne'e hatudu nesesidade atu reforsa mekanismu koordenasau no parseria entre ISS, comunidade no autoridade lokál hodi garante apoiu ne'ebé kontínu no sustentável ba benefisiáriu sira.

(9) Asisténsia Legál no Asesu ba Justisa

Aleinde apoiu sosiál no protesaun fiziku ne'ebé fornese hosi ISS sira, asesu no protesaun legál nu'udar elementu importante ba benefisiáriu sira.

Asisténsia legál nu'udar resposta ida direitu sidadaun nian atu benefisia bainhira envolve iha kazu violénsia ka konflitu legál ruma.

Tanbá ne'e, rezultadu tuirmai sei deskreve kondisaun asesu ba asisténsia legál no nivel kooperasaun ho entidade relevante sira atu asegura justisa no protesaun efetiva ba benefisiáriu sira.

Rezultadu monitorizasaun hatudu, asisténsia legál nu'udar elementu importante hodi garante protesaun efetiva ba sira ne'ebé envolve iha kazu legál hanesan violénsia domestika, abuzu ka konflitu família.

Iha ISS balu, asisténsia legál depende ba kolaborasaun entidade relevante sira hanesan autoridade judisiál, Defensoria Pública ka organizasaun relevante seluk. Maibé, limitasaun iha koordenasau no disponibilidade rekursu iha fatin balu ne'ebé halo prosesu legál la efisiénte.

Aleinde ne'e, asesu ba informasaun legál no akompañmentu ba benefisiáriu sira durante prosesu judisiál sai aspetu importante atu asegura katak benefisiáriu sira komprende sira nia direitu no hetan protesaun adekuada. Tanbá ne'e, prezisa haforsa mekanismu koordenasau entre ISS no entidade relevante sira, hodi asegura prosesu asisténsia legál ba benefisiáriu sira fornese ho lalais, efetivu no sensível ba nesesidade benefisiáriu sira.

Rekomendasaun Sira

Hamatan ba rezultadu fiskalizasaun ba ISS sira komfirma katak resposta sosiál sira la'e maibé sei hasoru difikuldade barak nune'e ladauk alkansa padraun ideal iha aspetu infraestrutura, rekursu umanu, alimentasaun, seguransa, no koordenasau interinstitusionál.

Infraestrutura báziku hanesan bee moos, espasu adekuadu, ekipamentu no materiál formasaun ne'ebé falta, limitasaun rekursu umanu no disparidade remunerasaun ne'ebé ladun motiva traballadór sira fo efeitu ba qualidade servisu protesaun sosiál nian.

Koordenasau no komunikasaun ne'ebé fraku entre ISS ho comunidade no entidade estado sira ne'ebé ladauk efetivu, kontribui ba interruptsau

servisu no prejudika diretamente direitu benefisiáriu sira, liu-liu labarik, feto no grupu vulneravel.

Purtantu, limitasaun estrutural no operasionál ne'ebé ISS enfrenta, influénsia kualidade servisu, seguransa ba benefisiáriu sira. Maski nune'e, ISS sira kontinua sai hanesan mekanismu importante iha implementasaun polítika protesaun sosiál estadu nian, liu-liu ba grupu vulneravel sira.

Nune'e, presiza iha atensaun kontinua no reforsa institusionál hodi garante estadu kompre nia mandatu no realiza ho di'ak.

PDHJ hakarak rekomenda ba entidade competente no relevante sira atu hola medida adekuadu sira hanesan tuirmai:

- 1) Haforsa kapasidade institusionál liu hosi disponibiliza bee moos, espasu internamentu, sala atividade no seguransa, hodi garante kondisaun vida no atendimento ne'ebé dignu ba benefisiáriu sira.
- 2) Reforsa kapasidade rekursu umanu liu-liu iha área edukasaun, saúde, no servisu sosiál, harmoniza no padroniza sistema remunerasaun no garantia direitu laborál.
- 3) Hadi'ak sistema alimentasaun no nesesidade baziku ba benefisiáriu sira, hodi assegura nutrisaun adekuada no resposta sosiál ne'ebé ho efetivu no responsivu.
- 4) Melloria koordenasaun institusionál, entre MSSl, ministériu relevante sira no ISS, inklui autoridade lokál, hodi garante kontinuidade servisu.
- 5) Kombate no prevene pratika mal-administrasaun liu-husi reforsa sistema kontrolu interna hanesan monitorizasaun regular, implementa padraun prosedimentu operasionál (SOP) sira hodi promove transparensia, responsábilidade programátiku no finanseira.
- 6) Aselera resposta sosiál no legál ba kazu violénsia sira, liu-liu iha uma mahon no sentru protesaun sosiál, hodi garante direitu no seguransa ba benefisiáriu sira.

Implementasaun rekomendasaun sira ne'e, sei hadi'ak sistema solidariedade sosiál iha Timor-Leste sai forte, inkluzivu no responsivu ba nesesidade sidadaun sira ne'ebé presiza protesaun hosi estadu.

SERVISU PROMOSAUN

Servisu **Promosaun** iha Provedoria Direitus Humanus no Justisa (PDHJ), nu'udar **estratéjia prinsipal ba hasa'e sensibilidade públiku kona-ba direitus umanus no governasaun di'ak**, nomos **hasa'e visibilidade institusionál PDHJ** iha sosiedade.


Nu'udar estratéjia institusionál, servisu promosaun orienta atu aseguira informasaun kona-ba direitu sidadaun, prinsipiu governasaun di'ak, no knaar PDHJ bele to'o ba públiku, liu hosi abordagem edukativu, komunikativu, no partisipativu hodi harii sosiedade ida ne'ebé konsiente, participa, ativu, no responsavel iha promosaun governasaun di'ak, respeita no proteje direitus umanus. Estratéjia servisu hirak ne'e, implementa liu hosi programa / atividade prinsipál sira hanesan tuirmai:

1. Formasaun direitus umanos no governasaun di'ak

Liu hosi formasaun PDHJ hamutuk ho nia parseiru estratéjiku sira promove kompreensaun di'ak sira kona-ba direitus umanus no prinsipiu governasaun di'ak ba grupu alvu sira hanesan PNTL, F-FDTL, Guarda Prizionál, Funsionáriu Públiku, Autoriedade Lokál, Lider Komunitáriu, nomos foinsa'e sira, hodi kontribui ba prevene violasaun direitus umanus iha Timor-Leste.

Enkuantu, iha parte sira tuirmai, sei deskreve kona-ba materia no taxa partisipasaun iha formasaun sira ne'ebé servisu promosaun hamutuk ho parseiru sira realiza durante finan 2025:

1.1. Formasaun ba PNTL, F-FDTL no Guarda Prizionál



Grafiku iha leten ilustra kona-ba taxa partisipasaun formasaun ne'ebé durante finan 2025, PDHJ liu hosi servisu promosaun serbisu hamutuk ho ONU Direitus Umanus iha Timor-Leste fasilita ona formasaun ba PNTL, F-FDTL nomos Guarda Prizionál iha territóriu nasionál.



Foto 23: Formadora hosi PDHJ Sra. Maria de Jesus fasilita hela formasaun kona-ba Papél PNTL no Direitus Umanus ba membru Polísia Nasionál Timor-Leste (PNTL) iha Jerál Viqueque, datada 27 outubru 2025

Formasaun ba PNTL kona-ba knar PNTL no direitus umanus. Formasaun ne'e hala'o ba membru PNTL Unidade Maritima iha Dili, membru PNTL iha Aileu, membru PNTL iha Manufahi, nomos membru PNTL iha Viqueque ho partisipasaun hamutuk ema 97, hosi total ne'e 26% feto.


Enkuantu, Membru F-FDTL Postu destakamentu Ermera, Komponente Naval Hera, Centro Formasaun Metinaro, nomos Forsa Apoio Geral (FAG) CFT Baucau hamutuk 96 mak participa ona formasaun kona-ba Knar F-FDTL no Direitus Humanus, ne'ebé hosi total participante ne'e 17% mak feto.

Entretantu, formasaun ba guarda prizionál sira hala'o iha Prizaun Suai dala rua, dala kona-ba direitus umanus no prevensaun Tortura ho partisipasaun ema 25 kompostu hosi feto 4 no mane 21, enkuantu formasaun kona-ba Papél PDHJ, governasaun di'ak no direitus umanus hala'o iha prizaun Gleno, prizaun Suai no Prizaun Becora ho partisipasaun tomak hamutuk 103, ne'ebé hosi partisipasaun ne'e 19% feto.

1.2. Formasaun ba servidór públiku, autoridade lokál nomos Foinsa'e Sira

Iha 2025, servisu promosaun PDHJ serbisu hamutuk ho UNDP fasilita formasaun kona-ba governasaun di'ak ba funsionáriu públiku hosi Ministériu Edukasaun (ME), Ministériu Saúde (MS), Sekretariu Estadu Cooperativu (SECOOP), Ministériu Planeamentu Investimentu e Estratéjiku (MPIE) ema hamutuk 167. Iha ámbitu serbisu hamutuk ne'e, fasilita mós formasaun mak hanesan ba funsioanriu no autoridade lokál hamutuk 218 iha Baucau, Manufahi, Aileu, Ermera, no Atauro.

Taxa partisipasaun formasaun direitus humanus no governasaun di'ak ne'ebé servisu promosaun hamutuk ho parseiru sira hala'o ba funsionáriu públiku, autoridade komunitaria nomos foinsa'e sira, hanesan ilustra iha grafiku tuirmai:



Entretantu, serbisu hamutuk MAE hodi fasilita formasaun kona-ba papél PDHJ, direitus umanus, governasaun di'ak, trafiku humanu, demokrasia no violénsia bazeia ba Jéneru ba autoridade komunitaria iha Mota-ulun Bazartete, Selo Malere - Aileu, Costa - Oecusse, Manatuto, Bobonaro, Viqueque, Liquiça, Covalima, Manufahi, no Ermera, ema ne'ebé partisipa hamutuk 250.

Aleinde ne'e, servisu promosaun mós fasilita formasaun kona-ba direitus




Foto 24: Provedór-Adjunta ba Direitus Umanus, Maria Marília da Costa foto hamutuk ho entidade sira hosi MAE iha sesaun abertura formasaun ba xefe suku eleitu foun 22 iha Manatuto, durante loron rua datada 6 – 8 agostu 2025


umanus no governasaun di'ak ba Membru Parlamentu Foinsa'e Nian hamutuk 25 iha Dili.

Entretantu, servisu promosaun nasional mós atende konvite hosi Diresaun Nasionál Prevensaun Konflitu Komunitáriu Ministériu Interior hodi fasilita formassaun kona-ba direitus umanus no demokrasia ba Juventude ho

Autoridade komunitariu sira iha Uatucarbau, Alas, Fohorem, Ainaro, Cailaco, nomos Comoro – Dili ba ema hamutuk 329 kompostu hosi feto 191 no mane 138, detallu hanesan ilustra iha grafiku tuirmai:




Atende mós konvite hosi *Noon Governmental Organization* (ONG) sira hanesan Estrela+ hodi fasilita formasaun kona-ba direitos humanos: estigma no diskriminasaun ba comunidade, juventude, pesoad saúde no PNTL iha jerál Liquiça, Manatuto, Viqueque, Lautem, no Aileu, ema ne'ebé partisipa hamutuk 433, detallu nu'udar ilustra iha grafiku tuirmai:



Servisu promosaun nasional atende mós konvite hosi Sekretariu Estadu Kooperativa (SECOOP) hodi fasilita formasaun ho topiku papél PDHJ hodi promove governasaun di'ak ba funsionáriu SECOOP husi munisípiu 14 ne'ebé hala'o iha Munisípiu Aileu, data 19 novembru 2025 ho total partisipante ema 41. Iha biban ne'e, PDHJ mós distribui manuál governasaun di'ak no direitos humanos ba partisipante sira.

Iha 2025, ho finansiamentu hosi Triparty Partnership Programa husi UNDP, servisu promosaun nasional organiza formasaun ba formador sira hosi PDHJ, CAC, CFP no IGE hamutuk ema 27, mane 18 no feto 9 relasiona ho utilizaun manuál formasaun foun kona-ba governasaun di'ak no direitos humanos. Atividade ne'e hala'o iha salaun konferénsia Centro Nacional Chega! Balide, datada 01 - 03 outubru 2025.

2. Diseminasan Informasaun ba públiku



Gráfiku iha leten apresenta mai ita kona-ba taxa partisipasaun global relaciona ho atividade diseminasan informasaun ba públiku. Nune'e iha tinan 2025, PDHJ liu hosi serbisu promosaun iha nivel nasionál nomos delegasaun territoríal sira halo ona diseminasan ba comunidade, estudante, univesitariu, grupu vulneravel nomos grupu minoritariu sira.

Diseminasan informasaun ne'e hala'o hodi asegura katak mensajen kona-ba direitos umanus no governasaun di'ak bele asesivel ba públiku iha nivel nasionál nomos lokál.




Foto 25: Servisu delegasaun Territoriál Oe-cusse realiza diseminasan kona-ba iha Malelat, Passabe, RAE OA, data 02 setembru 2025

2.1. Diseminasan Informasan ba Komunitade

Serbisu promosaun nasionál hala'o ona diseminasan ba komunitade iha Talitu – Aileu no Vila Maumeta - Atauro kona-ba papél PDHJ, dirietus umanus baziku, trafiku humanu nomos violénsia bajea ba jéneru.

Enkuantu ba komunitade iha Fahiliku – Hatoudu, Rotutu - Same, Liurai - Aileu, Euquisi, Liaruca, Caibada Makasa'e, Raifun – Maliana, Ritabou – Maliana, Matai – Maucatar, Leimea Kraik – Hatolia A, Malelat, Beneufe no Taiboko kona-ba papél PDHJ, prosesu hato'o Keixa, dirietus humanus baziku, no governasaun di'ak. Taxa partisipasaun komunitade nian hanesan ilustra iha grafiku tuirmai:



2.2. Diseminasan Informasan ba Estudante sira

Aleinde diseminasan ba komunitade sira nu'udar hatudu iha grafiku anterior, servisu promosaun nasionál no delegasaun Territoriál sira mós disemina informasan ba estudante sira iha iha ESG 20 Setembro Metinaro, ESG Nicolao Lobato konaba papél PDHJ, direitus umanus, trafiku umanu no violénsia bazea ba jéneru.

Enkuantu iha ESG Francisco Borja da Costa, ES Cristal Aileu no Same, ESG Christy Sword Gusmao, ESG Filial Dom Carlos Filipe Ximenes Belo Afaca, ESG Filial Triloca, ESG 04 de Setembro Viqueque, ETI Maliana, ESTV Cristal Maucatar, ESTV Ernesto Dudu Ermera, ESC Ave Maria Suai, ESC Hatolia A,

ESG Puin Beno-Pune, ESC Sao Joao Maria Binney Padiae no ESG Palaban kona-ba papél PDHJ, prosesu hato'o keixa, direitus umanus no governasaun di'ak, ho taxa partisipasaun hanesan ilustra iha grafiku tuirmai:





Foto 26: Oficial Promosaun PDHJ - Delegasaun Baucau hala'o diseminasaun ba estudante sira


2.3. Diseminasaun Informasaun ba Universitariu Sira

Aleinde estudante sekundariu sira, serbisu promosaun mós hala'o diseminasaun ba universitariu sira iha Institute of Business (IOB) Dili no São João de Brito Liquiça kona-ba papél PDHJ, direitos umanus, trafiku umanu no violénsia bazea ba jéneru. Enkuantu ba universitairu sira iha IOB Polo Maliana, Universidade da Paz (UNPAZ) iha Rejiaun Administrativa Espesiál Oecusse Ambeno (RAEOA), Dili Institute of Technology (DIT) iha RAEOA, no Instituto Dom Boaventura de Timor-Leste (IBTL) iha Same kona-ba papél PDHJ, prosesu hato'o keixa, direitos umanus no governasaun di'ak, ho taxa partisipasaun hanesan ilustra iha grafiku tuirmai:



2.4. Diseminasaun ba Grupu Vulneravel

Hatetuk ba artigu 8º estatutu PDHJ, grupu vulneravel sira hanesan feto, labarik, ema ho defisiensia, rekluzus no idojus nu'udar alvu ba protesau nian, nune'e iha 2025, servisu promosaun nasional halo ona diseminasaun ba comunidade Lesbian, Gay, Biseksual, Transgender, Intersex, and Queer (LGBTIQ+) iha Ulmera Liquiça, labarik feto iha Hera, membru comunidade Feto iha Bazartete, Loes, Maubara, Ema ho Deficiente iha organizasaun Ahisaun kona-ba papél PDHJ, direitos umanus, trafiku humanu no violénsia bazeia ba jéneru. Taxa partisipasaun nu'udar ilustra iha grafiku tuirmai:



2.5. Diseminasan Informasan ba Grupu Minoritariu Sira

Grupu minoritariu sira nu'udar alvu protesau PDHJ nian, nune'e iha 2025, Servisu promosaun nasionál halo ona diseminasan ba comunidade musulmanu iha Annur, Dom Aleixo, Dili hamutuk 37 kompostu hosi maen 22 no feto 15, kona-ba Papél PDHJ, direitus humanus, governasan di'ak no trafiku umanu.

2.6. Diseminasan Informasan kona-ba Benefísiu no Risku sira iha Espasu Dijitál



Iha tinan 2025, PDHJ hatan ba konvite hosi Asosiasaun Jornalista Timor-Leste (AJTL) nomos União Profissional dos Jornalistas de Timor-Leste (UPJTL) hodi fahe perspectiva kona-ba utilizaasan média sosiál no *Artificial Intelligence* (AI) ka inteligéncia artifisiál iha Timor-Leste. Atividade ne'e hala'o iha Maliana, Covalima, Liquiça no Dili, ho envolvimentu estudante no manorin sira besik ema 300, nu'udar prioridade ida PDHJ nian tuir planu estratéjiku 2024–2028.

Tuir dadus utilizaasan teknolojia iha Timor-Leste tinan 2025, kuaze 34,5% hosi populasaun mak asesu ba internét, enkuantu *social média account* hamutuk rihun 589 mak ativu hela iha ita nia rai.

Dadus hirak ne'e hatudu katak média sosiál sai parte importante iha sidadaun sira nia moris loron-loron, liu-liu iha atividade komunikasaun no

asesu informasaun. Maski nune'e, espasu dijitál mós iha potencia ba violasaun dignidade umana, liu-liu ba labarik no adolesente sira, hanesan fraude dijitál, defamasaun, *cyberbullying*, *doxing* no manipulasaun online.

Iha tempu hanesan, dezvoltimentu AI lori mudansa signifikativu ba ema nia maneira servisu no asesu informasaun. Maski AI fornese benefísiu boot, eziye ita atu utiliza ho responsábilidade.

Entretantu, iha tinan 2016 Konsellu Direitus Umanus Nasoins Unidas hasai Rezolusaun No. 32/13 hodi komfirma direitus umanus ne'ebé hetan protesaun iha moris réal (offline) tenke hetan mós protesaun iha domínio online, liu-liu liberdade espresaun, asesu ba informasaun no respeito ba privasidade. Rezolusaun ne'e mós enfaze katak internét nu'udar instrumentu importante ida ba edukasaun, informasaun no partisipasaun sosiál.

Tanbá limitasaun asesu ba internét iha area remotas, falta eletrisidade no menus literasia dijitál, inklui falta regulamentu sira relasiona ho protesaun dados pesoál, risku ba uzu sala teknolojia bele aumenta no ameadadu ba ita nia sociedade.

Nune'e, PDHJ reafirma nia kompromisu no husu ba entidade relevante no competente sira atu promove utilizaun teknolojia ho responsabilidade no respeito ba direitus humanos, liu-hosi atividade literasia dijitál, dezvoltimentu lejislasaun ne'ebé klaru, no fortalese sistema protesaun ba vítima hosi violasaun dijitál, nune'e bele asegura no garante inovasaun teknolojia ida ne'ebé serve ba humanidade no promove dezvoltimentu sosiál mak inkluzivu no respeita dignidade umana.



Foto 27: Lae ba mal infomasaun, dis-informasaun nomós mis-informasaun. Orador sira inklui estrutura AJTL foto hamutuk ho manorin no estudante sira iha sesaun abetura forum direitu dijitál, literasia dijitál no artifisial intelnjensia ba foinso'e sira iha Liquiça. Foto mídia AJTL



Foto 28: Provedór-Adjunta ba Direitus Umanus, Maria Marília X.C.O. da Costa, hato'o nia intervensaun iha Fórum Multi-Setórais ASEAN-UNESCO kona-ba Governasaun Plataforma Dijital, ne'ebé realiza iha Bangkok, Tailândia.

Aleinde halo disseminasaun ba estudante no comunidade sira kona-ba direitus dijitál, iha tinan 2025, Provedoria Direitus Humanus no Justisa (PDHJ) mós partisipa ativamente iha eventu estratéjiku sira iha nível nasional no rejional atu promote protesaun direitus umanus iha espasu dijitál.

Ne'ebé, Provedór Direitus Humanus no Justisa, Virgílio da Silva Guterres, sai orador prinsipál iha lansamentu aplikasaun edukativu ida (Swipe Safe-App) ne'ebé dezenvolve husi Instituto para a Defesa dos Direitos da Criança (INDDICA), ChildFund Timor-Leste no Alumni Parlamentu Foinsa'e Timor-Leste (APFTL) kona-ba protesaun labarik iha dominiu online, ne'ebé envolve no/ka halibur representante husi Embassy of Australia in Timor-Leste, Ministériu Edukasaun, Ajensia Teknolojia, Informasaun no Komunikaun Timor (TIC Timor IP), PDHJ, organizasaun sosiedade sivil no estudante sira husi eskola sekundária, realiza iha Salaun Konferénsia City8, Manleuana, Dili, datada iha 17 Fevreiro 2025.

Entretantu, iha lora 10 Maiu 2025, Provedór-Adjuntu ba governasaun di'ak, Rigoberto Monteiro partisipa iha Dili Dialogue Forum (DIF) ne'ebé organiza husi Conselho de Imprensa Timor-Leste hodi ko'alia kona-ba impaktu Intelijénsia Artifisial ba liberdade imprensa no mídia.

Iha nível rejional, Provedór-Adjunta ba Direitus Umanus, Maria Marília X.C.O. da Costa, partisipa iha Fórum Multi-Setórais ASEAN-UNESCO kona-ba Governasaun Plataforma Dijital, ne'ebé organiza husi United Nations Educational, Scientific and Cultural Organization (UNESCO), Governu Thailandia no Association of Southeast Asian Nations durante lora tolu entre 20 - 22 Outubru 2025, iha Bangkok,

Iha lora 18 Novembru 2025, iha Jakarta, Provedór Virgílio da Silva Guterres sai panelista distintu iha Konferénsia Rejionál *South East Asia National Human Rights Institutions Forum* (SEANF) kona-ba “Direitus Umanus iha Espasu Dijital: Dezafiu Emerjente no Papél Instituisaun Direitos Umanus nian,” ho partisipasaun hosi lideransa Instituisaun Nasionál Direitos Umanus husi rejiaun Sudeste Aziátiku, espesialista dijital no organizasaun internasionál sira.



Foto 29: Provedór Direitos Umanos no Justisa kontribui perspetiva krítika ida iha Konferénsia Rejionál Instituisaun Nasionál Direitos Umanus nian (SEANF) Sudeste Azia Sudeste kona-ba “Direitu Umanu iha Espasu Dijital: Dezafiu emergjente no papék instituisaun direitos umanus nian.” – Jakarta, Indonesia, 18 novembru 2025.

PDHJ nia envolvimentu iha forum estratéjiku sira ne'e hodi hametin nia lideransa atu aborda relasaun entre dezvoltamentu teknolójiku no protesaun direitos umanus.

PDHJ kontribui perspetiva institucionál ne'ebé enfatiza katak espasu dijital tenki sai ambiente ida ne'ebé seguru, inkluzivu no respeita direitos fundamentál sidadaun hotu-hotu. PDHJ iha kompromisu atu garante oinsa inovasaun dijital no utilizaun IA la bele hamenus direitu ba privacidade, liberdade espresaun, seguransa online no protesaun ba grupu vulnerável sira, liu-liu labarik, feto, ema ho defisiénsia no comunidade marjinalizadu.

Konferénsia SEANF iha Jakarta, Provedór Direitos Humanus no Justisa, Virgílio da Silva Guterres destaka katak vulnerabilidade iha era dijital la'ós limitadu ba grupu espesífiku de'it, maibé bele afeta ema hotu iha forma oioin.

Provedór apresenta enkuadramentu komprensivu ida ba protesaun dijital, ne'ebé fundamenta iha pilar haat: **(1)** privacidade no protesaun dados, **(2)**

prevenasaun violénsia no abuzu online, **(3)** inklusaun no asesu dijitál, no **(4)** prevenasaun diskriminasaun algorítmika.

PDHJ partilla avansu ida hosi servisu importante ne'ebé PDHJ halo liu - hosi pedidu fiskalizasaun abstrata ba auzénsia lei protesaun dados, ne'ebé Tribunál de Recurso (TR) konsidera hanesan omisaun inkonstitusionál. Kontribuisaun PDHJ iha konferénsia ne'e fó influénsia direta ba adosaun Deklarasaun Konjunta SEANF kona-ba Protesaun Direitus Umanus iha Espasu Dijitál, ne'ebé hametin kooperasaun rejionál no estabelese "paktu solidariedade dijitál" ida atu responde ba dezafiu emerjente sira iha era dijitál.

2.7. PDHJ no USAID/AIM Lansa Indusaun Bolseiru Integridade Juventude



Foto 30: Provedór Direitus Humanus no Justisa Timor-Leste hato'o nia intervensaun iha atividade Indusaun Bolseiru Integridade Juventude, iha Timor Lodge, Comoro, Dili, datada 21 Janeiro 2025.

Hodi haburas kultura integridade, akuntabilidade no responsabilidade entre juventude sira, no prepara jerasaun foun ne'ebé iha kapasidade ba defende governasaun di' no kombate korrupsaun, Provedoria Direitus Humanus no Justisa (PDHJ), parseria ho *United States Agency for International Development* (USAID) Timor-Leste liu - hosi atividade *Accountability and Integrity Mechanism* (AIM), organiza Semana Indusaun ba Programa Bolsa Estudo Líder Integridade Juventude Timor-Leste 2025.

Inisiativa ne'e importante tebes tanbá fó oportunidade ba juventude sira hodi aumenta koñesimentu no abilidade prátika ne'ebé prezisa hodi sai ajente ba mudansa hodi kontribui ba hametin konfiansa públika ba instituisaun estadu sira.

Atividade ne'e oficialmente lansa husi Provedór Direitus Humanus no Justisa, Virgílio da Silva Guterres "Lamukan", iha loron 21 Janeiro 2025, ne'ebé realiza iha Timor Lodge, Comoro, Dili, datada 21 to'o 24 Janeiro 2025.

Iha diskursu abertura, Provedór subliña, korrupsaun no mal-administrasaun sei sai dezafiu boot ba dezvoltamentu nasaun nian, tanbá ne'e juventude sira iha papél estratéjiku atu lidera transformasaun pozitivu.

Provedór hatu'o agradesimentu ba USAID/AIM ba ninia apoiu no kooperaun, no espresa esperansa katak bolseiru sira sei sai líder ne'ebé kontribui ativamente ba salvaguarda direitu povu no konsolidasaun governasaun ne'ebé transparente no responsavel.

Programa ne'e halibur partisipante selesionadu hamutuk ema 20 ne'ebé iha kompromisu atu promove integridade, justisa no responsabilizasaun iha sosiedade.

3. Partisipasaun no realizasaun eventu nasonál no internasionál

Partisipasaun PDHJ iha eventu nasonál no internasionál permite instituisaun atu fahe esperiénsia, aprende prátika di'ak, no fortaleza rede kooperaun ho parseiru sira. Aktividade ida ne'e mós ajuda atu hasa'e reputasaun no kredibilidade PDHJ iha nivel nasonál no global;

3.1. Partisipasaun Eventu Internasionál

Durante 2025, lideransa no jestor sira iha PDHJ participa ona iha eventu internasionál hamutuk 22, barak liu nu'udar konvidadus (36%) no hala'o enkontru regular (36%), enkontru kooperaun (18%) nomos participa nu'udar orador (9%).

64% hosi partisipasaun ne'e mak finansia tomak hosi PDHJ, enkuantu 36% kustu partisipasaun iha eventu internasionál sira responde hosi parseiru ka parte ne'ebé organiza.

PDHJ la atende ka prezente deit iha eventu hirak ne'e, PDHJ hetan konvite barak atu sai nu'udar panelista no oradór iha eventu sira-ne'e, hola papél nu'udar kontribuinte ativu, ne'ebé fornese beibeik ideia no hanoin substantivu sira kona-ba direitus umanus no governasaun di'ak.

Papél proativu ida-ne'e partikularmente evidente bainhira PDHJ lidera hodi forma diskusaun temátiku sira, liu-liu iha revitalizasaun agenda pontu fokál mídia SEANF nian ho susesu. Konsekuentemente, aumentu vizibilidade no estabesidu kredibilidade intitucional, haburas konfiansa boot liután atu envolve no kontribui ba diálogu oioin iha nivel rejionál nomos internasionál.

1. PDHJ Partisipa iha Sorumutu AICHR nian ba Dala 40

Provedór Direitus Umanus no Justisa hamutuk ho representante hosi ministériu negosiu estranjéiru no koperaun participa iha sorumutu ASEAN *Intergovernmental Commission on Human Rights* (AICHR) ba dala 40 nu'udar observador ne'ebé realiza iha Langkawi, Malazia, datada 10 – 14 febreiru 2025, ne'ebé prezide hosi advogadu no defensor direitus umanus husi Malaysia nomos Prezidente AICHR ba tinan 2025 **Edmund Bon Tai Soon**.

Enkontru ne'e fó atensaun ba preparasaun no definisaun prioridade estratéjika sira atu orienta AICHR nia serbisu iha período 2026–2030.



Foto 31: Provedór Adjuntu Boa Governasaun, Rigoberto Monteiro hamutuk ho representante hosi ministériu negosiu estranjéiru no kopersaun partisipa iha sorumutu ASEAN Intergovernmental Commission on Human Rights (AICHR) ba dala 40 nu'udar observador ne'ebé realiza iha Langkawi, Malazia, datada 10 – 14 febreiru 2025.

Diskusaun sira konsentra ba elaborasaun planu serbisu foun ba tinan lima, revizaun atividade prioritária sira tinan 2025, no dezvoltamentu instrumentu rejional sira atu hametin protesauun direitus umanus iha Association of Southeast Asian Nations (ASEAN).

Asuntu substantivu sira ne'ebé hetan atensaun mak inklui proposta deklarasaun ASEAN kona-ba Direitu ba Ambiente ne'ebé seguru, moos, saudavel no sustentável, no proposta deklarasaun kona-ba promosaun kresimentu inkluzivu, dezvoltamentu sustentável no direitu ba dezvoltamentu.

Enkontru ne'e mós aborda prioridade temática sira hanesan direitu labarik no ema ho defisiénsia, direitu dijitál, saúde mental, responsabilidade korporativa ba direitus umanus, kombate tráfico umanu, no implementasaun tratadu internasionál direitus umanus sira ne'ebé ratifika husi estadu-membru ASEAN.

AICHR adota mós estudu temátiku kona-ba direitu ba dame, ne'ebé lidera hosi Laos, no hala'o avaliasaun jerál kona-ba progresu instituisaun nian durante tinan 15 ikus ne'e. Avaliasaun ida-ne'e sei sai baze ba rekomendasaun estratéjika sira ba futuru, atu hametin efikásia no relevánsia AICHR iha promosaun no protesauun direitus umanus iha rejiaun.

Paralelamente, Grupu Traballu ba Planu Serbisu Tinan Lima AICHR nian, realiza sorumutu hodi defini kalendáriu no etapa preparatória sira ba elaborasaun Planu Serbisu Tinan Lima 2026–2030.

Iha sesaun ikus liu, membru sira AICHR identifika prioridade estratéjika sira ba períodu Prezidência Malázia iha ASEAN no reafirma sira-nia kompromisu kolektivu atu hametin kooperasaun rejionál iha promosaun no protesaun direitos umanus.

Partisipasaun Timor-Leste iha sorumutu ida-ne'e refleto kompromisu nasaun nian atu kontinua envolve iha mekanizmu direitos umanus rejionál no kontribui ativamente ba dezvoltamentu enkuadramentu normativu ASEAN nian, nu'udar preparasaun ba integrasaun plena Timor-Leste iha organizasaun rejionál ida-ne'e.

2. PDHJ hola Parte iha Konsultasaun Rejionál AICHR kona-ba Dezenvolvimentu no Planu Serbisu 2026–2030



Foto 32: Provedór-Adjuntu Boa Governasaun, Rigoberto Monteiro, participa nu'udar panelista iha konsultasaun rejionál - ASEAN Intergovernmental Commission on Human Rights (AICHR), ne'ebé realiza iha Kuala Lumpur, entre data 28 – 29 Abril 2025.

Provedór-Adjuntu Boa Governasaun, **Rigoberto Monteiro** participa nu'udar panelista iha konsultasaun rejionál - ASEAN Intergovernmental Commission on Human Rights (AICHR), ne'ebé realiza iha Kuala Lumpur, entre data 28 – 29 Abril 2025. Konsultasaun ne'e atu diskute oinsá AICHR bele integra direitos umanus iha prosesu dezvoltamentu ASEAN no prepara ninia Planu Serbisu 2026–2030. Eventu ne'e mós sai hanesan espasu ida atu determina prioridade sira ne'ebé sei orienta servisu direitos umanus iha ASEAN iha tinan lima tuirmai.

Rigoberto Monteiro nu'udar panelista iha sesaun kona-ba envolvimentu parte interesada no kooperasaun direitos umanus rejionál, Provedór-Adjuntu Boa Governasaun fahe Timor-Leste nia prioridade sira, inklui hametin governasaun demokrátiku, promove inkluzsaun sosiál, hasa'e direitu feto no grupu vulnerável sira, no garante dezvoltamentu ekitativu iha área rurál.

Provedór-Adjuntu Boa Governasaun subliña importánsia atu AICHR fasilita kooperasaun ne'ebé metin liután ho instituisaun nasional sira, inklui Provedór Direitos Umanus no Justisa, nomos hametin mekanizmu partisipasaun ba organizasaun sociedade sivil.

Partisipasaun Timor-Leste iha konsultasaun rejionál ida-ne'e nu'udar kontinuidade hosi ninia envolvimentu ativu iha mekanizmu ASEAN Intergovernmental Commission on Human Rights. Antes ne'e, iha loron 08 - 10 Abril 2025, delegasaun Timor-Leste lidera husi Rigoberto Monteiro partisipa ona iha enkontru espesiál AICHR 1/2025 iha Penang, ho partisipasaun hosi representante Ministériu Negosiu Estranjéiru no Kooperasaun (MNEC), Ministériu Justisa, nomos Provedór Direitus Umanus no Justisa.

Enkontru ne'e hodi elabora AICHR nia Planu Serbisu Tinan Lima 2026–2030, nomos aborda iniciativa estratéjika sira, inklui proposta deklarasaun ASEAN kona-ba Direitu ba Ambiente ne'ebé seguru, moos, saudavel no sustentável, no prioridade temátika sira hanesan direitu labarik no ema ho defisiénsia, saúde mentál, responsabilidade korporativa ba direitus umanus, direitu ba dezvoltamentu no kombate tráfiku umanu. Timor-Leste hato'o apresiasaun ba AICHR no reafirma ninia prontidaun atu kontribui ativamente ba dezvoltamentu enkuadramentu direitus umanus rejionál.

3. Provedór hola Parte iha Konsulta Rejionál Relasiona ho Deklarasaun ASEAN kona-ba Direitu Ambientál Seguru, Saudável no Sustentável



Foto 33: Provedór Direitus Umanus no Justisa, Virgílio da Silva Guterres "Lamukan" hato'o nia intervensaun iha konsultasaun rejionál relasiona ho deklarasaun ASEAN nian kona-ba Direitu ba Ambiente Seguru, Moos, Saudável no Sustentável, Filipina, 15 dezembru 2025.

Provedór Direitus Humanus no Justisa, Virgílio da Silva Guterres "Lamukan," partisipa iha Konsulta Rejionál kona-ba avansu direitu ba ambiente seguru, moos, saudável no sustentável iha ASEAN, ne'ebé realiza iha Makati, Filipina, entre data 15 - 16 dezembru 2025.

Konsultasaun ne'e halibur representante husi entidade direitus umanus ASEAN nian, instituisaun setóriál, ajénsia Nasoins Unidas no sosiedade sivil

hodi diskute implementasaun Deklarasaun ASEAN kona-ba direitu ba ambiente seguru, moos, saudável no sustentável, liu-hosi dezvoltamentu planu asaun rejionál ida ne'ebé konkretu, bazeadu ba direitus umanus no bele implementa ho efetivu.

Provedór subliña importánsia atu hametin kooperasaun rejionál no reeve abordajen tradisionál sira relasiona ho prinsípiu la-interferénsia iha kazu prejuízu ambientál ne'ebé iha impaktu transfronteirisu.

PDHJ destaka katak, protesau direitu ambientál presiza mekanizmu kooperasaun no responsabilidade kolektiva ne'ebé forte liu entre Estadu membru ASEAN sira, atu asegura protesau direitu umanu, asesu ba informasaun, partisipasaun públiku, asesu ba justisa no salvaguarda grupu vulnerável sira iha governasaun ambientál rejionál.

4. PDHJ iha Fórum Instituisaun Nasionál Direitus Umanus Sudeste Aziátiku (SEANF)



Foto 34: Delegasaun sira hosi KOMNAS HAM (Indoensia), SUHAKAM (Malázia), MNHRC (Myanmar), CHRP (Filipina), NHRCT (Tailândia), no PDHJ (Timor-Leste), foto hamutuk iha South East Asia National Human Rights Institutions Forum (SEANF) Technical Working Group – TWG ba dahuluk mak hala'o iha Jakarta, Indonézia, datada 23 - 24 Abril 2025

Provedór Direitus Umanus no Justisa nu'udar membru ativu Fórum Instituisaun Nasionál Direitus Umanus Sudeste Aziátiku ka *South East Asia National Human Rights Institutions Forum* – SEANF), kontinua ezerse nia papél iha nível rejionál liu-hosi partisipasaun ativu iha enkontru tékniku sira, nune'e mós enkontru anuál sira. Enkuantu iha tinan 2025, forum ne'e lidera hosi Komisi Nasionál Hak Asasi Manusia (KOMNAS HAM) Indonesia. PDHJ uza espasu refere nu'udar oportunidade hodi revela nia kompromisu oinsa kontribui ba protesau direitus umanus, aprende no partilla esperiénsia institusionál, no reforsa kooperasaun entre instituisaun membru sira iha Sudeste Aziátiku.

Iha enkontru grupu traballu tékniku (Technical Working Group – TWG) mak hala'o iha Jakarta, Indonézia, datada 23 - 24 Abril 2025, PDHJ representa husi Xefe Gabinete Aureo José António Savio, no Espesialista Mídia no Relasaun Públika Antoninho Bernardino. Enkontru ne'e foka ba implementasaun Planu Estratéjiku SEANF 2022–2026, inklui prioridade sira hanesan direitu ambiente pós-COVID-19, negósiu no direitus umanus, prevensaun ba tortura, no hametin institusionál.

Durante sesaun ne'e, PDHJ apresenta progresu institusionál sira iha área protesaun, política, promosaun, prevensaun no reforsu institusionál. Inklui PDHJ fahe ninia revizaun konstitusionál ba instrumentu legál xave oioin, hanesan Lei Karreira Profisionál Saúde nian, no ninia iniciativa apoiu legál probono ba vítima despeju forsadu sira.

Iha oportunidade ida-ne'e mós, PDHJ no KOMNAS HAM formaliza preparasaun ba Memorandu Entendimentu (MoU) ida atu hametin kooperasaun bilaterál, liu-liu ba monitorizasaun direitus umanus iha área fronteira Timor-Leste no Indonézia.

Entretantu, enkontru grupu traballu tékniku (TWG) daruak realiza iha Yogyakarta datada 22 - 24 Jullu 2025. PDHJ nafatin representa hosi Xefe Gabinete Aureo José António Savio, no Espesialista Mídia no Relasaun Públika Antoninho Bernardino. Perante enkontru refere PDHJ apresenta proposta oinsa reativa fali Grupu Traballu Komunikasaun Estratéjiku SEANF nian (Strategic Communication Working Group – SCWG), ne'ebé hetan apoiu hosi membru hotu-hotu. Proposta ida-ne'e permite SEANF hametin nia prezensa públika, hasa'e koordinasaun ba mensajen kolektivu, no partilla responsabilidade ba produz konteúdu komunikasaun iha nível rejionál.



Foto 35: lideransa no delegasaun sira hosi KOMNAS HAM (Indoensia), SUHAKAM (Malázia), MNHRC (Myanmar), CHRP (Filipina), NHRCT (Tailândia), no PDHJ (Timor-Leste), foto hamutuk iha konferénsia anuál South East Asia National Human Rights Institutions Forum (SEANF) ba dala 22, iha Jakarta, datada 18 – 20 novembru 2025

Entretantu, iha loron 18 – 20 novembru 2025, Provedór Direitus Umanus no Justisa **Virgílio da Silva Guterres**, akompaña hosi hosi Provedóra Adjunta Direitus Umanus **Maria Marília da Costa**, Sekretariu Ezekutivu **Ambrosio Graciano Soares**, Xefe Gabinete Aureo **José António Sávio**, nomos

Espesialista Mídia no Relasaun Públika **Antoninho Bernardino** partisipa iha Konferénsia Anuál SEANF ba dala 22, iha Jakarta.

Durante konferénsia ne'e, PDHJ relata progresu iha ninia pilar estratéjiku sira no hetan aprovasaun unánime ba proposta reativasau SCWG. Konferénsia mós reafirma komprimisu membru sira atu hametin SEANF nu'udar plataforma independente no efetiva ba kooperasaun direitus umanus iha Sudeste Aziátiku.

Liu-hosi partisipasaun sira-ne'e, PDHJ reafirma nia komprimisu atu kontinua kontribui ho ativu ba esforsu rejionál sira hodi promove no proteje direitus umanus, hametin kapasidade institusionál, no garante Timor-Leste nia-lian sai parte importante ida iha diálogu no asaun kolektiva iha rejiaun Sudeste Aziátiku.

SEANF 2025 lidera hosi *Komisi Nasionál Hak Asasi Manusia* Indonézia (KOMNAS HAM), ne'ebé halibur no koordena instituisaun nasionál direitus umanus neen husi rejiaun Sudeste Aziátiku hanesan *Suruhanjaya Hak Asasi Manusia Malaysia* (SUHAKAM), *Myanmar National Human Rights Commission* (MNHRC), *Commission on Human Rights of the Philippines* (CHRP), *National Human Rights Commission of Thailand* (NHRCT), no PDHJ (Timor-Leste).

Fórum ne'e sai hanesan plataforma importante ba partilla esperiénsia, koordinasaun asaun, no hametin kooperasaun rejionál iha área direitus umanus.

5. Provedór Partisipa iha ASEAN human Rigths Dialogue



Foto 36: foto hamutuk entre panelista no konvidadus sira hosi entidade hotu-hotu iha ASEAN ne'ebé partisipa iha dialogu Dirietus Umanus ASEAN ba dala VII, mak realiza iha Indoenzia, datada 17 novembru 2025

Hatan ba konvite husi Komisaun Intergovernmentál ASEAN kona-ba Direitus Umanus (AICHR), Provedór Direitus Humanus no Justisa, Virgílio da Silva Guterres "Lamukan", partisipa iha Diálogu Direitus Umanus ASEAN nian ba dala VII, ne'ebé realiza iha Jakarta, lora 17 Novembru 2025.

Diálogu Direitus Umanus ASEAN ne'e funsiona hanesan plataforma importante ba partilla progresu, dezafiu, no prátika di'ak iha promosaun no protesaun direitus umanus entre Estadu-membru ASEAN nian sira.

Entrentatu, iha edisaun ba dala 7 nian ne'e, foka espesifikamente ba tópiku sira kona-ba negósiu no direitus umanus, direitus umanus no ambiente, no fraude online no tráfik u manu.

Nu'udar konvidadu, Provedór hatuur nia intervensaun iha Sesaun datoluk kona-ba Perspetiva Parte Interesada (Stakeholders' Views). PDHJ elojia formatu diálogu ne'ebé orientadu ba tópiku espesífiku, no subliña katak inklusaun Instituisaun Nasionál Direitus Umanus hanesan elementu "fundamentál" hodi aseguza rezultadu diálogu bele transforma ba asaun konkreta ho efetiva.

Husi experiénsia PDHJ nian, Provedór identifika área prioritária tolu:

- **Negósiu & Direitus Umanus:** PDHJ defende nesesidade urjente atu estabelese Planu Asaun Nasionál ida, hodi responde ba lakuna entre atividade ekonómika no protesaun direitu comunidade nian.
- **Direitus Umanus & Ambiente:** PDHJ konsidera kestaun ida ne'e hanesan dezafiu emergente krítiku, ne'ebé iha impaktu diretu ba direitu fundamentál sira, inklui saúde no seguransa alimentár.
- **Fraude & Tráfiku Online:** PDHJ subliña importánsia resposta ida ne'ebé foka ba protesaun vítima no asesu ba justisa, enkuantu mós alerta hasoru eskalasaun vulnerabilidade iha espasu dijitál.

Intervensaun Provedór nian reflete PDHJ nia papél esensiál iha fornese análise independente ba órgaun estadu no mekanizmu rejionál sira, kontribui ba produz impaktu konkretu iha servisu protesaun direitu povu Timor-Leste no rejiaun tomak.

6. PDHJ Reakreditadu A – Nu'udar Instituisaun Nasionál Direitus Umanus ne'ebé Kompri Padraun Internasionál

Formalmente Provedór Direitus Humanus no Justisa, Virgílio da Silva Guterres, no Provedór-Adjunta Direitus Umanus, Maria Marília X.C.O. da Costa simu re-akreditasaun ho Estatútu "A" husi *Global Alliance of National Human Rights Institutions* (GANHRI), iha Jenebra datada 11 Marsu 2025.

Rezultadu ne'e, lori PDHJ mantein nafatin direitu partisipasaun tomak iha mekanizmu direitus umanus internasionál sira, inklui Konsellu Direitus Umanus Nasoens Unidas nian, no hametin nia kapasidade atu halo advokasia ba protesaun direitus umanus iha nível globál.



Foto 37: Provedór Direitus Umanus no Justisa, Virgílio da Silva Guterres, akompañá hosi Provedora Adjunta Direitus Umanus Maria Marília X.C.O. da Costa oficialmente simu rezultadu PDHJ re-akredita ho Estatútu "A", hosi Sub-komité Akreditasaun (SCA).

Iha prosesu avaliasaun ne'e, Sub-Committee on Accreditation (SCA) hosi Global Alliance of National Human Rights Institutions (GANHRI) rekoñese progresu importante hosi PDHJ iha área estratéjika sira, inklui hametin independénsia institusionál, promove lideransa inkluziva, asegura representasaun jéneru no aumenta efetividade iha implementasaun rekomendasaun direitus umanus nian, ne'ebé hosi pozisaun sira iha PDHJ 59% okupa hosi Feto nu'udar mós indikadór importante ida ba igualdade jéneru no inkluziun institusionál.

SCA rekoñese esforsu kontínuu PDHJ atu hametin independénsia finanseira no kapasidade operasionál hodi garante instituisaun ne'e bele dezempeña nia mandatu ho livre, independente no efetivu.

7. PDHJ Hala'o Enkontru Estratéjiku ho Parseiru Internasionál iha Jenebra hodi Hametin Koperasaun iha Área Direitus Umanus

GANHRI nia enkontru anuál iha Jenebra, PDHJ hala'o série enkontru estratéjiku ho parseiru internasionál sira hodi hametin kooperasaun globál relaciona ho servisu protesaun direitus umanus.

Iha ne'e, PDHJ realiza enkontru bilaterál ho FORUM-ASIA no delegasaun husi Myanmar hodi diskute situasaun direitus umanus ne'ebé kontinua sai difisil iha rejiaun.



Foto 38: Durante Enkontru Aliansa Globál ba Instituisaun Nasionál Direitus Umanus (GANHRI) iha Jenebra, Provedória Direitus Umanus no Justisa (PDHJ) Timor-Leste hala'o diskusaun ho FORUM-ASIA no delegasaun Myanmar nian hodi aborda krize direitus umanus ne'ebé la'o hela iha Myanmar. 13 marsu 2025

Diskusaun ne'e foka liu ba importánsia solidariedade rejionál no internasionál, partilla informasaun, no identifikaun dalan kooperasaun atu kontribui ba protesaun vítima violasaun direitus umanus sira. PDHJ subliña katak kompromisu internasionál no mekanizmu kooperasaun multilateral importante tebes hodi aseguara responsabilizasaun no promove esforsu ba paz no justisa.

Durante diskusaun ne'e, Provedór Direitus Humanus no Justisa, Virgílio da Silva Guterres, reafirma pozisaun PDHJ konsistente ho prinsípiu no valor universal sira ne'ebé promove husi GANHRI, nune'e mós aliñadu ho pozisaun ofisiál Governu Timor-Leste nian. PDHJ enfatiza solidariedade internasionál tenke kontinua no konsistente atu responde ba krize direitus umanus, inklui iha Myanmar nia kontestu.



Foto 39: Provedór Direitus Humanus no Justisa, Virgílio da Silva Guterres 'Lamukan', no Provedóra-Adjunta ba Direitus Umanus, Maria Marília da Costa, hasoru malu ho Nid Satjipanon, Jerente Projetu Rejionál, no Ben Buckland, Asesór Seniór, kona-ba hametin esforsu sira atu prevene tortura iha Gabinete Asosiasaun Prevensaun Tortura, iha Jenebra, 13 Marsu 2025

Iha momentu separadu iha Jenebra mós, PDHJ vizita Gabinete Association for the Prevention of Torture, no hala'o enkontru ho nia representante sira hodi diskute hametin kooperasaun iha área prevensaun tortura no formasaun direitus umanus.

Iha enkontru ne'e, PDHJ apresenta progresu implementasaun programa nasional iha Timor-Leste, inklui formasaun ba polisia no forsa armada, advokasia kontra tortura, no kooperasaun ho APT no Ministériu Justisa iha formasaun ba guarda prizonal sira, ne'ebé komfirma, la iha relatóriu kazu violasaun envolve guarda prizonal iha tinan rua ikus.

Parte sira mós diskute possibilidade atu habelar kooperasaun iha futuro, inklui integrasaun prinsipiu direitus umanus iha prosesu rekrutamentu no formasaun institusional polisia.

APT mós fahe esperiênsia di'ak husi Tailândia, ne'ebé formasaun direitus umanus ba autoridade seguransa sai hanesan modelu referênsia iha nivel rejional.

Enkontru sira ne'e, PDHJ reafirma nia komitmentu atu kontinua hametin relasaun kooperasaun internacional hodi promove sistema justisa ne'ebé bazeia ba direitus umanus, no kontribui ba esforsu global atu aseguara mundu ida ne'ebé livre husi tortura no violasaun direitus umanus.

8. PDHJ iha Enkontru Anual GANHRI 2025 – Instituisaun Nasionál Direitus Umanus Sira hametin kompromisu ba igualdade jéneru no protesaun grupu vulnerável

PDHJ nu'udar Instituisaun Nasionál Direitus Umanus ne'ebé akreditadu ho Estatutu A, partisipa ativamente iha diskusaun global sira hodi representa Timor-Leste no kontribui ba desenvolvimentu padraun internacional direitus umanus nian.

Relasiona ho tema sentral enkontru Anual 2025 mak **“Direitus Umanus ba Feto no Labarik-Feto sira: Promove Igualdade Jéneru”**, PDHJ reafirma nia kompromisu atu promove igualdade jéneru no proteje direitu feto no labarik-feto sira, liu-hosi advokasia ba reforma legal no politika pública ne'ebé garante asesu iguál ba direitus fundamentais.

Entre matéria ne'ebé sublinhadu husi PDHJ mak nesesidade atu harmoniza enkuadramentu legal nasional kona-ba rekoñesimentu kazamentu no asesu ba servisu saúde reprodutiva, hodi aseguara protesaun efetiva ba feto sira nia direitu.

Durante enkontru ne'e, Instituisaun Nasionál Direitus Umanus iha mundu tomak diskute estratégia atu kombat violénsia bazeia ba jéneru, fortalese mekanizmu responsabilizasaun, no promove partisipasaun hanesan husi feto sira iha prosesu foti desizaun.

Enkontru ne'e taka ho adosaun deklarasaun ida ne'ebé reafirma nesesidade atu hametin esforsu global hodi promove igualdade jéneru no proteje direitu feto no labarik-feto sira.

9. PDHJ Ejije Produz Konvensaun Internasionál kona-ba Direitu Ema ho Idozu



Foto 40: Virgílio da Silva Guterres no Maria Marília da Costa partisipa iha Enkontru Bianuál dahuluk hosi Global Alliance of National Human Rights Institutions Grupu Servisu ba Direitus Ema ho Idozu (WG-HROP), iha Jenebra, loron 13 Marsu 2025.

Provedór Direitus Humanus no Justisa, Virgílio da Silva Guterres, apela ba comunidade internasionál atu estabelese konvensaun internasionál ida ne'ebé juridikamente vinkulativa hodi proteje no promove direitu ema ho idozu.

Apelu ida-ne'e hatu'o iha *side event* nível aas ho títulu "NHRIs iha Liña Oin: Hametin Kooperasaun Estado ho Sosiedade Sivil iha Avansu Konvensaun kona-ba Direitu Ema ho Idozu", ne'ebé realiza iha *Palais des Nations*, iha ambitu Reuniaun Anuál 2025 hosi Global Alliance of National Human Rights Institutions (GANHRI) no Sesaun ba dala 58 hosi United Nations Human Rights Council (UNHRC), iha Jenebra, datada 10 Marsu 2025,

Provedór hatu'o, Timor-Leste nia konstituisaun garante ho klaru direitu ema katuas no ferik sira nian atu hetan asisténsia ekonómika no sosiál. Kompromisu ida-ne'e implementa ona liu-hosi programa pensaun sosiál universál, ne'ebé fó apoiu finanseiru direta ba sidadaun idozu sira. Maski nune'e, ema ho idade avansada sira, liu-liu iha área rurál, sei hasoru obstákulu boot atu asesu ba kuidadu saúde, servisu sosiál no protesau legal.

Provedór subliña katak falta enkuadramentu legal internasionál ida ne'ebé komprensivu, kontinua agrava vulnerabilidade sira ne'ebé ema ho idozu enfrenta. Nune'e, nesesáriu no urjente atu iha konvensaun internasionál ida ne'ebé estabelese obrigasaun klaru ba Estado sira hodi proteje no promove direitu grupu populaun ida-ne'e.

PDHJ mós husu ba Estado sira, Instituisaun Nasionál Direitus Umanus, organizaun sosiedade sivil no órgaun ONU nian atu hametin kooperasaun no esforsu konjuntu hodi garante dignidade, igualdade no justisa ba ema idozu sira iha mundu tomak.

Entrentatu, representante Instituisaun Nasionál Direitus Umanus, ajénsia Nasoens Unidas no organizaun sosiedade sivil sira, ne'ebé envolve iha diskusaun refere, hotu-hotu komfirma, ema ho idozu dala barak hasoru

diskriminasaun, inseguransa ekonómika no limitasaun atu asesu ba servisu esensiál sira.

Iha biban ne'e, ho lideransa hosi National Human Rights Commission of Korea, PDHJ hamutuk ho Instituisaun Nasionál Direitus Umanus 15 husi nasaun oioin asina deklarasaun eskrita konjunta ida hodi apoia dezentvolvimentu instrumentu internasionál vinkulativu ida kona-ba direitu ema ho idozu. Deklarasaun ne'e mós apoia United Nations General Assembly nia Rezolusaun 78/324 no Desizaun 14/1 hosi Grupu Traballu Abertu kona-ba Ema ho Idozu, ne'ebé identifika lakuna krítiku sira iha enkuadramentu protesaun globál atual.

PDHJ kontinua reafirma nia kompromisu atu lori lian Timor-Leste nian ba diskusaun globál, no iha tempu hanesan hametin advokasia iha nível nasional hodi garante katak dignidade, autonomia, partisipasaun no moris-di'ak ema ho idozu sira hetan protesaun adekuada liu-hosi enkuadramentu legál no polítika pública nasional.

10. PDHJ iha Rede Direitus Umanus CPLP



Foto 41: Provedór Direitus Humanus no Justisa, Virgílio da Silva Guterres, Provedóra-Adjunta ba Direitus Umanus, Maria Marília da Costa hola parte iha reuniaun estadu-membru comunidade lian portugés nian hodi diskute estratéjia kooperasaun no hametin kapasidade institusionál iha kontestu internasionál.

Provedór Direitus Umanus no Justisa (PDHJ) partisipa iha enkontru Rede de Direitos Humanos da Comunidade dos Países de Língua Portuguesa (CPLP), ne'ebé realiza iha Gabinete UNESCO iha Jenebra – 10 marsu 2025, ne'ebé representante Instituisaun Nasionál Direitus Umanus hosi estadu-membru comunidade lian portugés nia halibur malu hodi diskute estratéjia kooperasaun no hametin kapasidade institusionál iha kontestu internasionál.

Enkontru dahuluk ko'alia kona-ba **“hametin Instituisaun Direitus Umanus CPLP nian: kooperasaun no envolvimentu ho mekanizmu internasionál sira”**, ne'ebé partisipante sira troka hanoin kona-ba importánsia atu reforsa

relasaun entre Instituisaun Nasionál Direitus Umanus no mekanizmu internasionál sira.

Entretantu, sorumutu daruak Rede Direitus Umanus CPLP nian, iha ne'ebé *Defensoria Pública da União* ofisialmente adere ba rede ne'e, hodi habelar kooperasaun no promove asesu ba justisa iha nasaun sira ne'ebé uza lian portugés.

Iha reuniaun ne'e, Provedór Direitus Humanus no Justisa, Virgílio da Silva Guterres, destaka importánsia atu Instituisaun Nasionál Direitus Umanus iha nasaun membru sira kontinua esforsu hodi hetan estatutu "A" hosi Global Alliance of National Human Rights Institutions, ne'ebé representa rekoñesimentu internasionál ba independénsia institusionál no kumprimentu *Paris Principles*.

Provedór mós reafirma kompromisu atu enkoraja Parlamentu Nasionál Timor-Leste hodi kontinua ratifika tratadu no konvensaun internasionál sira kona-ba direitus umanus.

Rede Direitus Umanus CPLP, ne'ebé estabelese iha tinan 2013, nu'udar plataforma importante ida ba diálogu, troka esperiênsia no kooperasaun entre instituisaun sira husi nasaun lusófonu sira. PDHJ kontinua hola parte iha espasu hirak ne'e hodi reforsa kompromisu Timor-Leste nian atu promove no proteje direitus umanus, hametin koperasaun rejionál no internasionál.

11. PDHJ Destaka Responsabilidade no Governasaun Di'ak iha Enkontru Rejionál Aziátiku - IOI



Foto 42: Provedór Direitus Humanus no Justisa, Virgílio da Silva Guterres, hato'o intervensaun iha konferénsia International Ombudsman Institutions (IOI) 2025 ne'ebé realiza iha Lahore.

Provedór Direitus Humanus no Justisa, Virgílio da Silva Guterres, hamutuk ho Sekretáriu Ezekutivu PDHJ, **Ambrosio Graciano Soares**, partisipa iha

konferénsia *International Ombudsman Institute (IOI)* 2025 ne'ebé realiza iha Lahore - Pakistan.

Konferénsia ne'e ho tema "Hametin Estadu Direitu liu-hosi Instituisaun Provedór sira" no halibur instituisaun Provedór husi nasaun sira iha Ázia hodi troka esperiénsia, diskute dezafiu no reforsa transparénsia, justisa no governasaun di'ak.

Ayesha Hamid, Provedóra Provinsiál Punjab no Vise-Presidente IOI, subliña iha nia lia-fuan boas-vindas hodi loke Konferénsia ne'e mak, importánsia kolaborasaun entre instituisaun Provedór (*ombudsman institution*) sira hodi promove governasaun ne'ebé sentradu ba sidadaun.

Iha loron 08 Outubru, Presidente IOI Rejionál Aziátiku no Provedór Thailand nian, **Somsak Suwansujarit**, lidera sesaun preparatória ida ho partisipasaun hosi Sekretáriu-Jerál IOI, Bernhard Achitz, no Diretóra Ezekutiva, Ulrike Grieshofer. Representante sira husi Azerbaijan, Kyrgyzstan, Indonesia, Japan, Pakistan, Macau, Papua New Guinea no Timor-Leste partisipa iha diskusaun no fahe prátika di'ak sira.

Sesaun sira iha konferénsia ne'e aborda tópiku estratéjiku sira, inklui papél Instituisaun Provedoria nu'udar ponte entre povu no governu, nomos kontribuisaun sira atu asegura responsabilizasaun no governasaun di'ak iha administrasaun públika.

Iha biban ne'e, Provedór Virgílio da Silva Guterres destaka responsabilizasaun no governasaun di'ak mak elementu fundamentál sira ba konsolidasaun independénsia no estadu direitu iha Timor-Leste. Provedór halore, tuir Artigu 27, 150 no 151 hosi Timor-Leste nia Konstituisaun, PDHJ iha mandatu atu investiga keixa kona-ba mal-administrasaun no violasaun direitus umanus, fó rekomendasaun no promove padraun étika iha setór públiku.

Iha ninia konkluzaun, Provedór reafirma katak Instituisaun Provedór tenke kontinua hala'o papél nu'udar ponte entre sidadaun no governu, hodi promove reforma sustentável, hametin transparénsia no asegura administrasaun públika ne'ebé inkluziva no responsivu. Provedór mós presta omenajen ba Jamsheed Marker, ne'ebé desempeña papél importante iha prosesu diplomátiku ba independénsia Timor-Leste.

Durante enkontru ne'e, PDHJ mós partisipa iha vizita institusionál ba fatin istóriu, instituisaun edukativa, fronteira entre Pakistan no India, no eskritóriu Provedoria Provinsiál Punjab, hodi aprende kona-ba prátika governasaun lokál no mekanizmu servisu Instituisaun Provedoria iha rejiaun ne'e.

12. PDHJ partisipa iha *Tuban Process Forum* kona-ba Rekonsiliaun no Direitu atu Fila

Provedóra Adjunta Direitus Umanus (PA-DH) **Maria Marília da Costa** partisipa nu'udar panelista iha enkontru rejionál Tuban Process Forum ne'ebé realiza iha Bali, datada 21 - 23 Marsu 2025.

PA-DH akompaña husi Diretóra Asisténsia Públika, Elsa do Rosário Viegas da Costa, partisipa iha forum rejionál refere ne'ebé halibur partisipante 15 hosi Timor-Leste no Indonesia, inklui veteranu rezisténsia, família hosi grupu pró-autonomia, ema deslokadu, no representante organizasaun sosiedade sivil sira.

Durante loron tolu, partisipante sira troka esperiénsia no hanoin kona-ba konfiansa, rekonsiliaun no direitu atu fila, nomos destaka trauma ne'ebé seidak rezolve, nesesidade ba prosesu verdade no memória istóriu ne'ebé inkluzivu, no importánsia justisa no dignidade hanesan baze ba dame sustentável.

Iha diskusaun sira mós subliña papél edukasaun no prezervasaun memória istóriu atu hametin entendimentu entre comunidade sira iha Timor-Leste no sira ne'ebé hela nafatin iha kampu deslokamentu iha Nusa Tenggara Timur (NTT) Indoensia.

Fórum ida-ne'e hetan apoiu hosi Southeast Asian Women Peace Mídiators, ne'ebé promove diálogu inkluzivu no espasu seguru ba partisipante sira atu hatu'o sira-nia perspetiva no aspirasaun.

Iha sesaun intervensaun nian, PA-DH reafirma PDHJ nia kompromisu atu apoia iniciativa sira ne'ebé fundamenta iha prinsípiu direitus umanus no rekonsiliaun. Tuir PDHJ dame loloos tenke bazeia iha humanidade komún, dignidade no inklusaun.

Entretantu, partisipante sira konkorda atu adopta medida konkretu sira, inklui preparasaun ba Deklarasaun Tuban, estabesimentu plataforma rekonsiliaun ne'ebé lidera hosi comunidade, no reforsu koordinasaun política kona-ba repatriasaun no sidadania, atu garante katak prosesu kura no reintegrasaun sosiál kontinua la'o.

13. Provedór Partisipa iha Iniciativa Sunnylands Dalimak

Provedór Direitus Humanus no Justisa, Virgílio da Silva Guterres, partisipa iha Iniciativa Sunnylands V, ne'ebé realiza iha Bali, entre loron 23 - 25 FEVEREIRU 2025. Fórum rejionál ida ne'ebé halibur líder polítiku, akademiku, peritu no defensór demokrasia hosi rejiaun Indo-Pasífiku hodi diskute estratéjia atu hametin governasaun demokrátika no promove respeito ba direitus umanus.

Durante loron tolu, partisipante sira analiza dezafiu no oportunidade sira ne'ebé afeta ba konsolidasaun demokrasia, inklui tensaun geopolítica, inserteza ekonómika no desenvolvimentu teknolojia dijitál. Subliña mós nesesidade atu hametin kooperasaun rejionál no kontra narrativa sira ne'ebé bele enfrakese valór demokrátiku no governasaun di'ak.

Provedór nia intervensaun destaka impaktu média sosiál nian iha formasaun opiniaun pública. Nia alerta katak plataforma dijitál sira bele uza hodi dissemina informasaun ne'ebé la loos, distorse realidade no promove narrativa sira ne'ebé kontra prinsípiu demokrátiku. Tanbá ne'e, importante

atu parte interesada sira uza espasu dijitál hodi promove demokrasia, direitus umanus no governasaun di'ak.

Provedór mós subliña, maski Timor-Leste hetan rekoñesimentu internasionál nu'udar nasaun ne'ebé livre no demokrátiku, iha nafatin perspetiva balun ne'ebé konsidera demokrasia nu'udar konseitu estranjéiru. PDHJ reafirma katak, demokrasia la'ós valór importadu, maibé kompatível ho kultura, tradisaun no realidade sosiál iha rejiaun Indo-Pasífiku.

Iha forum refere, aprova deklarasaun Sunnylands Bali, ne'ebé reafirma kompromisu kolektivu atu hametin governasaun demokrátika no proteje direitus umanus, ne'ebé destaca iniciativa estratéjika sira iha rejiaun, inklui fórum demokrasia, programa protesau ba defensor demokrasia no reforsu kooperasaun interparlamentár.



Foto 43: Provedór Direitus Humanus no Justisa, Virgílio da Silva Guterres, participa iha Inisiativa Sunnylands V, ne'ebé realiza iha Bali, entre loron 23 - 25 Feveireiru 2025

3.2. Partisipasaun Eventu Nasionál

Durante tinan 2025, Provedoria Direitus Humanus no Justisa (PDHJ) continua dezempeña papél estratéjiku ida iha promosaun direitus umanus, justisa no governasaun di'ak liu-hosi partisipasaun ativa iha atividade nasional no internasionál oioin mak realiza iha Timor-Leste.

Nune'e, durante 2025 ne'e, lideransa no jestaun PDHJ participa ona eventu nasional hamutuk 251, barak liu nu'udar konvidadus, orador, enkontru kooperasaun, enkontru regular nomos hala'o atividade inspesaun no/ka fiskalizaun. 50% hosi partisipasaun ne'e finansia hosi parseiru, 29% la uza osan, 16% (39) uza osan PDHJ, no 6% (14) uza osan uitoan hosi PDHJ.

Iha ámbitu governasaun di'ak no anti-korrupsaun, PDHJ envolve-an iha komemorasaun Loron Mundial Anti-Korrupsaun, aniversáriu Comição Anti Corupção (CAC), revizaun implementasaun *United Nations Convention Against Corruption* (UNCAC), no reuniaun Conselho Administrativo do Fundo de Infraestruturas (CAFI), hodi reafirma ninia kompromisu ba

transparénsia, responsabilizasaun no integridade iha administrasaun públika.

Iha setór justisa no estadu direitu, PDHJ partisipa iha atividade sira relaciona ho reforma judisiária, fortalésimentu asesu ba justisa no independénsia instituisaun judisiál, inklui aniversáriu Judicial System Monitoring Programme (JSMP), Policia Científica de Investigação Criminal (PCIC), no diálogo kona-ba Lei Justisa Juvenil.

Entretantu, PDHJ kontinua promove protesauun direitu grupu vulnerável no promove inkluzauun sosiál, inklui feto, labarik, ema ho defisiénsia no comunidade LGBTIQ+, liu-hosi partisipasaun iha eventu sira kona-ba igualdade jéneru, asesu ba justisa no non-diskriminasaun.

Enkontru ho autoridade munisípiu sira, halo fiskalizasaun direita ba keixa sira, efetivu liu hodi tulun amplifika lian comunidade sira ni'an no ejizi solusaun imídiata husi parte competente sira.

Instituisaun ne'e mós fó prioridade ba edukasaun sívika no desenvolvimentu kapasidade, no envolve-an iha semináriu, formasaun no programa edukativu sira hodi hasa'e koñesimentu públiku kona-ba direitos umanus no sidadania.

Aleinde ne'e, PDHJ partisipa iha atividade sira ne'ebé promove memória istórika, solidariedade, kultura no komunikasaun institusionál, nomos iha eventu sira ho instituisaun defeza no seguransa.

Partisipasaun sira-ne'e reflete PDHJ nia kompromisu atu hametin demokrasia, estadu direitu no dignidade umana, no garante katak valór sira-ne'e sai nafatin baze ba desenvolvimentu sustentável no inkluzivu iha Timor-Leste.

Nune'e iha parte sira tuirmai sei apresenta kona-ba partisipasaun lideransa no jestor sira nian iha eventu nasional sira ne'ebé relaciona ho promosaun governasaun di'ak no protesauun direitos umanus.

1. PDHJ Kontinua hola parte iha Grupu Traballu PRT

Iha tinan 2025, Provedór Direitos Umanus no Justisa (PDHJ) kontinua partisipa ativu iha Grupu Traballu Prosesu Rekonsiliaun Timoroan (PRT) ne'ebé koordena husi Centro Nacional Chega! I.P. (CNC), hodi apoia esforsu nasional ba promove aseitasaun mútua, reintegrasaun sosiál, no unidade entre Timoroan sira ne'ebé afetadu husi konflitu polítiku entre período 25 Abríl 1974 to'o 25 Outubru 1999.

Iha enkontru dahuluk datada 12 Fevreiro 2025, Provedór Virgílio da Silva Guterres "Lamukan" subliña prosesu rekonsiliaun tenke fundamenta iha respeitu ba direitos umanus, inklui direitu sivil no polítiku, nomos direitu ekonómiku, sosiál no kulturál. Nia enfatiza katak rekonsiliaun la'ós projetu temporáriu ida, maibé prosesu sósiu-kulturál ne'ebé presiza rekoñesimentu ba vítima sira, responsabilidade morál, no restaurasaun relasaun sira ne'ebé hetan estragus tanbá konflitu.

PDHJ mós continua kontribui iha diskusaun téknika no estratéjika husi grupu traballu ne'e. Iha 13 Marsu 2025, Provedór-Adjuntu ba governasaun di'ak, Rigoberto Monteiro, partisipa iha reuniaun regular hodi diskute Nota Konseitu no Termu Referénsia ba mekanizmu rekonsiliaun.

Entretantu iha 8 Abril 2025, dokumentu xave rua ne'e ofisialmente apresenta ba Primeiru-Ministru Kay Rala Xanana Gusmão, ne'ebé espresa apoiu tomak ba iniciativa ne'e. Iha okaziaun ne'e, Provedór Virgílio da Silva Guterres reafirma katak justisa iha prosesu rekonsiliaun la'ós limita deit ba medida punitiva, maibé fó prioridade ba rekoñesimentu, respeito no valorizasaun ba sakrifísiu husi ema hotu ne'ebé sofre durante luta ba ukun rasik-an. PDHJ mós partisipa iha enkontru avaliasaun hodi reflete progresu, dezafiu no estratéjia atu hametin implementasaun rekomendasaun relatóriu Comição de Acolhimento, Verdade e Reconciliação (CAVR) no Comição Verdade e Amizade (CVA), no reforsa importánsia koordinasaun no responsabilidade kolektiva atu sustenta prosesu rekonsiliaun nasional iha Timor-Leste.



Foto 44: Grupu Traballu ba Prosesu Rekonsiliaun Timor – Oan (GT - PRT) foto hamutuk ho Primeiru Ministru Kay Rala Xanana Gusmão, hafoin apresenta no entrega dokumentu xave sira kona-ba prosesu rekonsiliaun ne'e ba Primeiru Ministru. 08/04/2025

2. PDHJ Hametin Komprimisu ba Igualdade, Inkluzividade no Partisipasaun Juventude iha Promosaun Direitus Umanus

Iha tinan 2025, lideransa no jestór Provedoria Direitus Humanus no Justisa (PDHJ) continua hametin nia komprimisu ba promove igualdade no inkluzividade liu-hosi partisipasaun ativu iha semináriu, konferénsia no diálogu nasional oioin ne'ebé foka ba grupu vulnerável sira.



Foto 45: Provedóra-Adjunta Direitos Umanus, Maria Marília da Costa, participa iha Konferénsia Anual Nasionál kona-ba Direitu Ema ho Defisiénsia no Dezenvolvimentu Inkluzivu iha Timor-Leste, ne'ebé organiza husi CBRNTL ho apoiu husi UN Women, UNICEF, no Unidade Asesoria Direitos Umanus Nasoins Unidas - Díli, 26 setembru 2025

Envolvimentu ida-ne'e nu'udar parte hosi esforsu advokasia hodi garante katak feto, labarik, ema ho defisiénsia, juventude, ema ho idozu no comunidade LGBTIQ+ bele goza sira nia direitu ho igual, dignu no livre hosi diskriminasaun.

Iha eventu sira kona-ba eliminasaun violénsia bazeia ba jéneru, protesau labarik no promosaun direitu ema ho defisiénsia, PDHJ reafirma katak igualdade no inkluzividade la'ós de'it prinsípiu normativu, maibé obrigasaun konstitusionál no morál ne'ebé tenke introduz iha asaun konkreta.

Perante eventu sira ne'e, PDHJ haklaken, aleinde servisu monitorizasaun, investigasaun no promosaun, PDHJ mós halo avaliasaun ba implementasaun Planu Asaun Nasionál ba Ema ho Defisiénsia (PAN-EhD 2021–2030) ne'ebé identifika progresu no lakuna sira iha asesu ba edukasaun, saúde, seguransa sosiál, infraestrutura no partisipasaun sosiál.

PDHJ subliña katak dezenvolvimentu labele fó prioridade de'it ba infraestrutura no kresimentu ekonómiku, maibé tenke tau ema nia dignidade iha sentru hosi polítika públika.

Nune'e, servisu Estadu hotu-hotu tenke asesível ba sidadaun tomak, tuir prinsípiu "laiha ema ida mak husik hela iha kotuk." Vontade di'ak Governu no Entidade Independente sira nian, kolaborasaun sosiedade sivil, parseiru dezenvolvimentu no apoiu comunidade nian, PDHJ kontinua luta no kontribui ba konstrusaun Timor-Leste ida ne'ebé justu, inkluzivu no respeita direitu fundamentál sidadaun hotu-hotu nian.

Iha kontestu ida-ne'e, PDHJ mós participa iha lansamentu ofisiál Grupu Mídia Juventude Repórter ba Demokrasia, ne'ebé organiza husi Alumni Parlamentu Foinsa'e Timor-Leste (APFTL) iha Salaun Konferénsia CNC, ne'ebé halibur joven na'in 25 hosi grupu oioin, inklui joven ho defisiénsia,

membru comunidade LGBTQ+ no joven sira seluk. Provedór-Adjuntu Boa Governasaun, Rigoberto Monteiro, ne'ebé partisipa representa PDHJ, hodi kodlia kona-ba avaliasaun situasaun direitu labarik iha Timor-Leste.

PA-BG apresia APFTL no afirma, Grupu Mídia Juventude ne'e importante atu inklui foin-sa'e marjinalizadu sira hanesan ema ho defisiénsia, feto foin-sa'e no foin-sa'e LGBTQ+ iha diskusaun públiku.

Grupu Repórter Juventude nu'udar pasu significativu ida atu fó lian ba foin-sa'e sira ne'ebé vulnerável no hametin advokasia, partikularmente liu-hosi mídia sosiál, kona-ba direitu labarik no juventude.

Nu'udar entidade konstitusionál independente ida ne'ebé iha mandatu atu proteje direitus umanus tuir lei nasionál no tratadu internasionál sira, inklui Konvensaun kona-ba Direitu Labarik (CRC), PDHJ continua halo monitorizasaun, advokasia no servisu hamutuk ho parseiru sira atu garante protesaun efetiva ba direitu fundamentál labarik no juventude sira iha Timor-Leste.

PA-BG apresia APFTL no rekoñese apoiu hosi PLAN Internasionál Timor-Leste, UNICEF no Uniaun Europeia, ne'ebé suporta atividade ne'e hanesan parte hosi parseria estratéjiku ba promove igualdade no inkluzau iha Timor-Leste.



Foto 46: Provedór-Adjuntu Boa Governasaun, Rigoberto Monteiro, hamutuk iha sesaun abertura "*Semana Akampamentu Juventude ba Ema ho Defisiénsia iha Timor-Leste*" iha suku Selo Kraik, Aileu, - 25 agostu 2025

3. Provedór partisipa iha diálogu komunitáriu kona-ba Projetu LNG iha Natarbora

Provedór Direitus Humanus no Justisa, Virgílio da Silva Guterres "Lamukan," partisipa iha diálogu komunitáriu ne'ebé FONGTIL organiza ho tema "Haforsa Jestaun Fundu Petrolíferu ho Efisiénsia, Efikásia, Reziliénsia no Sustentabilidade ba Povu Timor-Leste nia Moris-Di'ak," mak realiza iha Barique-Natarbora, Jerál Manatuto, datada 26 Setembru 2025.

Iha audiensia publika ne'e, Provedór subliña, dezvoltimentu ekonomiku tenke respeita direitu sidadaun sira, partikularmente kona-ba rai, hela-fatin no asesu ba servisu báziku.

PDHJ afirma, diálogu no konsulta signifikativa ho comunidade sira nu'udar elementu esensiál ba governasaun di'ak no desizaun ne'ebé justu. PDHJ sei hala'o nia knar tuir mandatu konstitusionál, nune'e kontinua monitoriza asaun governu nian no garante katak projetu estratéjiku sira fó benefísiu ba povu, nune'e mós prevene violasaun direitus umanus no injustisa sosiál.

Diálogu ne'e halibur organizasaun sosiedade sivil, representante governu no comunidade lokál sira hodi diskute projetu *Liquefied Natural Gas* (LNG) iha Natarbora no implikasaun ba dezvoltimentu nasional.

4. PDHJ Hametin kompromisiu ba kooperasaun rejional no protesaun direitu labarik



Foto 47: Provedór Direitus Humanus no Justisa, Virgílio da Silva Guterres "Lamukan", hamutuk ho Provedór-Adjuntu Boa Governasaun, ho orgullu partisipa iha Komemorasaun Aniversáriu Asosiasaun Nasaun Sudeste Aziátiku (ASEAN) ba dala 58 – 08 agosto 2025

Iha tinan 2025, Provedór Direitus Humanus no Justisa kontinua hametin nia kompromisiu hodi promove no proteje direitus umanus liu-hosi partisipasaun ativu iha iniciativa rejional ASEAN nian. Ne'ebé iha lora 8 fulan agostu 2025, Provedór Direitus Humanus no Justisa, Virgílio da Silva Guterres "Lamukan", hamutuk ho Provedór-Adjuntu Boa Governasaun, partisipa iha Komemorasaun Aniversáriu ASEAN ba dala 58, ne'ebé refleto Timor-Leste nia esforsu hodi integra iha comunidade rejional ne'ebé fundamenta ba kooperasaun, estabilidade no respeitu ba direitus umanus.

Entretantu, iha 10 juñu 2025, Provedóra-Adjunta ba Direitus Umanus, **Maria Marília da Costa**, partisipa iha Konsulta Nasionál kona-ba revizaun finál Planu Asaun Rejional ASEAN hodi hapara violénsia hasoru labarik / *End Violence Against Children* (EVAC) no kombate abuzu no esploitasan online / *Child Online Exploitation and Abuse* (COEA), ne'ebé organiza hosi INDDICA, I.P. parseria ho UNICEF, halibur representante governu, sosiedade sivil no parseiru internasionál sira hodi asegura katak mekanizmu rejional sira responde efetivamente ba nesesidade no dezafiu protesaun labarik iha Timor-Leste.

Partisipasaun sira-ne'e reafirma PDHJ nia komprimisu oinsa nafatin kontribui liu-hosi diálogu no kooperasaun rejionál, fortalese advokasia ba direitu labarik no/ka grupu vulnerável sira. Liuhosi envolvimentu ne'e, PDHJ subliña integrasaun rejionál tenke akompaña ho medida sira konkretas hodi garante katak sidadaun hotu-hotu, partikularmente labarik sira, bele moris iha ambiente ne'ebé seguru, dignu no livre hosi violénsia no esplorasau.

5. PDHJ Husu Prosesu Reforma Justisa tenke asegura Estado Direitu



Foto 48: Provedór Direitus Umanus no Justisa **Virgílio da Silva Guterres** hato'o intervensaun iha Reuniaun Ministeriál ba dala 15 entre PALOP-TL no European Union. - Dili, 06 / 06 / 2025

Iha enkontru Ministeriál entre *Países Africanos de Língua Oficial Portuguesa e Timor-Leste* (PALOP-TL) no Uniaun Europeia ba dala 15 ho tema sentrái "Justisa no Estado Direitu" ne'ebé realiza iha Dili, data 06 Juñu 2025, Provedór Direitus Humanus no Justisa, Virgílio da Silva Guterres iha nia intervensaun enfaze estado direitu demokrátiku tenke garante liberdade sidadaun nian, promove igualdade no asegura realizasaun justisa.

Provedór akresenta, PDHJ nia papél mak garante respeitu ba direitu fundamentál sira no promove governasaun di'ak, nu'udar mekanizmu importante ida ba hametin estado direitu iha Timor-Leste.

Provedór destaka nesesidade atu kontinua reforma iha setór justisa, hodi asegura katak sistema judisiáriu bele responde efetivamente ba nesesidade estabilidade polítika nian no kria ambiente ida ne'ebé favorável ba investimentu.

PDHJ hanoin katak, reforma judisiária labele konsidera hanesan mudansa téknika de'it, maibé tenke fundamenta iha valór demokrátiku no konstitusionál sira, no iha tempu hanesan prezerva independénsia tribunál sira nu'udar pilar fundamentál ba administrasaun justisa. Ne'ebé, artigu 1º hosi Timor-Leste nia konstituisaun, afirma polítika públika hotu-hotu, inklui reforma setór justisa, tenke orienta ba bem públiku no dignidade umana.

“ **Reforma judisiária ne'ebé efetiva bele kontribui atu hamenus konfliktu sosiál, promove kultura kumprimentu voluntáriu ba lei no kria ambiente ne'ebé favorável ba investimentu no dezvoltamentu sustentável.**

PDHJ elojia esforsu IX Governu Konstitusionál iha apresentasaun proposta reforma judisiál, no subliña importánsia atu prosesu ne'e hametin serteza jurídika no konfiansa públika.

Provedór destaka mós valor kooperasaun rejionál iha kuadru PALOP-TL, ne'ebé fó oportunidade ba nasaun sira ne'ebé ko'alia lian portugés atu troka esperiênsia no hametin apoiu mútuu iha área justisa no governasaun.

Provedór mós refere ba United Nations Guiding Principles on Business and Human Rights, ne'ebé estabelese dever Estado sira atu proteje direitos umanus no responsabilidade empreza sira atu respeita direito fundamentál sira. PDHJ reafirma katak promosaun no protesauun direitos umanus tenke sai nafatin elementu sentrái iha kualkér prosesu reforma institusionál, liu-liu iha setór justisa.

Enkontru ne'e realiza iha Dili no oficialmente loke husi Primeiru Ministru Timor-Leste **Kay Rala Xanana Gusmão**, ho partisipasaun hosi delegasaun nasaun membru PALOP-TL, representante Uniaun Europeia, membru parlamentu, membru governu no entidade relevante sira seluk.

6. PDHJ Hametin Kompromisu Hasoru Tráfiku Umanu

Tráfiku umanu nu'udar violasaun grave ba direitos umanus ne'ebé ameasa dignidade, liberdade no seguransa ema nian, liu-liu feto no labarik sira ne'ebé sai vulnerável ba esplorasauun no abuzu.

Hodi responde ba dezafiu ida-ne'e, Timor-Leste continua hametin mekanizmu nasional no parseria entre instituisauun sira hodi prevene, proteje vítima sira no responsabiliza autor sira.

Iha kontestu ida-ne'e, iha 30 jullu 2025, Provedór Direitos Humanos no Justisa, Virgílio da Silva Guterres “Lamukan”, partisipa iha komemorasaun Loron Mundiál Kontra Tráfiku Umanu no lansamentu Planu Asaun Nasionál Timor-Leste nian ba Prevensaun no Kombate Tráfiku Umanu, ne'ebé organiza hosi Ministériu Justisa liu-hosi Komisaun Luta Kontra Tráfiku Umanu (KLATU), ho apoiu husi UN Women.

Partisipasaun PDHJ iha eventu ida-ne'e reafirma nia kompromisu atu kontribui ba asaun kolektiva hasoru tráfiku umanu. Planu Asaun Nasionál ne'e adota abordajen internasionál **4P - Prevensaun, Protesaun, Prosesu no Parseria** - ho prioridade ba protesauun vítima sira, hadi'a asesu ba asistênsia komprensivu, prosekusaun efetivu ba ofendór sira no hametin koordinasaun entre entidade relevante sira.

PDHJ kontinua aproxima no servisu hamutuk ho governu no parseiru sira, hodi promove justisa no garante katak Timor-Leste sai ambiente ida ne'ebé seguru no livre hosi tráfiku umanu.



Foto 49: Provedór Direitus Humanus no Justisa, Virgílio da Silva Guterres "Lamukan", foto hamutuk ho entidade sira iha âmbito komemorasaun Loron Mundiál Kontra Tráfiku Umanu no lansaumentu ba PAN Timor-Leste nian ba Prevensaun no Kombate Tráfiku Umanu – 30 Jullu 2025

7. PDHJ iha semináriu Nasionál ba Hametin Instituisaun Judisiáriu



Foto 50: Provedór Adjuntu Boa Governasaun no Provedór Adjunta Direitus Humanus foto hamutuk ho entidade relevante no kompetente sira iha semináriu nasional kona-ba "Auscultação Pública dos Atores da Justiça" - 30 juñu 2025

Instituisaun judisiária ne'ebé forte no independente nu'udar pilar fundamentál ida ba Estadu Direitu Demokrátiku, tanbá garante interpretasaun no aplikasaun lei ne'ebé justa, consistente no tuir Konstituisaun.

Hametin sistema judisiáriu nian importante tebes atu aseguira protesau ba direitus umanus, promosaun governasaun di'ak no asesu ba justisa ne'ebé hanesan.

Iha kontestu ida-ne'e, iha 30 juñu 2025, Provedór-Adjuntu ba governasaun di'ak, Rigoberto Monteiro, no Provedóra-Adjunta ba Direitus Umanus, Maria Marília da Costa, partisipa iha semináriu nasional kona-ba "Audição Pública dos Atores da Justiça", ne'ebé hala'o iha Auditóriu Primeira Instáncia Tribunál Judisiál, Caicoli, Díli.

Semináriu ne'e orienta ba promove reflesaun no diálogu kona-ba dezvoltamentu institusionál setór justisa tuir Artigu 124 Konstituisaun Repúblika Demokrátika Timor-Leste, ne'ebé estabeselese Supremu Tribunál Justisa nu'udar autoridade judisiál aas liu iha país.

Partisipasaun PDHJ iha eventu ida-ne'e reflete nia kompromisu atu apoia reforma no fortalese sistema judisiáriu, nu'udar meu esensial hodi garante protesau efetiva ba direitus fundamentál sidadaun hotu-hotu nian.

8. PDHJ Hametin Liberdade Imprensa no Papél Mídia iha Promosaun Direitus Umanus

Iha tinan 2025, Provedoria Direitus Humanus no Justisa (PDHJ) kontinua hametin nia kompromisu atu promove no proteje direitus umanus liu-hosi kolaborasaun ho setór mídia, organizasaun sosiedade sivil, no parseiru dezvoltamentu sira.

Partisipasaun PDHJ iha semináriu, workshop, no komemorasaun oioin reflete importáncia mídia livre no responsavel nu'udar pilar fundamental ba demokrasia, transparénsia no responsabilizasaun pública.

Iha ámbitu loron mundiál Liberdade Imprensa nian, Provedór Direitus Humanus no Justisa, Virgílio da Silva Guterres "Lamukan", subliña legadu jornalista sira hanesan Max Stahl no Jill Jolliffe, ne'ebé kontribui boot ba luta independénsia Timor-Leste no dezvoltamentu liberdade imprensa.

Provedór destaka preokupasaun kona-ba dezafiu atual sira ne'ebé afeta independénsia mídia, no husu ba jornalista sira atu kontinua defende lia-loos ho integridade, étika no responsabilidade.

Iha diskusaun no formasaun sira ho Asosiasaun Jornalista Timor-Leste (AJTL) no Konsellu Imprensa, PDHJ reafirma katak jornálizmu iha papél estratéjiku ida iha promosaun direitus umanus, espoin no/ka revela violasaun sira, no hametin governasaun di'ak.

PDHJ subliña katak relatóriu jornalístiku tenke respeita prinsípiu igualdade, la-diskriminasaun no dignidade umana, inklui ba grupu vulnerável sira.

Liu hosi partisipasaun ativa iha iniciativa sira-ne'e, PDHJ reafirma katak liberdade imprensa, no jornálizmu responsavel nu'udar elementu esensial sira hodi harii Timor-Leste ida ne'ebé demokrátiku, inkluzivu no respeita dignidade no direitu fundamentál sidadaun hotu-hotu nian.

9. PDHJ Subliña Nesessidade Fortalese Implementasaun Justisa Sosiál Tuir Konstituisaun RDTL



Foto 51: Provedór Direitus Umanus no Justisa, Virgílio da Silva Guterres 'Lamukan', halo diskusaun ho membru Alumni Parlamentu Foinsa'e Timor-Leste (APFTL), kona-ba "*Justisa Sosiál Tuir Perspetiva Konstitusionál: Estadu Kumpri Ona Nia Responsabilidade?*" realiza iha edifisiu APFTL, Becora - Díli, 05 Abril 2025.

Importánsia fortalese justisa sosiál tuir prinsípiu konstitusionál sai pontu sentrál iha intervensaun Provedór Direitus Humanus no Justisa, Virgílio da Silva Guterres 'Lamukan', iha semináriu ho títulu "*Justisa Sosiál Tuir Perspetiva Konstitusionál: Estadu Kumpri Ona Nia Responsabilidade?*" ne'ebé organiza husi Alumni Parlamentu Foinsa'e Timor-Leste (APFTL) - **Díli, 05 Abril 2025.**

Iha biban ne'e, Provedór fó enfaze ba nesesidade atu kontinua avalia implementasaun obrigasaun konstitusionál Estadu nian iha promosaun justisa sosiál. Akresenta liutan, nivel realizasaun justisa sosiál seidauk atinji padraun ne'ebé satisfatóriu, tanbá kontinua iha dezekilíbru iha alokasaun orsamentu ba setór krítiku sira.

Setór agrikultura, saúde, edukasaun no justisa nu'udar pilar fundamentál dezvoltamentu nasionál, seidauk hetan prioridade adekuada iha orsamentu Estadu. Provedór mós alerta katak tendénsia atu atribui responsabilidade ba governasaun pasadu la bele sai justifikasaun ba falta progresu atuál, maibé tenke iha responsabilidade kolektiva husi lideransa estadu iha nível hotu-hotu.

Iha ninia intervensaun, nia enkoraja partisipante sira atu utiliza Konstituisaun no planu dezvoltamentu nasionál sira hanesan instrumentu krítiku ba monitorizasaun no avaliasaun polítika públika.

Artigu 6 Konstituisaun RDTL no provizaun sira kona-ba direitu labarik, juventude, ema ho idozu no ema ho defisiénsia tenke sai referénsia esensiál iha prosesu formulasaun polítika no orsamentu Estadu nian.

Planu Estratéjiku Dezenvolvimentu Nasionál 2011–2030 hanesan dokumentu orientador xave, maibé kontinua enfrenta dezafiu implementasaun, liu-liu iha setór infraestrutura báziku hanesan saneamentu bee no servisu públiku.

Realidade demográfika Timor-Leste nian, iha ne'ebé maioria populasaun konsiste husi juventude iha idade produtiva, maibé investimentu ba dezvoltamentu juventude seidauk refleto kompozisaun demográfika refere. Konsidera situasaun ne'e hanesan indikador importante ida husi dezekilíbrui justisa sosiál.

Nune'e, Provedór enkoraja estudante universitáriu no peskizadór sira atu orienta sira-nia estudu ba nesesidade lokál no kontribui ba formulasau polítika públika bazeia ba evidénsia. Provedór reafirma katak, papél Provedoria Direitus Humanos no Justisa mak monitoriza aliñamentu entre lei, polítika públika no Konstituisaun, inklui kompromisu internasionál sira ne'ebé Timor-Leste ratifika ona.

10. PDHJ Partisipa iha lansamentu ba Timor-Leste nia adejaun iha Aliansa Global Pathfinfing



Foto 52: Provedór Direitus Humanos no Justisa, Virgílio da Silva Guterres 'Lamukan' partisipa iha lansamentu adezaun Timor-Leste nian iha aliasaun global pathfinfing – **Dili, 5 marsu 2025**

Provedór Direitus Humanos no Justisa, Virgílio da Silva Guterres 'Lamukan' haksolok tebes hodi partisipa iha lansamentu adezaun Timor-Leste nian ba aliasaun global pathfinfing nu'udar iniciativa ida ne'ebé reafirma kompromisu estadu nian hodi hakotu violénsia no hametin protesaun ba labarik sira.

Eventu ne'ebé hala'o iha Salaun Konferénsia Kayrala Xanana Gusmão, datada loron 05 marsu 2025, no hetan partisipasaun hosi ofisiál altu governu nian, organizaun internasionál sira, no Representante Espesiál husi Sekretariu-Jerál Nasoins Unidas / Special Representative of the Secretary-General (SRSG) kona-ba Violénsia kontra Labarik, **Dr. Najat Maalla M'jid**, hamutuk ho Vise-Primeiru-Ministru **Mariano Assanami Sabino**, hodi subliña nesesidade urjente ba asaun konkreta iha servisu prevensaun no hatán ba violénsia hasoru labarik sira.

Nu'udar instituisaun ida ne'ebé dedikadu atu proteje direitus umanus, Provedór subliña importánsia atu asegura labarik sira-nia direitu ba seguransa no edukasaun.

Provedór enfaze, violénsia hasoru labarik sai nafatin kestaun krítiku ida ne'ebé presiza esforsu kolaborativu hosi governu, parseiru dezenvolvimentu sira, no comunidade sira.

PDHJ fiar katak, Timor-Leste nia adezaun ba aliansa ne'e hametin liu-tan estadu nia komprimisiu atu reforsa polítika protesaun labarik, hadi'a mekanizmu justisa, no promove sosiedade ida ne'ebé labarik ida-idak bele sai boot livre hosi violénsia.

11. PDHJ Enfatiza Urjénsia Protesaun Labarik no Asaun Integrada Hasoru Pobreza no Malnutrisaun



Foto 53: Provedór Direitus Humanus no Justisa, Virgílio da Silva Guterres "Lamukan", participa iha workshop "Livre atu Sai Ita-nia An Rasik: Hakbiit Labarik Vulnerável Liu atu Reklama Sira-nia Direitu", ne'ebé organiza hosi PLAN Internasionál iha Hotel Timor. Iha eventu ne'e, nia husu ba Governu, PLAN Internasionál no sosiedade sivil atu hametin kolaborasaun hodi kombatse pobreza no malnutrisaun, no garante protesaun efetiva ba direitu labarik vulnerável sira iha Timor-Leste.

Urjénsia ba Timor-Leste atu reforsa protesaun labarik no hasa'e resposta integradu hasoru pobreza no malnutrisaun. Provedór Direitus Humanus no Justisa, Virgílio da Silva Guterres 'Lamukan', apela lia ne'e iha workshop ho títulu "Livre atu Sai Ita-nia An Rasik: Hakbiit Labarik Vulnerável Liu atu Reklama Sira-nia Direitu", ne'ebé organiza hosi PLAN Internasionál iha Hotel Timor - Díli, 6 Fevereiro 2025.

Provedór preokupa ho situasaun krítika labarik sira-nian iha Timor-Leste, iha-ne'ebé aprosimadamente 40% populasaun moris iha liña pobreza nia okos no 47% labarik sira sofre malnutrisaun. Dadus sira-ne'e hatudu klaru nesesidade atu reforsa esforsu Estadu nian hodi kumpre kompromisu ba protesaun direitu labarik sira-nian, inklui promesa sira ne'ebé mak halo durante kampaña eleitoral.

Nune'e Provedór husu ba governu atu kolabora ho entidade relevante sira inklui hanesan PLAN Internasionál no sosiedade sivil hodi dezenvolve abordajen ida ne'ebé integradu no estruturadu. Família sira ne'ebé hasoru difikuldade ekonómika presiza solusaun multidimensional hodi hasai barreira sira ne'ebé impede labarik sira atu asesu ba sira-nia direitu.

Urjénsia ba Timor-Leste atu transforma diskusaun sira sai asaun konkreta iha tinan hirak tuirmai, hodi alerta:

“Se taxa malnutrisaun 47% la redús ho signifikativu iha tinan rua to’o tolu nia laran, ita-nia futuru nu’udar nasaun sei iha risku.”

Provedór enkoraja mós sosiedade atu rekoñese no fó apoiu ba esforsu sira husi PLAN Internasionál no parseiru sira seluk. Labarik barak kontinua laiha asesu ba edukasaun ho kualidade tanbá sira nia kondisaun vulnerável, no reafirma responsabilidade kolektiva sidadaun hotu-hotu nian atu kontribui ba mudansa. **“Ita hotu tenke kontribui, maski kontribuisaun ki’ik sira, hodi hadi’a ita-nia nasaun nia futuru. Kondisaun eskola públiku sira seidak adekuadu, no ida-ne’e tenke muda.”**

PDHJ elojia iniciativa Plan Internasionál nian ne’ebé organiza workshop refere, Provedór husu ne’e la’os de’it plataforma ba diskusaun, maibé mós oportunidade ida atu hametin kooperasaun entre instituisaun xave sira, inklui Uniaun Europeia, Ministériu Solidariedade Sosiál, Ministériu Edukasaun, no Ministériu Saúde.

Partisipa iha eventu ne’e mak Ministra Solidariedade Sosiál, Veronica das Dores, Presidente Instituto para a Defesa dos Direitos da Criança (INDDICA), Dinorah Granadeiro, no parte interesada oioin seluk ne’ebé iha kompromisu hamutuk atu kontinua avansa direitu labarik sira-nian iha Timor-Leste.

12. PDHJ Enkoraja Estudante UNTL Hodi Fó Importánsia ba Direitus Umanus, Liberdade Akademika no Responsabilizasaun Sosiál iha Universidade

Iha sesaun prátika akadémika ho estudante Fakultade Direitu, Universidade Nasionál Timor Lorosa’e (UNTL), datada 25 Marsu 2025, Provedór-Adjuntu ba governasaun di’ak, Rigoberto Monteiro husu ba universitariu sira tau importánsia atu hametin direitus umanus, liberdade akademika no responsabilidade sosiál iha ambiente universidade.

PA-BG afirma, papél importante instituisaun akademika sira iha protesaun direitus umanus, liu-liu papél Provedoria Direitus Humanus no Justisa (PDHJ) iha salvaguarda direitu sira ne’e iha espasu edukasionál, nune’e universidade tenke sai espasu ida ne’ebé promove respeitu, igualdade no inkluzividade.

PDHJ alerta kona-ba violasaun direitus umanus sira ne’ebé bele akontese iha kampus, inklui restrisaun ba liberdade espresaun, asédiu verbál no fíziku, violénsia seksuál, neglijénsia akademika hosi dosente sira, no kestaun sira ne’ebé relasiona ho empregu.



Foto 54: Provedór Adjuntu Boa Governansaun Rigoberto Monteiro foto hamutuk ho estrutura asosiasaun akademika estudante nomos estudante sira departamentu direitu jerál UNTL – 25 marsu 2025

Liberdade espresaun iha universidade sai kestaun urjente ida, tanbá estudante sira dala barak enfrenta limitasaun bainhira hato'o opiniaun krítiku, liu-liu kona-ba asuntu sensível hanesan violénsia bazeia ba jéneru no asédiu seksuál. PDHJ nota katak iha kazu balun, diskusaun kona-ba violasaun sira-ne'e sei hetan restrisaun, ne'ebé afeta transparénsia no justisa iha ambiente akademiku.

**“Estudante sira maka
agente mudansa nian. Ita-
boot sira iha papél
importante hodi hasa'e
konxiénsia no
responsabilizasaun sosiál,”
PA-BG husu**

PDHJ enkoraja estudante sira atu sai parte ativa iha promosaun integridade akademika no direitos umanus, inklui advokasia ba estabelesimentu mekanizmu klaru hodi prevene no trata violasaun iha universidade sira. Estudante sira tenke envolve mós iha diskusaun governansaun nian ne'ebé luan liu, inklui kestaun mal-administrasaun públika hanesan atrazu dokumentu sidadania, difikuldade asesu ba servisu

públiku, no inefisiénsia administrativu sira ne'ebé continua akontese dezde estabelesimentu Estado modernu.

PDHJ nia espetativa, universidade tenke sai espasu ida ba debate krítiku no konstrutivu, ne'ebé promove inkluzividade, igualdade no respeito ba diferença, hodi kontribui ba formasaun jenerasaun foun ne'ebé krítiku, responsavel no orientadu ba justisa sosiál.

3.3. Selebrasaun Eventu Nasionál

Selebra Aniversáriu PDHJ ba dala 21



Foto 55: Lideransa no funsionáriu sira iha PDHJ foto hamutuk hadoin misa agradesimentu iha ambitu selebrasaun aniversáriu PDHJ ba dala XXI (26 maiu 2025)

Iha loraon 26 Maiu 2025, Provedoria Direitus Humanus no Justisa (PDHJ) selebra aniversáriu ba dala 21 ho tema “Lian ba Lian Laek sira”, nu’udar reflesaun ba papél PDHJ nian hodi sai lian (voz) ba sidadaun sira ne’ebé vulnerável no susar asesu ba justisa. Tema ne’e refleto kompromisu institusionál PDHJ atu garante katak sidadaun hotu-hotu, liu-liu sira ne’ebé iha situasaun vulnerável, bele hetan protesaun efetivu ba sira nia direitu no liberdade fundamental.

Iha selebrasaun aniversáriu PDHJ ba dala 21 ne’e, PDHJ kontinua reafirma nia papél hanesan instituisaun independente ne’ebé dedikadu ba protesaun direitus umanus no promosaun prinsípiu governasaun di’ak.

PDHJ rekoñese apoiu, kolaborasaun no envolvimentu hosi parseiru sira iha nivel hotu-hotu, ne’ebé kontribui ba implementasaun mandatu PDHJ, maske iha sasidik barak, maibé kontinua luta ba Timor-Leste ida ne’ebé respeita no proteje direitus umanus.

Iha ambitu selebrasaun aniversáriu ne’e, PDHJ lansa Relatóriu Anuál 2024, Relatóriu Kontas (Relatóriu Finanseira) tinan fiskal 2024, Relatóriu Fiskalizasaun no Monitorizasaun tinan 2024 relasiona ho fiskalizasaun ba sela defensaun, prizaun, sentru protesaun sosiál, postu saúde, sentru saúde no ospital sira, nomos lansa Relatóriu Investigasaun Finál.

Lansamentu relatóriu sira ne’e hatudu rezultadu servisu PDHJ durante tinan 2024, no destaka mós dezafiu sistemátiku sira ne’ebé sei enfrenta iha setór importante sira, liu-liu iha área saúde, kondisaun defensaun no prizaun,

servisu protesaun sosiál, no kazu violasaun direitus umanus ne'ebé envolve autoridade pública sira.

Nune'e, PDHJ haruka rekomendasaun ba entidade competente sira, hodi hadi'a prestasaun servisu públiku no hametin mekanismu protesaun direitus umanus iha Timor-Leste.

Selebrasaun ne'e hala'o iha edifisiu sentrál PDHJ iha Caicoli, Dili, no hetan partisipasaun hosi ema 249 kompostu husi mane 160 no feto 89, ne'ebé mai hosi instituisaun respondente sira ne'ebé PDHJ serbisu hamutuk ho sira, nomos instituisaun sira ne'ebé simu relatóriu finál investigasaun, inklui Ministério Público, Tribunál sira, Comissão Anti-Corrupção (CAC), Polícia Nacional de Timor-Leste (PNTL), no FALINTIL - Forças de Defesa de Timor-Leste (F-FDTL), representante hosi liña ministériu sira, no funsionáriu PDHJ iha nivel nasional no delegasaun territoriál sira.

Selebrasaun aniversáriu ba dala 21 ne'e la'ós de'it sai momentu komemorativu, maibé mós sai hanesan espasu reflesaun kona-ba progresu instituisaun nian, inklui identifikasaun dezafiu sistemátiku no diskusaun kona-ba solusaun institusionál sira. Eventu ne'e mós reforsa kompromisu PDHJ atu kontinua hametin kooperasaun inter - institusionál, hasa'e responsabilizasaun institusionál, no responde sidadaun sira nia preokupasaun kona-ba asesu ba justisa no protesaun ba sira nia direitu no liberdade fundamental.

Selebrasaun Loron Mundiál Direitus Umanus



Foto 56: Provedór de Direitus Humanos e Justiça, Virgílio da Silva Guterres kuda ai-oan iha resintu edifisiu Suku Hera, postu adminsitrativu Cristo-Rei, munisípiu Dili, iha ambitu selebrasaun loron mundial direitus umanus ba dala 77

Loron 10 fulan Dezembru nu'udar loron internasionál direitus humanos. Iha 2025, mundu selebra loron ne'e ba dala 77 ho tema *Human Rights: Our Everyday Essentials*.

Nune'e, Provedór Direitus Humanos no Justisa nu'udar instituisaun nasional direitus umanus nian, serbisu hamutuk ho Organizasaun Nasoens Unidade ba Direitus Umanus (ONU-DU) iha Timor-Leste selebra loron importante ne'e iha Suku Hera, Postu Administrativu Cristo Rei, Jerál Dili, durante loron rua entre data 9 no 10 dezembru 2025.

Selebrasaun ne'e organiza hodi hasa'e konsiénsia públiku kona-ba importánsia direitos humanos, hametin relasaun entre instituisaun estadu no comunidade, no promove partisipasaun ativa hosi sosiedade hodi promove, respeita no proteje direitos humanos.

Iha loraon dahuluk, Tersa-feira, 9 Dezembru 2025, hafoin abertura hosi Xefe Suku Hera no Provedór Direitos Umanus no Justisa, iha sesaun dadér, realiza atividade sosiál no edukativu hanesan kuda ai-oan, kompetisaun pinta (dezeñu) entre estudante ensinu baziku segundu siklu, no kompetisaun diskursu ba estudante ensinu sekundária. Purtuantu, iha sesaun lokraik, realiza jogu amizade futebol no volleyball mane no feto entre funsionáriu PDHJ ho Komunitade Hera.

Enkuantu, iha loraon daruak, Kuarta-feira, 10 Dezembru 2025, selebrasaun ofisiál hahú ho misa agradesimentu iha Parokia Hera, ne'ebé prezide hosi Padre Parokia, hanesan forma agradesimentu ba oportunidade sira hotu.

Hafoin misa agradesimentu, iha abertura ofisiál, Xefe Suku Hera, Presidente Autoridade Dili, representante ONU direitos humanos iha Timor-Leste (UADU), no Provedór Direitos Umanus no Justisa hato'o mensajen importante iha ambitu selebrasaun loraon mundial direitos humanos ne'e.

Mensajen prinsipal sira hosi entidade hirak ne'e mak, finan 77 la'os deit kona-ba númeru, maibé oinsa ema hotu refleta, ko'alia no atua ho respeito ba direitos humanos iha idaidak nia moris loroloron, tanbá direitos humanos ne'e ema nia nesesidades ba moris.

Enkuantu, dialogu komunitária mak parte esensia iha selebrasaun ne'e, ne'ebé envolve lider institusionál no comunidade nian hodi diskute problema real sira ne'ebé comunidade hasoru iha moris loroloron.

Iha diálogu ne'e, comunidade Hera akresenta, problema prinsipal ne'ebé sira enfrenta mak disputa rai, violénsia domestika, no infraestrutura báziku ne'ebé ladauk di'ak, liu-liu estrada no baleta ne'ebé difikulta movimentu comunidade bainhira tempu udan. Komunitade mós hato'o preokupasaun kona-ba foer "lixu" ne'ebé afeta ba saúde, nesesidade atu hari sentru saúde foun, no prosesu sosa no fa'an rai ne'ebé dala barak la tuir prosedimentu legál.

Hatan ba preokupasaun hirak ne'e, lider institusionál sira fó klarifikasaun kona-ba programa no mekanizmu legál ne'ebé disponivel.

- **Presidente Autoridade Jerál Dili** esplika, programa governu hanesan **Programa Nasionál Dezenvolvimentu Suku (PNDS) no Planeamentu Dezenvolvimentu Integradu Munisipál (PDIM)**, ne'ebé fó oportunidade ba comunidade atu determina prioridade iha baze, hanesan bee, saneamentu, eletrisidade no estrada.
- **Representante PNTL** esplika medida seguransa no protesaun ba vitima violénsia domestika, inklui servisu *Vulnerable Persons Unit (VPU)* ne'ebé

prontu atende vítima sira no koordena ho instituisaun sosiál hodi fó assisténsia.

- **Diretór Jerál Terras no Propriedades** mós esplika mekanizmu mediasaun no prosedimentu legál atu resolve disputa rai no fasilita sertifikasaun rai ba comunidade sira.
- **Provedór Direitos Umanus no Justisa** afirma, **direitus umanus** tenke pratika iha moris loroloron, la'os deit iha dokumentu ofisiál. Nia mós subliña **nesesidade** atu promove **igualdade jéneru**, **proteje labarik** no **foinsa'e sira**, **hametin kultura dame** no **komunikasaun**, no **asegura katak servisu públiku responde ba nesesidade povu**. Nia enfatiza **katak respeito ba dignidade umana mak baze ba paz, demokrasia no desenvolvimentu sustentável iha Timor-Leste**.

Iha momentu mak hanesan, PDHJ lansa relatóriu investigasaun ba kazu violasaun direitos umanus no governasaun di'ak, nu'udar komprimisiu instituisaun nian ba promove transparénsia no responsabilizasaun iha protesauun direitos umanus.

Selebrasaun remata ho atividade sosiál no kultura hanesan fahe premiu ba manan nain kompetisaun pinta no diskursu, nomos halo kuis edukativu ne'ebé fó oportunidade ba comunidade atu celebra hamutuk iha ambiente amizade no harmonia.

Selebrasaun loron mundial direitos umanus ba dala 77 iha Suku Hera nu'udar plataforma importante ba hasa'e konsiénsia públiku, estimula vizibilidade institusionál iha comunidade, no promove implementasaun direitos umanus iha nivel lokál, hodi kontribui ba desenvolvimentu sosiál no governasaun di'ak iha Timor-Leste.

Iha loron dahuluk ema hamutuk 177 kompostu hosi feto 122 no mane 55 mak partisipa, enkuantu iha loron daruak ema 213 kompostu hosi mane 102 no feto 111 mak partisipa.

4. Mídia no Publikasaun Informasaun

Iha tinan 2025, Unidade Mídia no Komunikasaun hosi Provedoria Direitos Humanos no Justisa (PDHJ) hametin ninia knaar nu'udar ponte entre instituisaun no públiku, alkansa audiénsia tantu nasionál no internasionál liu-hosi *estratéjia integradu* ida ne'ebé kombina meius komunikasaun tradicionais (*mainstream mídia*), portal notísia online, sítio institusionál ida ne'ebé robustu, no plataforma dijitál diversifikadu.

PDHJ mantein kolaborasaun forte ho televizaun nasionál hanesan RTTL no GMN, estasaun rádiu, imprensa imprime, no mídia notísia online. Simultaneamente, PDHJ continua uza ho ativu plataforma mídia sosiál oioin.

Facebook sai nafatin hanesan plataforma prinsipál ba envolvimentu públiku, atinji seguidor 28,999 to'o 31 Dezembru, ne'ebé 2025 – aumentu seguidor foun 2,004 (sa'e hosi 26,995 iha 2024).

Hodi alkansa públiku ne'ebé luan liu, PDHJ mós utiliza Instagram no TikTok ba konteúdu vizuál ne'ebé badak, ne'ebé nia alvu ba foin-sa'e sira, YouTube ba vídeo ho forma naruk no programa video gravadu sira no LinkedIn ba públiku profisionál no internasionál.

Entretantu, iha tinan 2025, PDHJ publika postajen 324 iha ninia pájina Facebook, Engajamentu (*engagement*) totál atinji 160,389 (reasaun, komentáriu, no fahe), ne'ebé representa aumentu 1210% kompara ho 2024. Engajamentu ida-ne'e kompostu hosi reasaun 29,625, komentáriu 2,831, no fahe 4,075. Konteúdu vídeo nian mós hetan dezempeñu di'ak ho total view 111,479 ho viewers úniku 23,983.

Aumentu signifikativu iha *engagement* refleto efikásia hosi PDHJ nia estratéjia konteúdu diversifikadu, inklui infografia, vídeo badak, no post oportunu kona-ba direitos umanus no kestaun governasaun di'ak.

Aleinde vídeo, PDHJ produz notísia formál sira ba anúnsiu ofisiál sira, atualizasaun formatu mídia sosiál nian ba konsumu lalais, no infografia sira hodi simplifika dados kompleksu sira. Iha totál, PDHJ produz no publika ona vídeo hamutuk 72 iha nia plataforma dijitál sira.

Vídeo sira-ne'e iha komprimentu no objetivu ne'ebé la hanesan: vídeo badak sira ho durasaun entre segundu 30 ba fahe lalais kestaun espesífiku ida; vídeo sira ho komprimentu médiu ho minutu 1 to'o 5 ba esplikaun sira ne'ebé detallu liu; no vídeo sira ne'ebé naruk liu ba kobertura komprensivu kona-ba eventu sira, konferénsia imprensa sira, ka diskusaun temátiku sira.

Estratéjia mistu ida-ne'e garante katak grupu oioin – hosi utilizadór sira hosi mídia sosiál kazuál to'o peskadór no jornalista sira – bele asesu informasaun iha maneira ida ne'ebé hatán ba sira nia nesesidade.

Sitiu/pájina ofisiál (www.pdhj.tl) sai hanesan repozitóriu no biblioteca primária ba informasaun institusionál hotu-hotu. Iha 2025, Unidade Mídia publika notisia 103. Análize sira website nian hatudu utilizadór ativu 11,000, ema asesu (view) ba pájina 26,000 no número download 2,700 hosi relatóriu no dokumentu sira.

Tempu médiu envolvimentu ka asesu ba pájina nian ba kada utilizadór ativu maka minutu 1 no segundu 25. Pájina ne'ebé vizita barak liu maka pájina dahuluk - home (19,000), tuir fali pájina vaga serbisu nian (2,100).

Kona-ba alkanse jeográfiku, utilizadór 6,700 mai hosi Timor-Leste, enkuantu audiénsia internasionál inklui Estados Unidos (utilizadór 1,400), Xina (utilizadór 1,100), Indonézia (utilizadór 269), no Austrália (utilizadór 141).

Tráfiku mai liu-liu hosi vizita direta sira (13,000) no peskiza orgánika (9,000), hatudu rekoñesimentu ne'ebé maka'as no vizibilidade motor peskiza nian ne'ebé efetivu. PDHJ kontinua atualiza beibeik website no servisu ativu hodi hadi'a nia estrutura no navegasaun hodi fasilita comunidade luan atu asesu ba informasaun.

Iha nivel rejionál, PDHJ nia Unidade Mídia hola papél hodi lidera reativasaun Grupu Traballu Komunikasaun Estratéjiku SEANF (Fórum Nasionál Instituisaun Direitus Umanus Sudeste Aziátiku nian).

Hafoin enkontru grupu traballu tékniku dala-rua no Enkontru Anuál ida, grupu ne'e reativa ho susesu. Atinjimentu ida-ne'e koloka PDHJ nu'udar kontribuinte xave ba kooperasaun rejionál entre Instituisaun Nasionál Direitus Umanus (NHRI, sigla Inglés) iha Sudeste Aziátiku, hodi permite estratéjia komunikasaun ne'ebé partillada, aprendizajen mútua, no mensajen koordinadu kona-ba kestaun direitus umanus iha rejiaun tomak.

Atinjimentu ho seguidor foun 2,004 iha Facebook, 324 *posting*, totál engajamentu 160,389 ho aumentu 121.0% tinan-ba-tinan, 111.479 views ba vídeo, 103 *posting* iha website, no susesu iha reativasaun Grupu Traballu Komunikasaun Estratéjiku SEANF nian hatudu efikásia estratéjia komunikasaun diversifikadu PDHJ nian.

Iha rai-laran, PDHJ kontinua intensifika produsaun konteúdu tantu iha website no mídia sosiál, mantein konsisténsia publikasaun ne'ebé aas, no hadi'a liután navegasaun website. Rejionálmente, liu-hosi Grupu Traballu Komunikasaun Estratéjiku SEANF nian ne'ebé reativa ona, PDHJ sei hala'o knaar ativu hodi forma padraun komunikasaun no kooperasaun entre NHRI sira iha Sudeste Aziátiku, hodi garante katak Timor-Leste nia lian rona iha diálogu rejionál sira kona-ba direitus umanus.

Entretantu, hakarak subliña, liu-hosi entrevista, *podcast*, talkshow no mensajen institusionál, kontribui ba konsolidasaun kultura demokrátika, respeitu ba direitus umanus no governasaun ne'ebé transparente no responsavel, hodi asegura públiku asesu informasaun, promove edukasaun sivika, no garante katak pozisaun no rekomendasaun institusionál bele asesível ba sociedade tomak.

SERVISU SUPERVIZAUN POLÍTICA PUBLIKA

1. Revizaun Manuál Formasaun BG no DH

Iha tinan 2024, PDHJ servisu hamutuk ho Programa Nasoins Unidas ba Dezenvolvimentu (PNUD) relasiona ho revizaun manuál formasaun governasaun di'ak nomos haree impaktu implementasaun PAN EhD 2021 – 2030 iha tinan lima ikus ne'e.

Iha tinan 2025 PDHJ lansa ona manuál formasaun governasaun di'ak no direitus umanus ba servidór públiku, ne'ebé halo revizaun ba manuál formasaun kona-ba governasaun di'ak antes ne'e, nu'udar esforsu PDHJ nian hodi atualiza instrumentu orientadór sira ne'ebé sai mata-dalan ba instituisaun públika sira tenke reflete ona realidade atual no dezafiu governasaun iha Timor-Leste nomos nivel internasionál, fornese orientasaun prátika no relevante sira hodi apoia entidade públiku sira iha implementasaun prinsípiu governasaun di'ak no fortalese kultura administrasaun públika ne'ebé respeita no proteje direitus umanus.

Servisu ne'e hala'o hosi konsultór nasionál, **Sr. Miguel Pereira de Carvalho**, nune'e iha loron 2 Juñu 2025, Provedoria Direitos Humanos no Justisa (PDHJ) hala'o sesaun traballu ida ho jestor PDHJ hodi komprende ensensia no/ka pontu substansial sira hosi dokumentu refere.

Servisu hirak ne'e realiza iha kuadru parseria Tri-Partida entre PDHJ, Programa Nasoins Unidas ba Dezenvolvimentu (PNUD), no Office of the High Commissioner for Human Rights (OHCHR) ho Aliansa Globál Instituisaun Nasionál Direitos Umanus (GANHRI), hodi hametin kapasidade institusionál no promove governasaun di'ak iha Timor-Leste.

2. Avaliasaun Impaktu PAN EhD 2021 - 2030



Foto 57: Provedór, Virgílio da Silva Guterres "Lamukan" foto hamutuk ho Provedóra Adjunta, Sekretariu Ezekutivu, nomós Diretor/a Sira PDHJ, Konsultora nomos parseiru sira iha validasaun dadus avaliasaun impaktu PAN EhD 2021 - 2030

PAN-EhD nu'udar instrumentu estratéjiku Governu nian atu promove no proteje direitu ema ho defisiénsia sira liu-hosi medida sira iha área edukasaun, saúde, empregu, asesibilidade, partisipasaun polítika no sosiál, no eliminaun diskriminasaun.

Purtantu, iha finan kotuk (2024) PDHJ hetan apoiu hosi Programa Nasoins Unidas ba Dezenvolvimentu (PNUD) liu-hosi Projeitu Parseria Tripartida hodi hala'o avaliasaun impaktu implementasaun tinan lima dahuluk Planu Asaun Nasionál ba Ema ho Defisiénsia (PAN-EhD 2021–2030).

Avaliasaun ne'e importante hodi sukat progresu implementasaun, identifika obstákulu no dezafiu sira, no formula rekomendasaun hodi husu ba entidade respondente sira oinsa organiza rekursu no programa/atividade sira hodi asegura objetivu sira PAN EhD 2021 - 2030 realizadu ho efetivu nune'e bele hatan ba nesesidade direitu comunidade defisiénte sira.

Avaliasaun ne'e hala'o hosi Konsultora Nasionál **Sra. Benícia Eriana dos Reis Magno**, nune'e iha loron 16 no 17 Juñu 2025 konsultora hetan apoiu hosi Unidade Asisténsia Jurídika, Administrativa no Peskiza - PDHJ, hala'o workshop validasaun dados hodi apresenta no komfirma ho ministériu respondente sira nomos organizasaun no individu sira mak nu'udar benefisiáriu, nune'e bele halo kompletu liutan informasaun relasiona ho serbisu mak PDHJ hala'o.

Workshop ne'e involve representante hosi ministériu implementadór, sociedade sivil, organizasaun ema ho defisiénsia, inklui ema ho defisiénsia hodi komfirma dados sira mak iha ona nune'e bele produz relatóriu ne'ebé komprehensivu. Atividade ne'e loke husi Provedór Direitus Humanus no Justisa, Virgílio da Silva Guterres "Lamukan", no taka husi Provedóra-Adjunta Direitus Umanus, Maria Marília da Costa.

Relatóriu ne'e sei lansa bainhira finaliza ona, PDHJ sei uza relatóriu avaliasaun ne'e nu'udar baze advokasia PDHJ nian nune'e mós sociedade sivil sira, PDHJ mós fiar katak relatóriu refere bele sai baze ba servidór públiku sira hodi formula política pública ne'ebé inkluzivu.

3. Peskiza no Estudu Sira

3.1. Impaktu Apoiu Finanseira hosi MSSI ba Organizasaun EhD

Iha tinan 2025, Provedoria Direitus Humanos no Justisa liu hosi servisu asisténsia juridika, administrativa no peskiza realiza avaliasaun impaktu hosi apoiu finanseira mak Ministriu Solidariedade Sosiál no Inkluziun (MSSI) fó ba organizasaun sira ne'ebé fasilita asisténsia sosiál ba Ema ho Deficiente iha Timor-Leste durante 2022 – 2024, hanesan:

- 1) Fundação Ordem Hospitaleira de São João de Deus;
- 2) Associação Hadomi Defisiensia Matan Timor-Leste;
- 3) Fundação AHISAUN,
- 4) Associação Internacional Kongregasaun Sekulir ALMA,
- 5) Fundasaun Klibur Domin,
- 6) Associação Special Olympics para Timor-Leste (SOTL),
- 7) Fundação Nacional Kongregasaun Putri Maria no Yosep (KPMY),
nomos
- 8) Centro Desenvolvimento Inclusivo iha Timor-Leste (CIDTL).

Governu Timor-Leste iha komprimisiu ba promove inkluziun sosiál no proteje direitu fundamental ema ho defisiensia nu'udar deskreve iha Planu Asaun Nasionál ba Ema ho Defisiensia 2021–2030, nomos Konvensaun Nasoens Unidas kona-ba Direitu Ema ho Defisiensia (UNCRPD).

Nune'e, PDHJ nu'udar instituisaun independente ho mandatu konstitusionál ba promove governasaun di'ak no proteje direitus umanus, halo

avaliasaun refere hodi aseguza katak utilizaun rekursu públiku responde duni ba nesesidade sosiedade, liu-liu grupu vulnerável sira.

Foku avaliasaun ne'e hodi sukat relevánsia, efikásia, efisiénsia, impaktu no sustentabilidade hosi apoiu finanseira mak MSSI fornese ba organizaun hirak ne'e, hodi haree kontribuisaun real hosi apoiu finanseira MSSI ba fortalese kapasidade institusionál organizaun hirak ne'e, nune'e mós sukat mudansa ne'ebé benefisiáriu sira hetan, liu-liu iha asesu ba servisu báziku, partisipasaun sosiál, no hasa'e kualidade moris ema ho defisiensia iha Timor-Leste.

Métodu ne'ebé ekipa uza iha avaliasaun ne'e mak métodu kahur (*mixed-method*), ne'ebé kombina aprosimasaun kuantitativu no kualitativu. Dadus sei rekolla liu hosi analiza dokumentu finanseiru no relatóriu organizaun sira, entrevista semi-estruturada ho lideransa relevante sira, no diskusaun grupu orientadu ho benefisiáriu no parte interesada sira.

Analiza dadus sei bazeia ba kritéria avaliasaun internasionál hosi *Organisation for Economic Co-operation and Development – Development Assistance Committee* (OECD-DAC), hodi garante koerénsia no kualidade informasaun.

Ekipa hala'o estudu ida ne'e ho integridade, transparénsia, partisipasaun inkluziva, konfidensialidade dadus, no respeito ba dignidade humana. To'o 2025 nia rohan ekipa kobre ona organizaun balu no sei fináliza iha 2026.

PDHJ hein katak, rezultadu hosi estudu ida ne'e tulun entidade kompetente sira, orienta formulaun polítika públika no mekanizmu finansiamentu ne'ebé sustentável ba organizaun EhD iha Timor-Leste, hodi kontribui ba fortalese kapasidade organizaun solidariedade sosiál sira, promove inklusaun sosiál no hasa'e kualidade moris ema ho defisiensia, hodi realiza sosiedade ida ne'ebé inkluzivu, justu no respeita direitos umanus.

3.2. Avalia Implementasaun Prinsípiu Boa - Governasaun

Boa-governasaun konsidera nu'udar fundasaun importante ba administrasaun estadu atu garante transparénsia, akuntabilidade, efisiénsia no partisipasaun públiku, hodi hametin konfiansa sidadaun no promove dezentvolvimentu sustentável.

PDHJ komfirma katak bainhira servidór públiku sira hotu komprende no aplika prinsípiu governasaun di'ak, lejislasaun no/ka polítika públika sira ne'ebé entidade publika sira produz, sensível ba direitos umanus no sidadaun sira nia liberdade fundamental.

Iha 2024 PDHJ realiza ona levantamentu kona-ba perspetiva, esperiensa no koñesimentu servidór públiku kona-ba prinsípiu governasaun di'ak, ne'ebé rezultadu hatudu, persiza sensibiliza servidór públiku sira hodi uniformiza komprensaun kona-ba prinsípiu governasaun di'ak, atu la aplika tuir idaidak nia perspetiva.



Foto 58: Ekipa peskiza PDHJ halo apresentasaun ba kargu Diresaun, Xefia no Funsionáriu sira iha Sekretaria Estado Igualdade no Inklusaun relasiona ho levantamento kona-ba implementasaun / aplikasaun prinsípiu governasaun diak iha knar lorloron

Nune'e, iha 2025 Provedoria Direitos Humanos no Justisa liu hosi servisu asisténsia juridika, administrativa no peskiza kontinua hala'o levantamento kona-ba implementasaun no/ka aplikasaun prinsípiu governasaun di'ak iha entidade públiku estado sira, espesifiku iha instituisaun públika setór sosiál.

Levantamentu ne'e sei foka ba implementasaun prinsípiu boa-governasaun sia (9), hanesan partisipasaun, transparénsia, akuntabilidade (responsabilidade), responsividade, ekidade no inkluzividade, orientasaun konsensu, nomos vizaun estratéjiku no estado direitu.

Aproximasaun ne'ebé uza iha levantamentu ida ne'e mak aproximasaun kuantitativu liu hosi kestionáriu eskala Likert no kualitativu liu hosi entrevista kle'an ho informadór xave sira.

Iha koleasaun informasaun kuantitativu PDHJ sei envolve forsa traballu tomak iha kada instituisaun nu'udar populasuun no uza métodu aleotariu (random) hodi define respondentes. Entretantu informador xave sei define parte sira hosi laran no parseiru xave sira instituisaun idaidak nian, bazea ba informasaun kuantitativu mak rekolla ona.

Levantamentu ne'e sei hala'o iha instituisaun públika ualu (8) iha setór sosiál mak Ministériu Saúde (MS), Ministériu Edukasaun (ME), Ministériu Edukasaun, Juventude no Desportu (MEJD), Ministériu Solidariedade Sosiál no Inklusaun (MSSI), Ministériu Ensinu Superior, Siensia no Kultura (MESCC), Sekretariu Estado Igualde no Inklusaun (SEII), Fundu Dezenvolvimentu Kapital Umanu (FDCH) no Sekretaria Estado Komunikaun Sosiál (SEKOMS).

To'o 2025 nia rohan, ekipa simu ona informasaun kuantitativa hosi ministériu alvu sira, enkuantu sei kontinua no fináliza iha 2026.

3.3. Haree Kualidade Atendimentu iha Rejistu Notariadu



Foto 59: Xefe UAJAP Filomena Dias akompaña hosi Oficial Peskiza Paulo Lemos dada lia ho Diretóra Conservador Notariado Munisípiu Baucau iha Balkaun Uniku Munisípiu Baucau

Iha tinan 2025, Provedoria Direitos Umanos no Justisa (PDHJ) liu hosi Unidade Assistência Jurídica, Administrativa no Peskiza (UAJAP) halo estudo analiza kualidade atendimentu públiku iha Diresaun Nasionál Rejistu Notariadu, relasiona ho emisaun Bileti Identidade (BI) no pasaporte, hodi avalia nível satisfasaun sidadaun sira, identifika fatór sira ne'ebé influénsia kualidade servisu, no hato'o rekomendasaun ba hadi'a prestasaun atendimentu públiku iha setór refere.

Peskiza ne'e uza aprosimasaun kuantitativu deskritivu, ho kombinasau metodo observasaun direta, entrevista uza kestionariu no analiza dokumentasaun. Estudo ne'e hala'o durante período entre Marsu to'o Jullu 2025, hala'o iha munisípiu Dili, Baucau, Manatuto, Manufahi no RAEOA, envolve ema hamutuk 1.824.

Ema sira ne'ebé hola parte iha estudo ne'e mak sira ne'ebé asesu ba servisu notariadu hodi trata dokumentu Bilete Identidade (BI) no pasaporte, inklui dirijente no funsionáriu servisu rejistu notariadu. Iha estudo ne'e aborda ho mós perspetiva Ema ho Defisiénsia (EhD), maske partisipasaun hosi EhD sei limitadu.

69% hosi respondente sira sente kontente ho disponibilidade no atendimentu servisu notariadu iha sira nia munisípiu, restante sente la kontente liu-liu relasiona ho tempu ne'ebé naruk ka kleur liu hosi sira nia espetativa. Minoria hosi respondente sira mós akresenta sira menus informasaun kona-ba rekizitu ba trata BI nomos passaporte.

Entretantu, jestaun notariadu informa, problema teknika hanesan liña internét ne'ebé la estavel, sistema ne'ebé aat, no limitasaun ba ekipamentu informatika nu'udar kauza ba emisaun BI no/ka passaporte kleur. Aleinde ne'e kondisaun no espasu iha edificiu notariadu sira ladun responde ka akomoda volume sidadaun sira ne'ebé trata dokumentu identidade hirak ne'e.

Maioria respondente avalia funsionáriu sira atende ho di'ak no ajuda sidadaun sira. Responde balu mak preokupa ho limitasaun númeru funsionáriu, falta formasaun espesífika kona-ba atendimentu públiku, no inexisténsia padraun operasionál (SOP) ne'ebé klaru hodi orienta ka organiza (*guia*) prestasaun servisu. Kestaun hirak ne'e afeta ba variabilidade kualidade atendimentu ba sidadaun sira.

Maske servisu notariadu destaka ona iha munisípiu, sidadaun vulneravel sira mak hela iha area rural no remota, inklui idozu no EhD enfrenta difikuldade hodi trata sira nia dokumentu kauza distansia, limitasaun transporte, no infraestrutura ne'ebé seidak inkluzivu.

Iha parte seluk, implementasaun sistema ajendamentu *online* hanesan pasu progresivu, maibé seidak utiliza ho másimu tanbá limitasaun koñesimentu dijitál no problema konektividade internét.

Bazeia ba deskobrimentu sira ne'e, rekomenda ba governu presiza halo intervensaun estratéjika hodi mellora kualidade atendimentu públiku iha setór rejistu notariadu, inklui simplifika prosedimentu, dezenvolve rekursu umanus, melloramentu fasilidade fiziku no ekipamentu informatika, reforsu sistema internét no dijitalizaun servisu, no espansaun atendimentu to'o nível lokál liu hosi mekanismu móvel.

Aleinde ne'e, importante atu estabelese padraun operasionál servisu no promove edukasaun dijitál ba sidadaun sira hodi asegura utilizaun no asesu servisu ho efetivu.

Servisu atendimentu BI no pasaporte iha Timor-Leste hatudu progresu signifikativu iha aspetu disponibilidade, maske seidak atinji nível efisiénsia no kualidade ne'ebé masimu. Nesesita esforsu kontinua hosi entidade competente no relevante sira hodi asegura katak servisu públiku ne'ebé fornese bele responde ba sidadaun sira nia nesiedade ho efetivu no tuir sira nia espetativa.

4. Servisu Kontrolu Konstitusionálide

4.1. Fiskalizaun Abstrata ba Konstitusionálide

Entre periodu 2023 – 2025, Provedór Direitus Umanus no Justisa (PDHJ) submete ona petisaun fiskalizaun konstitusionálide 10k ba Tribunál Rekursu relasiona ho lei sira ne'ebé presiza haree nia konstitusionálide no omisaun medida lejizlativa ba matéria sira balu iha ámbitu direitu, liberdade no garantia fundamentál sira ne'ebé konsagradu iha Konstituisaun laran.

Hosi petisaun hirak ne'ebé PDHJ apresenta, petisaun rua (2) mak Tribunál Rekursu deklara inkonstitusionálide ba parte balu, petisaun ida mak Tribunál Rekursu halo indeferimentu liminar tanbá tuir Tribunál Rekursu nia opiniaun, petisaun refere laiha formulasaun pedidu ruma atu Tribunál Rekursu tetu, petisaun hat (4) mak Tribunál Rekursu deklara la inkonstitusionál, enkuantu petisaun tolu (3) mak PDHJ ladauk simu resposta (apresiasaun) hosi Tribunál Rekursu.

Nu'udar ilustra no deskreve iha leten, kona-bá progresu hosi servisu fiskalizaun konstitusionálide nian. Purtantu, lista lei sira no motivu hosi fiskalizaun nian nu'udar deskreve iha parte sira tuirmai:

1. Lei n.º 7/2025, 29 setembru (Revogasaun ba Pensaun Vitalísia no Regalia seluseluk ba Eis-Titular no Eis-Membru Órgaun Soberania sira)

PDHJ nia analiza ba lei n.º 7/2025, 29 setembru ne'ebé Revoga Pensaun Vitalísia no Regalia seluseluk ba Eis-Titular no Eis-Membru Órgaun Soberania sira, hanesan tuirmai:

1. Artigu 1 hosi lei ne'e, **viola** prinsípiu seguransa jurídika no protesaun konfiansa sidadaun sira-nian, ne'ebé ejiste iha prinsípiu orientadór Estadu Direitu mak konsagradu iha artigu 1, n.º 1 no artigu 6, alínea b), iha Konstituisaun RDTL.
2. Artigu 3 hosi lei ne'e **ofende** prinsípiu seguransa jurídika no protesaun konfiansa sidadaun sira-nian, ne'ebé mosu iha prinsípiu jerál Estadu Direitu referidu iha artigu 1, n.º 1 no artigu 6, alínea b), iha Konstituisaun RDTL.
3. Artigu 4 hosi lei ne'e, **la respeita** prinsípiu seguransa jurídika no prinsípiu protesaun konfiansa sidadaun sira-nian, ne'ebé mai hosi prinsípiu jerál Estadu Direitu, referidu iha artigu 1, n.º 1 no artigu 6, alínea b), iha Konstituisaun RDTL.
4. N.º 2, Artigu 5 hosi lei ne'e, **viola** prinsípiu seguransa jurídika no prinsípiu protesaun konfiansa sidadaun sira-nian, ne'ebé mai hosi prinsípiu fundamentál Estadu Direitu, previstu iha artigu 1, n.º 1 no artigu 6, alínea b), iha Konstituisaun RDTL.
5. N.º 3, artigu 5 hosi lei ne'e:
 - a) **viola** prinsípiu proporsionalidade ne'ebé mai hosi Estadu Direitu, previstu iha artigu 1, n.º 1 no artigu 6, alínea b) iha Konstituisaun RDTL;
 - b) **La respeita** artigu 50, n.º 3 Konstituisaun RDTL tanbá hapara imídiatamente kontratu taballu sira, sein justa kauza;
 - c) Ofende prinsípiu seguransa jurídika no prinsípiu protesaun konfiansa sidadaun sira-nian, ne'ebé konsagradu iha ámbitu prinsípiu jerál Estadu Direitu, previstu iha artigu 1, n.º 1 no artigu 6, alínea b), iha Konstituisaun RDTL.

6. Artigu 7 hosi lei ne'e, **la halo tuir** prinsípiu seguransa jurídika no protesaun konfiansa sidadaun sira-nian, ne'ebé referidu iha prinsípiu fundamentál Estadu Direitu, temi iha artigu 1, n.º 1 no artigu 6, alínea b), iha Konstituisaun RDTL.
7. Artigu 1, n.º 1 artigu 3, no artigu 7 hosi lei ne'e **viola** artigu 24, n.º 2 iha Konstituisaun RDTL.
8. Artigu 5, n.º 3 hosi lei ne'e viola artigu 6, alíneas d) no e), no artigu 138 iha Konstituisaun RDTL.

Petisaun ne'e PDHJ submete ona ba Tribunál rekursu iha tinan 2025 no hetan ona resposta hosi Tribunál Rekursu. Tribunál deklara inkonstitusionál ba de'it parte balu hosi Artigu 5, n.º 3 hosi lei ne'e (inkonstitusionáldade ba de'it norma ne'ebé hapara kontratu sira sein-kompensasaun).

2. Diploma Ministerial n.º 17/2025, 25 junu (Regulamentu Konkursu Públiku kona-ba Admisaun ba Kursu Formasaun ba Ajente Polísia Nasionál Timor-Leste)

PDHJ hare Diploma Ministerial n.º 17/2025, 25 junu relasiona ho Regulamentu Konkursu Públiku kona-ba Admisaun ba Kursu Formasaun ba Ajente Polísia Nasionál Timor-Leste la tau konsiderasaun ba prinsípiu konstitusionál hanesan:

- 1) Viola prinsípiu igualdade bazeadu ba estadu sivil, previstu iha artigu 16, n.º 2 Konstituisaun RDTL.
- 2) La respeita artigu 16, n.º 2 Konstituisaun RDTL kona-bá diskriminasaun bazeadu ba "pozisaun sosiál".
- 3) Viola prinsípiu igualdade ne'ebé konsagradu iha n.º 2, artigu 16 Konstituisaun RDTL kona-bá kategoria "kondisaun fizika".
- 4) La observa n.º 1, artigu 34 Konstituisaun RDTL (prinsípiu prezunsaun inosénsia).
- 5) La respeita direitu fundamentál ba traballu ne'ebé previstu iha n.º 1 hosi artigu 50 Konstituisaun RDTL nia, (falta igualdade kondisaun sira, asesu ba empregu entre kandidatu sira tanbá mosu diskriminasaun ho baze ba estadu sivil, pozisaun sosiál, estadu saúde no prezunsaun kulpa antesipada).

PDHJ submete ona petisaun ne'e ba Tribunál Rekursu iha tinan 2025, no iha tinan mak hanesan Tribunál Rekursu deklara inkonstitusionáldade ba parte balu hosi diploma refere, hanesan: Inkonstitusionál no ilegál ba artigu 20.º alínea c), hosi Diploma Ministerial ne'ebé refere tanbá ejize katak kandidatu sira ba kursu formasaun ba Ajente PNTL tenke solteiru ka klosan. Ne'e diskriminasaun direta bazeia ba estadu sivil.

Ne'e viola prinsípiu proporsionalidade no restrinje ho forma lejítima, direitu ba traballu no asesu ba empregu públiku, haktuir artigu 16.º nú. 2, Konstituisaun RDTL, nune'e mós artigu 2.º hosi Deklarasaun Universal Direitus

Humanus (DUDH), no artigo 2.º nú 2, konjugadu ho artigo 6.º nú. 1, hosi Paktu Internasionál Direitu Sivíl no Polítiku.

Inkonstitusionál no ilegál ba alínea b) no c) hosi nú. 2, artigo 42.º hosi Diploma Ministerial ne'ebé refere tanbá ejiste diskriminasaun direta bazeia ba pozisaun sosiál. Ne'e viola artigo 16.º nú 2, Konstituisaun RDTL, no artigo 2.º hosi DUDH, no artigo 2.º nú 2, konjugadu ho artigo 6.º nú. 1, hosi Paktu Internasionál Direitu Sivíl no Polítiku.

Inkonstitusionál no ilegál ba nú. 3 hosi aneksu VI, hosi Diploma Ministerial ne'ebé refere tanbá ejiste diskriminasaun direta bazeia ba kondisaun fízika ka estadu saúde. Ne'e viola artigo 16.º nú 2, Konstituisaun RDTL, desrespeita prinsípiu proporsionalidade, kontraria norma internasionál sira direitus humanus nian no afeta injustificadamente direitu ba traballu no asesu ba empregu públiku.

Inkonstitusionál no ilegál ba artigo 20.º al. k), hosi Diploma Ministerial ne'ebé refere tanbá viola prinsípiu prezunsaun inosénsia ne'ebé konsagradu iha artigo 34.º nú. 1, Konstituisaun RDTL, no instrumentu internasionál sira Direitus Humanus nian.

Inkonstitusionál no ilegál ba artigo 20.º al. c) no k), nú. 3 hosi aneksu VI, alínea b) no c) hosi nú. 2, artigo 42.º, hosi Diploma Ministerial ne'ebé refere tanbá viola direitu fundamental ba traballu no igualdade atu asesu ba empregu públiku, tuir termu artigo 50.º Konstituisaun RDTL.

La determina anulasau kompletu ba konkursu públiku PNTL nian tanbá sei la'o hela, sein prejuizu ba obrigasaun atu halo prosedimentu administrativu sira tuir desizaun inkonstitusionálide ne'e, hodi halakon kritériu inkonstitusionál sira no avalia filafali pedidu sira bazeia ba kritériu tuir Konstituisaun Timor-Leste nian.

3. Dekretu-Lei n.º 13/2012, 7 marsu, alteradu ho Dekretu-Lei n.º 86/2022, 14 dezembru (Karreira Profisional Saúde sira-nian) no Sirkular n.º 02/GIAS-MS/X/2024, 29 outubru, ne'ebé Inspetór-Jerál Ministériu Saúde nian mak emite.

PDHJ halo analiza konstitusionál ba Dekretu-Lei n.º 86/2022, 14 dezembru ne'ebé altera Dekretu-Lei n.º 13/2012, 7 marsu kona-ba Karreira Profisional Saúde sira-nian, nomos Sirkular n.º 02/GIAS-MS/X/2024, 29 outubru, ne'ebé emite hosi Inspetór-Jerál Ministériu Saúde nian, PDHJ nota:

- 1) N.º 2, artigo 31 hosi Aneksu I, n.º 2, artigo 26 hosi Aneksu II, n.º 2, artigo 24 hosi Aneksu III no n.º 2, artigo 25 hosi Aneksu IV Dekretu-Lei n.º 86/2022, 14 dezembru ne'ebé altera Dekretu-Lei n.º 13/2012, 7 marsu, **viola** Konstituisaun RDTL n.º 1, artigo 50 no artigo 16.
- 2) Sirkulár n.º 02/GIAS-MS/X/2024, 29 outubru, ne'ebé mak Inspetór-Jerál Saúde emite, **viola** n.º 2, artigo 31 hosi Aneksu I, n.º 2, artigo 26 hosi Aneksu II, n.º 2, artigo 24 hosi Aneksu III no n.º 2, artigo 25 hosi Aneksu IV Dekretu-Lei n.º 86/2022, 14 dezembru ne'ebé altera

Dekretu-Lei n.º 13/2012, 7 marsu kona-ba Karreira Profisional Saúde sira-nian.

- 3) Sirkulár n.º 02/GIAS-MS/X/2024, 29 outubru, ne'e la respeita prinsipiu igualdade ne'ebé previstu iha n.º 3, artigo 8 nomos viola artigo 9 sobre rejime eskluzividade, iha Estatutu Funsan Públika.

Petisaun ne'e PDHJ submete ona ba Tribunál Rekursu iha tinan 2025, no Tribunál Rekursu deklara inkonstitusionáldade parte balu hosi deketu lei refere, hanesan:

N.º 2, artigo 31 hosi Aneksu I, n.º 2, artigo 26 hosi Aneksu II, n.º 2, artigo 24 hosi Aneksu III no n.º 2, artigo 25 hosi Aneksu IV Dekretu-Lei n.º 86/2022, 14 dezembru ne'ebé altera Dekretu-Lei n.º 13/2012, 7 marsu, **viola** Konstituisaun RDTL artigo 50 no artigo 16.

Tribunál Rekursu la admite kontrolu konsttusionáldade ba Sirkulár n.º 02/GIAS-MS/X/2024, 29 outubru, ne'ebé mak Inspetór-Jerál Saúde emite, tanbá tuir Tribunál nia opiniaun, Sirkulár ne'ebé refere nu'udar ato administrativu ida ne'ebé mak laiha konteúdu normativu.

4. Lei n.º 20/2023, de 12 de dezembro (Prosedimentu kona-ba Konsesaun Indultu no Komutasaun Pena)

Iha 2024, PDHJ hatama petisaun fiskalizaun konstitusionáldade ba Tribunál Rekursu relasiona ho Lei n.º 20/2023, de 12 de dezembru, Prosedimentu kona-ba Konsesaun Indultu no Komutasaun Pena. PDHJ komfirma parte esensial ne'ebé Tribunál Rekursu atu haree mak:

- 1) Prinsipiu seguransa jurídika ka prinsipiu protesau konfiansa ne'ebé mai hosi prinsipiu Estado Direitu ne'ebé temi iha artigo 1 Konstituisaun RDTL, obriga Estado atu hamosu atuaun ne'ebé previzível no konfiavel, inklui iha elaborasaun lei. Konteúdo diploma lejizlativu ne'e la garante prinsipiu sira ne'ebé refere.
- 2) Violasau ba prinsipiu universalidade no igualdade iha artigo 16 Konstituisaun RDTL.
- 3) Konseitu indefinidu ka redasaun ne'ebé la klaru (e.g. razaun humanitária) hamosu interpretasaun jurídika oioin. Ida-ne'e hamosu risku ba seguransa no serteza jurídika.
- 4) Fó indultu ka halo komutasaun pena ba kondenadu ida molok kondenadu ne'e kumpre ninia pena, viola prinsipiu separasaun poder ne'ebé temi iha Konstituisaun RDTL artigo 69.
- 5) Konstituisaun RDTL artigo 31, ejize mós atu iha responsabilidade Estado nian hodi intervein bainhira mosu lezaun ba bens jurídkus fundamental sira ba moris iha sosiedade nia laran. Estado tenke asume direitu fó kastigu ba ema. Nune'e, karik Estado la fó kastigu, Estado rasik komete ofensa kontra prinsipiu justisa penál.

Infelizmente PDHJ simu indeferimentu liminar hosi Tribunál Rekursu. Tribunál Rekursu halo indeferimentu ne'e ho opiniaun, petisaun refere laiha

formulaun pedidu ruma atu Tribunál Rekursu tetu. PDHJ halo reklamasaun hasoru indeferimentu ne'e maibé Tribunál mantein ninia desizaun.

Hodi hatan ba Tribunál Rekursu nia preokupasaun, PDHJ reformula petisaun hodi aprofunda rajaun sira relasiona ho lei refere nia inkonstitusionáldade, hanesan tuirmai:

- 1) Lei n.º 20/2023, de 12 de dezembru, Prosedimentu kona-ba Konsesaun Indultu no Komutasaun Pena viola prinsípiu sira (seguransa no serteza jurídika, protesau konfiansa), ne'ebé mai hosi prinsípiu fundamentál Estadu Direitu previstu iha Konstituisaun RDTL artigu 1, n.º 1, viola mós prinsípiu universalidade no igualdade ne'ebé konsagradu iha Konstituisaun RDTL artigu 16, ofende valór ne'ebé konsagradu iha Konstituisaun RDTL artigu 32 númeru 4, la respeita prinsípiu separasaun podér ne'ebé temi iha Konstituisaun RDTL artigu 69 no independénsia judisiária referidu iha Konstituisaun RDTL artigu 119.
- 2) Hakanek valór sira ne'ebé mak sistema jurídku hakarak salvaguarda, hanesan: konsagrasaun konstitusionál atu promove sosiedade ida ho baze ba justisa sosiál, hamosu bein-estár materiál no espirituál ba sidadaun sira [alínea e) hosi artigu 6 Konstituisaun RDTL], prinsípiu justisa penál previstu iha artigu 31 Konstituisaun RDTL, viola valór reinsersaun sosiál ne'ebé mak ita-nia sistema jurídku hakarak alkansa no hakanek prinsípiu separasaun podér ne'ebé indikadu iha Konstituisaun RDTL artigu 69.
- 3) Laiha previzaun regra sira ne'ebé ejize ponderasaun kona-ba reinsersaun sosiál no obrigatoriedade atu konsidera komportamentu kondenadu nian, ho objetivu atu prevene impunidade Omisaun lejizlativa, ne'e viola norma sira hosi instrumentu Direitu internasionál oioin:
 - a) N.º 3, artigu 10 hosi Paktu Internasionál Direitu Sivil no Polítiku;
 - b) N.º 3, 5 no 10, artigu 30 hosi Konvensaun Organizasaun Nasoins Unidas nian Kontra Korrupsaun;
 - c) Alínea b), n.º 4, artigu 3 no n.º 6 no 7, artigu 3 hosi Konvensaun Nasoins Unidas nian Kontra Tráfiku Ilísitu Estupefasiente no Substánsia Psikotrópika;
 - d) Alíneas a) no b), artigu 4 hosi Konvensaun Nasoins Unidas nian ba Eliminasau Finansiamentu Terrorizmu;
 - e) N.º 2 no 4, artigu 11 no n.º 3, artigu 31 hosi Konvensaun Nasoins Unidas nian Kontra Krime Organizadu Transnasionál.
- 4) Ofensa ba prinsípiu seguransa no serteza jurídika, ne'ebé temi iha prinsípiu fundamentál Estadu Direitu (artigu 1, n.º 1 Konstituisaun RDTL), viola mós prinsípiu universalidade no igualdade (artigu 16 (Konstituisaun RDTL) no violasaun ba prinsípiu separasaun podér (artigu 69 Konstituisaun RDTL).

PDHJ simu ona resposta ka apresiasaun hosi Tribunál Rekursu, ne'ebé la deklara inkonstitusionál ba lei ne'e.

5. Artigu 1475 Kódigo Sivil, aprovalu hosi Lei n.o 10/2011, lora 14 setembro, alteradu ho Dekretu-Lei no 45/2012, lora 21 novembru

Iha 2024 PDHJ apresenta ba Tribunál Rekursu relasiona ho 1475 Kódigo Sivil, aprovalu hosi Lei n.o 10/2011, lora 14 setembro, alteradu ho Dekretu-Lei no 45/2012, lora 21 novembru, ne'ebé PDHJ nota viola prinsipiu universalidade no igualdade ne'ebé konsagradu iha artigu 16 Konstituisaun RDTL, nomos prinsipiu respeito ba dignidade umana, konsagradu iha Konstituisaun RDTL artigu 1, n.º 1.

Artigu 1475 Kódigo Sivil infrinje prinsipiu separasaun entre konfisaun relijioza sira ho Estadu, ne'ebé konsagradu iha n.o 1 hosi artigu 45 iha Konstituisaun RDTL. Purtantu, iha 2025 Tribunál Rekursu fó apresiasaun la deklara inkonstitusionáldade artigu 1475 Kódigo Sivil, aprovalu hosi Lei n.o 10/2011, lora 14 setembro, alteradu ho Dekretu-Lei no 45/2012, lora 21 novembru.

6. Número 1 hosi artigu 3 Dekretu-Lei n.º 21/2021, lora 10 novembru, refere ba subsídiu mensal transporte, alteradu ho Dekretu-Lei n.o 80/2022, 9 novembru.

PDHJ hala'o fiskalizasaun abstrata susesiva ba **Dekretu-Lei n.º 21/2021, lora 10 novembru, refere ba subsídiu mensal transporte, alteradu ho Dekretu-Lei N.º 80/2022, 9 novembru, foku ba artigu 3 Número 1.**

PDHJ nota, N.º 1, artigu 3 hosi Dekretu-Lei n.º 21/2021, 10 novembru, ne'ebé kria subsídiu mensál transporte, alteradu ho Dekretu-Lei n.o 80/2022, 9 novembru, viola prinsipiu universalidade no igualdade, ne'ebé konsagradu iha artigu 16 Konstituisaun RDTL nian. Aleinde viola Konstituisaun, viola mós prinsipiu igualdade ne'ebé previstu iha Estatutu Funsau Públika artigu 8, n.º 3.

Petisaun ne'e PDHJ submete ba Tribunál Rekursu iha 2024, entretantu iha 2025, PDHJ simu resposta hosi Tribunál Rekursu katak artigu 3, N.º 1, hosi Dekretu-Lei n.º 21/2021, 10 novembru, ne'ebé kria subsídiu mensál transporte, alteradu ho Dekretu-Lei n.º 80/2022, 9 novembru la inkonstitusionál.

7. Artigu 11 hosi Dekretu-Lei n.º 32/2011, 27 julu, kona-ba Jestun no Aliensau Bens Móveis Estadu nian.

Iha 2025, PDHJ submete petisaun fiskalizasaun inkonstitusionáldade ba Tribunál Rekursu relasiona ho Artigu 11 hosi Dekretu-Lei n.º 32/2011, 27 julu ne'ebé PDHJ nota, artigu refere viola prinsipiu universalidade no igualdade ne'ebé konsagradu iha artigu 16 Konstituisaun RDTL. Enkuantu, Tribunál Rekursu deklara, Artigu 11 hosi Dekretu-Lei n.º 32/2011, 27 julu la inkonstitusionál.

8. Polítika Nasionál kona-ba Planeamentu Famíliar (aprovada hosi Rezolusaun Governu n.º 10/2022, 9 marsu)

Iha 2024, PDHJ sumbete petisaun fiskalizaun konstitusionáldade ba Tribunál Rekursu relasiona ho Polítika Nasionál kona-ba Planeamentu Famíliar (aprovada hosi Rezolusaun Governu n.º 10/2022, 9 marsu) ne'ebé PDHJ nota viola prinsípiu universalidade no igualdade ne'ebé konsagradu iha artigu 16 Konstituisaun RDTL (diskriminasaun bazeadu ba estadu sivil) no nega direitu feto solteira sira ba saúde no ba asisténsia méдика no sanitária nomos dever atu defende no promove asisténsia ne'e. Ne'e konsideradu nu'udar negasaun ba direitu fundamentál ba saúde ne'ebé previstu iha artigu 57 Konstituisaun. Tribunál Rekursu la admite halo fiskalizaun konstitusionáldade ba Polítika Nasionál kona-ba Planeamentu Famíliar ne'e tanbá tuir Tribunál nia opiniaun, Polítika Nasionál kona-ba Planeamentu Famíliar ne'e la'ós norma (Tribunál afirma katak Polítika ne'e ninia konteúdu laiha karákteer normativu). Tan ne'e, labele submetidu ba kontrolu konstitusionáldade.

9. Artigu 128 hosi Dekretu-Lei n.º 69/2022, 28 setembru (Estatutu Profisional Pesosal ho Funsan Polisial PNTL)

PDHJ komfirma, artigu 128 hosi Dekretu-Lei n.º 69/2022, 28 setembru (Estatutu Profisional Pesosal ho Funsan Polisial PNTL) halo restrisaun ba direitu ema nian ba traballu tanbá halo reforma obrigatória ba traballadór bazeadu ba idade, sein iha uluk autorizasaun lejizlativa hosi Parlamentu Nasionál. Governu halo diploma lejizlativu ne'e la'ós autorizasaun lejizlativa hosi Parlamentu, ne'e organikamente inkonstitusionál.

PDHJ hatu'o petisaun ne'e ba Tribunál Rekursu iha 2023, enkuantu iha 2024 PDHJ simu resposta, Tribunál Rekursu la deklara artigu 128 hosi Dekretu-Lei n.º 69/2022, 28 setembru (Estatutu Profisional Pesosal ho Funsan Polisial PNTL) inkonstitusionál.

4.2. Verifikasaun Inkonstitusionáldade tanbá Omissaun Medida Lejizlativa

Aleinde fiskalizaun abstrata konstitusionáldade, PDHJ halo mós verifikasaun inkonstitusionáldade tanbá ommissaun medida lejizlativa. Ne'e katak orgaan lejizlativu la hamosu diploma lejizlativu kona-ba tuir ezijensia Konstituisaun nian. Sidadaun sira labele goza ka ezerse direitu, liberdade no garantia fundamentál ruma ne'ebé mak Konstituisaun konsagra tanbá laiha lei oan hodi konkretiza gozu ka ezersisiu.

Verifikasaun Inkonstitusionáldade tanbá Omissaun ne'e hodi asegura Estadu hala'o ninia obrigasaun konstitusionál sira, proteje sidadaun sira-nia direitu fundamentál, hametin kontrolu ba poder públiku, no garante funsionamentu Estadu Direitu Demokrátiku iha Timor-Leste.

Nune'e, entre periodu 2024 – 2025, PDHJ submete ona petisaun verifikasaun inkonstitusionáldade neen (6), ne'ebé petisaun ida (1) mak Tribunál Rekursu deklara inkonstitusionáldade ho ommissaun, petisaun tolu (3) mak

Tribunál Rekursu deklara la-inkonstitusionál tanbá omisaun, no petisaun rua (2) mak PDHJ ladauk simu resposta.

Petisaun hirak ne'e, relasiona ho prinsípiu sira ne'ebé konsagra iha Konstituisaun RDTL hanesan tuirmai:

1. Ladauk iha Lei Justisa Juvenil

Iha 2025 ne'e, PDHJ apresenta petisaun verifikasaun inkonstitusionál por omisaun relasiona ho Protesaun labarik bazeia ba artigu 18 Konstituisaun Repúbika Demokrátika Timor-Leste, tanbá la aprova lejizlasaun autónoa ne'ebé presiza atu regula justisa juvenil iha Timor-Leste hodi implementa direitu labarik nian hanesan define iha parágrafu 1 no 2 hosi Artigu 18 Konstituisaun RDTL. To'o periodu ida ne'e PDHJ ladauk simu reposta hosi Tribunál Rekursu.

Artigu 18 Konstituisaun proteje labarik sira iha aspetu oioin, inklui iha esfera regulasaun justisa juvenil nian. Artigu 1, n.º 1 hosi Konstituisaun ko'alia mós kona-ba dignidade pessoa humana (i.e. dignidade labarik sira-nia bainhira iha konflitu ho lei). Iha kauza mós artigu 6, alínea b) no e) hosi Konstituisaun tanbá mosu negasaun ba direitu labarik sira-nian atu hetan deenvolvimentu harmoniozu iha aspetu oioin. Falta lei sobre justisa juvenil ne'e hatuur labarik no joven sira ne'ebé iha konflitu ho lei, uza norma prosesual penál komún nian hodi halo detensaun no julgamentu ba labarik no joven sira ne'e, hanesan ho ema boot sira. Tribunál Rekursu seidaun fó-sai desizaun sobre pedidu ne'e.

2. Laiha lei ba repara prejuizu ne'ebé estadu mak halo

PDHJ komfirma katak, Timor-Leste ladauk iha lei-oan atu proteje no konkretiza ema nia direitu fundamental oioin ne'ebé konsagradu ona iha artigu oioin iha testu Konstituisaun RDTL. Reabilitasaun ba ema sira nebe sofre danos/prejuizu nebe mak orgaun, ajente no funsionáriu Estadu nian ka individuu sira komete (i.e. responsabilidade do Estado), hodi konkretiza normas protetoras sira ba direitu fundamental oioin nebe temi iha prinsípiu fundamental Estado de Direito nian

Bainhira ema ruma sofre prejuizu tanbá autoridade publika ruma nia sala, tenke iha responsabilizasaun ba sala ne'ebé mosu no kualker prejuizu ne'ebé mosu ona tenke hetan kompensasaun/indemnizasaun ne'ebé justu.

Falta hosi lei-oan refere halo direitu fundamental sidadaun nian ameadadu, hanesan sita tuirmai:

- a) Prinsípiu fundamental Estado de Direito ne'ebé konsagradu iha artigu 1, número 1 no iha artigu 6, alínea b) Konstituisaun RDTL no prinsípiu supremasia konstitusionálide (i.e. subordinasaun atos Estadu nian hotu ba Konstituisaun), ne'ebé previstu iha artigu 2, número 2 no 3 Konstituisaun RDTL.

- b) Direitu ba onra no ba privasidade ne'ebé previstu iha artigo 36 Konstituisaun RDTL hodi hamosu estipulasaun legál sobre prazu ba kanselamentu rejistu krimínal.
- c) Lakuna sobre regulasaun jurídika ba ejisténsia padraun mínimu kona-ba determinasaun indemnizasaun ne'ebé justu, ne'ebé previstu iha artigo 54, númeru 3 Konstituisaun RDTL.
- d) Responsabilidade Estado nian ne'ebé previstu iha artigo 96, númeru 1, alinea d) Konstituisaun RDTL.
- e) Indeminiza ema sira ne'ebé lakon liberdade tanbá prizaun ka detensaun no depois deklara katak ema sira ne'e inosente (ka absolvidu hosi kualkér akuzasaun krimínal), observa nafatin dignidade ema nian ne'ebé konsagradu iha artigo 1, númeru 1 no direitu ba liberdade, seguransa no integridade pesoál, ne'ebé konsagradu iha artigo 30, hotu-hotu hosi Konstituisaun RDTL.
- f) Konkretiza númeru 6 hosi artigo 31 Konstituisaun RDTL ne'ebé prevé direitu ba indemnizasaun justu bainhira mosu kondenasasaun ne'ebé la justu.

Petisaun ne'e PDHJ apresenta ona ba Tribunál Rekursu iha 2025, enkuantu to'o relatóriu ne'e pública, PDHJ ladauk simu resposta hosi Tribunál Rekursu.

3. Ladauk iha lei kona-ba determinasaun kondisoins traballu (inklui salariu minimu) ba ema ne'ebé halo traballu domestiku

Konstituisaun RDTL artigo 50 koalia kona-ba Direitu ba Servisu ne'ebé iha númeru daruak komfirma *Traballadór sira iha direitu ba seguransa no hetan mós husi servisu fatin ba selu-kole, deskansu no mós férias*.

Purtantu to'o oras ida ne'e Timor-Leste ladauk iha lei espesifika kona-ba kondisoins traballu (inklui determinasaun salariu minimu) ba ema sira ne'ebé halo traballu domestiku.

Petisaun verifikasaun inkonstitusionálidez tanbá omisaun ne'e PDHJ apresenta iha 2025, no PDHJ simu ona apresiasaun hosi Tribunál Rekursu deklara la inkonstitusionál tanbá omisaun medida lejizlativa.

4. Laiha lei atu regula direitu fundamental ba propriedade privada (komunitária) kona-ba terras komunitárias, demarkasaun bens imóveis komunitários, rejime sobre zona protesaun komunitária no bens imóveis komunitários iha kontestu comunidade lokal

Ema hotu-hotu iha direitu ba propriedade privada, no bele fó ba ema seluk bainhira sei moris no mós bainhira mate, tuir lei nia lala'ok, nu'udar temi iha Konstituisaun RDTL artigo 54, n.º 1.

Purtantu, PDHJ nota, Timor-Leste laiha lei atu regula direitu ba terras komunitárias iha kontestu povos indígenas, falta diploma ne'ebé regula demarkasaun ba bens imóveis komunitários no falta lei atu regula rejime zonas protesaun komunitária no bens imóveis komunitários.

PDHJ apresenta petisaun verikasaun inkonstitusionálide tanbá omisaun ne'e ba Tribunál Rekursu iha tinan 2025, entretantu Tribunál Rekursu la deklara inkonstitusionálide tanbá omisaun medida lejizlativa.

5. Laiha lei kona-ba protesaun dados pessoais

Konstituisaun RDTL artigu 38 kona-ba protesaun ba informasaun ema idaidak ninian, iha n.º 1 komfirma, Lei maka define loloos konseitu kona-ba informasaun ema idaidak ninian no kondisaun atu trata didi'ak informasaun ne'e.

Purtantu, to'o oras ida ne'e Timor-Leste ladauk iha lei ba proteje dados pessoais, nune'e iha 2025 PDHJ apresenta petisaun verifikasaun inkonstitusionálide tanbá omisaun ba Tribunál Rekursu, no Tribunál Rekursu deklara inkonstitusionálide tanbá omisaun, no haruka ona ba Parlamentu Nasionál atu halo lei protesaun dados pessoais.

6. Laiha lei kona-ba rejistu sivil

Konstituisaun RDTL Artigu 39 n.º 1 define, estadu proteje uma-kain nu'udar baze selulár iha sosiedade no nu'udar kondisaun ne'ebé di'ak ba ema idaidak hodi dezenvolve-an. Enkuantu n.º 2 akresenta ema hotu-hotu iha direitu atu harii no moris iha uma-kain.

Purtantu, Timor-Leste ladauk iha lei kona-ba rejistu sivil (rejistu kazamentu sivil), PDHJ hanoin katak, ida-ne'e impede ema labele forma família liu-hosi tipu kazamentu ne'ebé temi iha artigu 1475 Código Sivil. Lei oan preve tipu kazamentu oioin maibe sidadaun sira lebele realiza tipu kazamentu sira ne'e balu tanbá laiha lei konkretizadora.

PDHJ submete ona petisaun ne'e ba Tribunál Rekursu iha 2024, no iha 2025 Tribuna Rekursu la deklara inkonstitucionalidade tanbá omisaun.

RESTRISAUN NO REKOMENDASAUN SIRA

Abstante hosi rezultadu sira mak jestaun realiza durante 2025, enfrenta mós obstaklu oioin ne'ebé prejudika implementasaun servisu sira. Jerálmente, bstákulu prinsipal sira relasiona ho limitasaun transporte operasionál, rekursu ekipamentu, rekursu umanus, orsamentu, kooperasaun institusionál, nomos jestaun interna organizasaun nian.

Ne'ebé komfirma disponibilidade transporte operasionál seidauk suficiente no balun iha kondisaun ladun di'ak, nune'e difikulta deslokasaun ekipa ba terenu, liu-liu ba atividade fiskalizasaun, monitorizasaun no promosaun. Iha delegasaun Teritoriál sira iha kareta no motorista ida deit, nune'e funsionáriu sira tenki hein malu atu hala'o atividade. Situasaun ne'e kontribui ba atrazu iha ezekusaun atividade no la atinji planu servisu tuir tempu ne'ebé determina.

Entretantu facilidade teknika seidauk suficiente atu apoia servisu operasionál sira iha PDHJ. Laptop no desktop balun iha kondisaun ladun di'ak ona, kapasidade memória ki'ik no prosesu *loading* kleur, ne'ebé

difikulta preparasaun relatória no dokumentasaun servisu. Ekipamentu seluk hanesan printer, projetor, kamera, gravador, tablet seidauk disponivel ho suficiente. Aleinde ne'e, liña internét ladun estável ka lakon mosu, kotu-kotu prejudika komunikasaun no asesu ba sistema informasaun, inklui sistema jestaun kesar no dokumentasaun.

Númeru no kapasidade funsionáriu iha unidade balun limitadu, liu-liu fiskalizor no peskizador sira, ne'ebé difikulta implementasaun atividade iha teritóriu nasional, inklui forneseменту dados husi Delegasaun Territoriál (DT) ba diresaun nasional. Iha unidade auditoria interna, identifika mós katak kapasidade teknika rekursu umanus seidauk suficiente atu hala'o servisu *assurance no consulting* ho di'ak, no distribuisaun tarefa balun seidauk totalmente koresponde ho atribuisaun legál no kompeténsia funsionáriu sira nian.

Jestaun mós enfrenta dezafiu relasiona ho atrazu iha alokasaun no transferénsia orsamentu ne'ebé prejudika implementasaun atividade. Orsamentu balun la preve ba atividade inprevistu hanesan konvite externa no kazu urjente, nune'e prejudika prosesu pagamentu no apoiu akomodasaun ba funsionáriu sira durante deslokasaun oficial. Kestaun hirak ne'e implika implementasaun atividade la tuir planu anuál.

Purtantu, jestaun mós identifika katak, falta kooperasaun "serbisu hamutuk" husi instituisaun respondente, kesar nain no parte relevante sira, sai hanesan obstákulu. Iha kazu balun, instituisaun respondente la simu ka tarde responde ba relatóriu rekomendasaun, nune'e difikulta implementasaun rekomendasaun no halo asaun korektiva. Mudansa estrutura governu no limitasaun tempu husi lideransa superior mós kontribui ba difikuldade atu realiza enkontru nivel altu.

Dokumentu importante balun hanesan manuál jestaun kesar no investigasaun, no manuál jestaun arkivu dokumentu mós seidauk disponivel. Planu auditoria interna balun seidauk atualiza ho risku aktual iha unidade sira, nune'e difikulta implementasaun servisu *assurance no consulting* ho efetivu.

Situasaun seluk hanesan mudansa enderesu no kontaktu husi kesar nain mós prejudika prosesu notifikasaun no komunikasaun oficial.

Hamatan ba obstákulu no/ka restrisaun sira ne'ebé identifika iha leten, presiza tau konsiderasaun ba medida estratéjiku sira tuirmai hodi responde ba dezafiu hirak ne'e relasiona ho dezentvolvimentu kapasidade institusionál, reforsa sistema jestaun interna, no asegura ezekeusaun atividade ho efisiénsia no efetividade hodi hasa'e efisiénsia no efetividade implementasaun servisu institusionál, hanesan tuirmai:

- 1) Nesesita atu akizi tan kareta hodi apoia servisu Diresaun Programátika ne'ebé regularmente hala'o atividade iha terrenu. Aumenta transporte operasionál ba delegasaun Territoriál sira, inklui motorista. Iha kazu kareta sira ne'ebé kondisaun ladun di'ak ona,

rekomenda substitui ho kareta foun hodi garante seguransa no kontinuidade operasionál.

- 2) Presiza halo akizisaun ba ekipamentu informatika hanesan laptop, tablet, kamera no gravador hodi apoia servisu promosaun, fiskalizaun no peskiza iha terenu.
- 3) Eleva kapasidade liña internét no asegura manutensaun regular ba makina imprezora, nomos facilidade teknika seluk. Medida hirak ne'e importante atu asegura produtividade servisu, dokumentasaun nomos fasilita iha prosesu preparasaun relatória.
- 4) Reforsa kapasidade funsionáriu sira liu hosi realizaun formasaun espesífiku iha área relevante sira hanesan analiza dados no utilizaun sistema Cobocollect, hakerek relatória, peskiza temática, monitorizaun, mediásaun no jestaun administrativa ho finansas.
- 5) Rekruta tekniku espesializadu iha área peskiza no analiza dados, no tau konsiderasaun ba aumentu rekursu umanus iha Delegasaun Territoriál (DT) sira tuir nesesidade servisu institusionál.
- 6) Ajusta atribuisaun responsabilidade tuir atribuisaun legál no kompeténsia pesoál.
- 7) Asegura distribuisaun orsamentu la atrazu no halo monitorizaun regular ba ezekeusaun orsamentu hodi evita insufisiénsia orsamental iha fin-du-ano.
- 8) Aselera prosesu revizaun Manuál Operativu no kria *Standard Operating Procedure* (SoP) atu regulariza servisu fiskalizaun iha nível nasionál no delegasaun Territoriál, hodi habadak no halais servisu sira, promove komunikaun ne'ebé efetivu, hafasil implementasaun programa/atividade.
- 9) Hametin kooperasaun ho instituisaun relevante sira no reativa enkontru nivel altu hodi assegura implementasaun rekomendasaun sira mak hatu'o kauza servisu investigaun nomos servisu fiskalizaun.
- 10) Kria lei-oan hodi fortifika kompeténsia institusionál hodi aplika medida apropriadu ba parte sira ne'ebé la koopera iha prosesu mediásaun ka investigaun.
- 11) Diresaun traballu idaidak nesesáriu orienta ka halo *briefing* regular antes realizaun atividade iha terenu.

Pontus 11 ilustra número ekipa futebol ida, bainhira parte idaidak hala'o nia funsaun, halo reflesaun, avalia no hadi'a lakuna sira hotu ne'ebé enfrenta. Bainhira ita hakotu problema ida, problema seluk sei mosu, maibé nafatin firme atu la'o no kontinua esforsu, povu nia satisfasaun mak estadu nia objektivu.

MAKTAKAN

Relatóriu Atividade Provedoria Direitus Humanus no Justisa (PDHJ) 2025 revela mai ita kona-ba, protesaun ba direitus umanus no promosaun governasaun di'ak mak prosesu ida ne'ebé presiza kompromisu, integridade professional hosi servidór estadu sira, instituisaun estadu, sosiedade sivil no sidadaun hotu.

Provedoria Direitus Humanos no Justisa kontinua dezempeña nia mandatu ho independénsia no responsabilidade, liu-hosi tratamentu keixa, monitorizasaun, investigasaun, formasaun, peskiza no supervizaun polítika públika iha territóriu nasional tomak.

Rezultadu sira ne'ebé apresenta iha relatóriu ida-ne'e refleto dedikasaun no serbisu maka'as hosi lideransa no funsionáriu PDHJ, nomos serbisu di'ak ho orgaun soberania, parseiru desenvolvimentu, organizasaun sosiedade sivil, Mídia no comunidade sira. Esforsu kolektivu ida-ne'e kontribui ba aumentu konfiansa públika no reforsu estadu de direitu demokrátiku iha Timor-Leste.

Iha tempu hanesan, relatóriu ida-ne'e hatudu katak sei iha dezafiu importante sira relasiona ho rekursu umanu, orsamentu, infraestrutura no implementasaun rekomendasaun.

Dezafiu hirak-ne'e sai hanesan motivasaun atu kontinua hadi'a sistema interna no hametin kooperasaun ho parseiru sira atu garante servisu ne'ebé efisiente, no asesível liu.

PDHJ fiar, ho esperansa no determinasaun, sei kontinua servisu ho integridade, imparcialidade no profesionalizmu ba defende dignidade umana, prevene injustisa, no asegura katak poder públiku hala'o nia responsabilidade tuir Konstituisaun no lei sira. Nune'e, liu-hosi serbisu hamutuk, ita bele harii nasaun ida ne'ebé justu, transparente, inkluzivu no respeita direitus umanus no liberdade fundamentál ba ema hotu.
